


082.91  
Ty992









朝鮮群書大系續編第貳輯

文獻撮要全

朝鮮古書刊行會




朝鮮群書大系續第貳輯

文獻撮要全

朝鮮古書刊行會



082.91  
Ty992



# 文獻撮錄

## 文獻撮錄序

三王不同禮。五帝不同樂。然與治同道。罔不治。其不曰周監乎二代。而殷之監。在夏后之世乎。又不曰柯之則。不遠。而車之戒。在前乎。惟建事學于古訓。乃有獲。此在先碩哲之多蓄前言。往行以之處。大事決大疑者也。前代損益沿革。互相千百。亦莫不有制有度。有憲有章。萃歷代之事。輯一統之書者。唐有杜氏通典。宋有馬氏通考。皇明有王氏續考。余於公暇。聚閱而旁校。又叅搜史志及黃氏典彙。而補徵之。採揀爲六編書。今以盈數千百。橐之富且博者。而約之藏片笈。太簡略矣。然繁縟則難於記誦。縻概則便於考據。書雖小。亦庶爲居官者師古之一助。余老矣。不能與聞於政。而兒方策名于王廷。書以授之。辛亥初夏。經山老相國謹識。



文獻撮錄卷一目錄

- 天文志星象
- 日月之象
- 五星得位
- 瑞星
- 治曆三家
- 每歲進曆
- 歷代州郡
- 歷代都邑
- 帝母之稱
- 垂簾尊號之始
- 六宮之制
- 中宮三垣
- 五星之象
- 二十八宿分野
- 歷代曆法
- 古曆差法
- 渾代儀表
- 三代九州之不同
- 歷代帝系
- 太后臨朝
- 雙隻日垂簾
- 皇后之稱

- 納后之儀
- 漢唐宮人之數
- 宋立后之儀
- 天子冠禮
- 皇子冠禮
- 大夫士婚禮
- 册太子及太子妃儀
- 公主婚禮
- 東漢皇后紀
- 開元禮納后儀
- 明立后之儀
- 皇太子冠
- 大夫士冠
- 皇帝多子
- 皇太子納妃



# 文獻撮錄卷一

經山鄭元容善之抄藏

## 天文志星象

天文志曰。凡天文在圖籍。昭昭可知者。經星常宿中外官凡一十八名。績數七百八十三星。皆有州國官宮物類之象。其伏見早晚。邪正存亡。虛實廣僂。及五星所行。合散犯守。陵歷鬪食。彗孛飛流。日月薄食。暈適背宄。抱珥虹蜺。迅雷風祲。恠雲變氣。此皆陰陽之精。其本在地。而上發于天者也。政失於此。則變見於彼。猶景之象形。響之應聲。是以明君觀之。而寤飭身正事。思其咎。謝其過。則禍除而福至。自然之符也。

## 中宮三垣

中宮三垣。一曰中元。北極紫微宮。北極五星在其中。大帝之坐。第二珠第三之宮。庶子居。第一號曰爲太子。四爲后宮。五天樞。一曰上元。太微宮。一曰下元。名天市。宋天文志曰。天市垣中一星明大者。謂之帝座。帝座東北一星爲后。西南三星爲妃。妃北一星爲帝右。后北一星爲帝左。是爲左右常侍。妃南四星爲宦寺。宦寺南一星爲闈人。又曰。凡三垣。紫宮在中。天市在紫宮之東北。太微在紫宮之東南。而大角在紫宮之正東。故天市在大角左。太微在大角右。大角一星。晉隋志。雜之衆星中。謂之天王座。其說不同。

## 日月之象

隋天文志。月循黃道東行。一日夜行一度。三百六十五日有奇而周天。行東陸謂之春。行南陸謂之夏。行西陸謂之秋。行北陸謂之冬。行以成陰陽寒暑之節。是故傳云。日爲太陽之精。主生養恩德。人君之象也。月者陰之精也。其形圓。其質清。日光照之。則見其明。日光所不照。則謂之魄。故月望之日。日月相望。人居其間。盡覩其明。故形圓也。二弦之日。日照其側。人觀其傍。故半明半魄也。晦朔之日。日照其表。人在其裏。故不見也。月爲太陰



之精。以之配日。女主之象也。

五星之象

中興天文志曰。王奕按渾天說。黃道九道。厥初本無是。因日行而強名之。日行曰黃道者。黃色之中也。黃道卽中道也。日道居中。月五星循左右而行。故日道獨謂之黃。月行青朱白黑道。各兼黃道而言。故又謂之九道也。五星曰歲星。熒惑。鎮星。太白。辰星。歲星曰東方春木。於人五常。仁也。五事。貌也。其所居。其國有德厚。五穀豐昌。不可伐。張衡云。歲星者。東方之精。蒼帝之子。一名攝提。一名重華。一名應星。一名紀星。晉灼曰。太歲在四仲。則歲行三宿。太歲在四孟。四季。則歲二宿。二八十六。三四十二而行。二十八宿。十二歲而周天。熒惑曰南方夏火。禮也。視也。使行無常。出則有兵。入則兵散。所居國受殃。張衡云。熒惑爲執法之星。其精爲風伯之師。或童兒歌謠嬉戲。晉灼曰。熒惑常以十月入朝。太微。受制而出。行列宿司無道。出入無常也。二歲而周天。填星曰中央季夏土。信也。思心也。仁義禮智以信爲

主。貌言視聽以心爲政。故四星皆失填。乃爲之動。張衡云。填星者。黃帝之子。女主之象也。一名地侯。晉灼曰。常以甲辰之始。建斗。斗歲填行一宿。二十八歲而周天。太白西方秋金。義也。言也。太白進退以侯兵高卑遲速靜躁。見伏用兵。皆象之吉。其出西方。失行夷狄敗。出東方。失行中國敗。若經天。天下革。張衡云。太白者。白帝之子。一名火政。一名官星。一名明堂。一名文表。一名大皞。一名終星。一名天相。一名天浩。一名序星。一名梁星。一名威星。一名大鸞。一名大爽。晉灼曰。常以正月甲寅。與熒惑晨出東方。二百四十日而入。入四十日。又出西方。二百四十日而入。入三十五日。而復出東方。出以寅戌。入以丑未。一歲而周天。辰星曰北方冬水。智也。聽也。辰星見。則主刑。主廷尉。主燕趙。又爲戰鬪之象。張衡云。辰星一名句星。一名釁星。一名伺星。晉灼曰。常以二月春分。見奎婁。五月夏至。見東井。八月秋分。見角亢。十一月冬至。見牽牛。出以辰戌。入以丑未。二旬而入。晨候之東方。夕候之西方。一歲而周天。



五星得位

凡五星所出所行所直之辰。其國爲得位者。歲星以德。熒惑有禮。填星有福。太白兵強。辰星陰陽和。

二十八宿分野

角亢氏鄭兗州。房心宋豫州。尾箕燕幽州。斗牽牛須女吳越揚州。虛危齊青州。營室東壁衛并州。奎婁胃魯徐州。昴畢趙冀州。觜參魏益州。東井輿鬼秦雍州。柳七星張周三輔。翼軫楚荊州。

瑞星

漢武帝太元二年。老人星見。梁武帝天監四年。老人星見。占曰主壽昌。每年恒以秋分後見于參窠。至秋分而伏。武帝壽考之象云。宋太祖太宗真宗仁宗英宗五朝。壽星見。神宗哲宗徽宗三朝。老人星見。

歷代曆法

黃帝始作甲子制曆象。命大撓探五竹之情。占斗綱所建。作甲子。命羲和占日。常儀占月。車區占星氣。隸首理算數。命容成造蓋天儀。著周天歷度。作調曆。以建寅春正月爲歲首。復迎日推策。作十六神曆。積餘分以置閏。堯治曆象。舜治象器。成周曆法。周禮大司徒以土圭之灋。測土深正日景。以求地中。漢太初曆。凡五變。而莫善於太初。司馬遷等所推也。太初之所以爲善者。蓋其說本於鍾律。以黃鍾八十一分爲日法。復自前曆爲上元。得闕逢攝提格之歲。十一月甲子建朔朝。甲子日夜半時冬至。日月如合璧。五星如連珠。故其晦朔弦望。皆無一毫之差也。自太初曆一出。而一十七家之曆。皆廢矣。唐太衍曆。凡八變。而莫善於太衍。僧一行所作也。太衍之所以爲善者。蓋其說本於著策。以卦當歲。以爻當月。以策當日。以天地之二始位剛柔。以天地之二終紀閏餘。以卦氣定七十二候。以中星正二。十四氣。以晦朔正日月之會。以日度正周天之數。而其章部紀元。皆有合於易也。自太衍曆一出。而二十三家之曆。盡廢矣。宋曰統天曆。元曰授時曆。元其初襲用金舊。而規壞不協。難復施用。於是太史郭守敬出。其所創



簡儀仰儀及諸儀表。皆臻精妙。卓見絕識。蓋有古人所未及者。其說以爲昔人以管窺天。宿度餘分。約爲太半少。未得其的。乃用二線。推測於餘分。纖微皆有可考。而又當時四海測景之所。凡二十有七。東極高麗。西至滇池。南踰朱崖。北盡鐵勒。是亦古人之所未及爲者也。自是八十年間。司天之官。遵而用之。靡有差忒。而凡日月薄食。五緯凌犯。彗孛飛流。暈珥虹霓。精祲雲氣等事。其係於天文占候者。其有簡冊存焉。元世祖時。命郭守敬與贊善王恂。率南北日官。分掌測驗。推步於下。而忠宣樞密二張。爲之主領。裁奏於上。復共薦前中書左丞許衡。能推明曆理。俾參預之。郭守敬首言。曆之本。在測驗之器。莫先儀表。今司天渾儀。宋皇祐中。汴京所造。不與此處天度相符。比量南北二極。約差四度。表石年深。亦復欹側。乃盡考其失而作之。明太祖吳元年。太史院太史令劉基。率其屬高翼等。上戊申大統曆。基精於天文。故太祖首擢用之。洪武元年。改太史院爲司天監。又置回回司天監。回回曆出西域。然東東北狄南蠻。皆未有曆。而西域獨有之。

蓋西域諸國。當崑崙之陽。於諸夷中。爲得風氣之正。故多異人。若天竺梵學。婆羅門伎術。皆西域出也。自隋唐以來。已見於中國。今世所謂回回曆者。傳爲西域馬可之地。年號阿剌必時。異人馬哈麻之所作也。以今考之。其原實起於隋開皇十九年己未之歲。其法常以二百五十日爲一歲。歲有十二宮。宮有閏日。凡百二十有八年。閏三十有一日。又以三百五十四日爲一周。周有十二月。月有閏日。凡三十年。閏十有一日。歷千九百四十四年。而宮月甲子再會。其白羊宮第一日。日月五星之行。與中國春正定氣日之宿直同。其用以推步。分經緯之度。著凌犯之占。曆象以爲最密。元之季世。其曆始東。逮我高皇帝之造大統曆也。得西人之精乎曆者。於是命欽天監。以其曆與中國曆相參推步。迄今用之。今按歲之爲義。於文從步從戌。謂推步從戌起也。白羊宮於辰在戌。豈推步在戌時見星爲始。故歟。欽天監博士元統言。曆日之法。其來尙矣。今曆雖以大統爲名。而積分猶授時曆數。况授時曆法。以至元辛巳爲曆元。至洪武甲子。積一百四年。



以曆法推之。得三億七千六百一十九萬九千七百七十五分。經云。太約七十年之差一度。每歲差一分五十秒。辛巳至今。年遠數盈。漸差天度。擬合修改。蓋七政之源。有遲疾逆順伏見不齊。其理深奧。實難推演。聞磨勘司令王道亨。有師郭伯玉者。精明九數之學。若得此人。推大統曆法度。庶可成一代之制。蓋天道無端。惟數可以推其機。天道至妙。因數可以明其理。是理因數顯。數從理出。故理數可相依。而不可相違也。欽天監監副李德芳言。故元至元辛巳爲曆元。上推往古。每百年消一日。永久不可易也。今監正元統。改作洪武甲子曆元。不用消長之法。考得春秋晉獻公十五年戊寅歲。距至元辛巳二千一百六十三年。以辛巳爲曆元。推得天正。冬至在甲寅日夜子初三刻。與當時實測數相合。洪武甲子元正。上距獻公戊寅歲二千二百六十一年。推得天正冬至在己未日午正三刻。比辛巳爲元。差四日六時五刻。當用至元辛巳爲元。及消長之法。方合天道。疏奏。元統復言。臣所推甲子曆元。實與舊法相合。毫無差謬。上曰。二統皆難憑。

只驗七政交會行度無差者爲是。自是欽天監造曆。以洪武甲子爲曆元。仍依舊法推算。不用捷法。

治曆三家

古今善治曆者三家。一曰漢太初曆。以鍾律起。一曰唐大衍曆。以著策起。三曰元授時曆。以晷影測。就日體測之。毫忽微眇。不可得而遁者。元史所謂自古及今。推驗之精。未有出於此。

古曆差法

草木子曰。古曆多用一定之法。故未久而差。由不知天爲動物。而歲亦略有差也。古曆雖立差法。五十年差一度。又太過。一百年差一度。又不及。七十五年差一度。稍爲近之。尙未精密。元朝以八十一年而差一度。算已往減一算。算將來加一算。始爲精密。

每歲進曆

周禮。每歲以季冬頒來歲十二月之朔於諸侯。使其至期。按月而聽治也。



皇明曆式有二。曰王曆。曰民曆。每歲造大統曆。先期二月初一日進呈來歲曆樣。然後刊造一十五本。送禮部頒于兩京及布政司。照樣刊印。凡歲進御覽月令曆。大統曆。躔度曆。後永樂間。又有壬遁曆。洪武間。以九月初一進。後以十一月初一進。是日。太皇太后。皇太后。皇后及皇太子俱各進曆。遂頒賜在廷大小文武官各一本。

渾天儀表

言天者有三家。一曰蓋天。二曰宣夜。三曰渾天。蔡邕言。宣夜之學。絕無師承。周髀術具存。考驗天象。多所違失。惟渾天者。近得其情。所謂周髀者。卽蓋天之說也。其言天地中高而四隕。日月相隱蔽。以爲晝夜矣。又云。天形南高而北下。日出高故見。日入下故隱。天之居如倚。蓋極在人北。是其證也。所謂宣夜者。惟漢剗萌。託先儒所傳而云。天本無質。日月衆星。浮在空虛之中。其行其止。皆須氣焉。晉虞喜。因宣夜之說。於是而有安天之說。虞聳亦祖宣夜之說。於是而有穹天之論。吳姚信。又以天之體南低北高。於

是而有昕天之論。此皆好奇徇異之說。非極數譚天者也。蓋宣夜有其名而無其傳。周髀有其術而無其驗。惟渾天謂天之形狀如鷄卵。地居其中。天包地外。猶卵之理。黃圓如彈丸。剛氣圍合包絡。凝固不散。大地孤懸空虛。而無墜陷。以此天上之星辰河漢。懸空不墜。亦以此。但觀鷹鷂低飛。兩翼搖動不止。摩天而上。兩翼平舒而不復動。剛氣扶之也。人但知大地之上。有虛空。不知大地之下。亦有虛空。故王仲任雖據蓋天之說以駁之。而葛洪釋之曰。周天三百六十五度五百八十九分度之百四十五。東西南北展轉周規。半覆地上。半在地下。故二十八宿半現半隱。以儀準之。其見常一百八十三度有奇。是以知其半覆地上。半在地下也。况晉志載黃帝書曰。天在地外。水在天外。水浮天而載地者也。易之晉卦。坤下離上。以證日出於地。明夷之卦。離下坤上。以證日入於地。需卦。坤下坎上。此亦天入水中之象也。當有何損而謂不可乎。故歷代多用其說。漢武帝時。洛下閎始經營之。鮮于妄人又量度之。至宣帝時。耿壽昌始鑄銅而爲之象。宋錢



樂爲鑄銅作渾天儀。宋朝因之。爲儀三重。其在外曰六合儀。以其上下四方。於是可考。故曰六合。次其內曰三辰儀。以其日月星辰。於是可考。故曰三辰。其最在內曰四遊儀。以其南北東西。無不周徧。故曰四遊。熙寧沈括之儀。宣和璣衡之制。始詳密精緻。靖康之亂。儀象之器。盡歸於金。元人襲用金舊而規壞不協。難復施用。郭守敬創爲簡儀仰儀及諸儀表。

歷代州郡

黃帝方制天下。立爲萬國。帝嚳創制九州。統領萬國。北至于幽陵。南至于交趾。西至于流沙。東至于磻木。日月所照。莫不砥屬。唐堯遭洪水。而天下分絕。使禹平水土。還爲九州。如舊制。虞舜分爲十二州。夏氏又爲九州。商時存者三千餘國。亦爲九州。周初尙有千八百國。而分天下爲九畿。方千里曰王畿。其外曰侯畿。又外曰甸畿。又外曰男畿。又外曰采畿。又外曰衛畿。又外曰蠻畿。又外曰夷畿。要服也。又外曰鎮畿。又外曰藩畿。荒服也。至成王時。亦曰九州。屬職方氏。其後諸侯相并。有千二百國。及平王東遷。見

於春秋經傳者。百有七十國。及周之末。惟有七國。

秦制天下爲四十郡。漢興。以秦地太大。加置郡國。改雍曰涼。改梁曰益。又置徐州。復禹舊號。置交北有朔方。凡爲十三州部制史。司隸并荆兗豫楊冀幽青徐益交涼

至哀平之際。凡新置郡國六十三。與秦四十合百三。縣邑千三百十四。道三十二。侯國三百四十一。地東西九千三百二里。南北萬三千三百六十八里。此漢之極盛也。東漢光武。爲十三州部。司隸治河南。豫治譙。兗治昌邑。徐治郟。青治臨淄。涼治隴。并治晉陽。冀治鄆。幽治薊。楊治歷陽。益治雒。荆治漢壽。交治廣信。漸復加置郡國。至于靈獻。凡百有五焉。縣道侯國千一百八十。東樂浪郡。西燉煌郡。南日南郡。北鴈門郡。西南永昌郡。四履之盛。亦如前漢。

三國。魏據中原。有州十二。司隸荆豫兗青徐涼秦冀幽并楊雍。有郡國六十八。蜀漢全制巴蜀。置益梁二州。有郡二十二。吳北據江南。盡海。置交廣荆郢楊五州。有郡四十三。



晉武帝平吳。分爲十九州部置。司州治洛陽。兗治廩丘。豫治項。冀治房子。并治晉陽。青治臨淄。徐治彭城。荆初治襄陽。後治江陵。楊初治壽春。後治建業。涼治武威。分三輔爲雍治京兆。分隴山之西爲秦治上邽。益治成都。分巴漢之地爲梁治南鄭。分雲南爲寧治雲南。幽治涿。分遼東爲平治昌黎。交治龍編。分合浦之北爲廣治番禺。又增置郡國二十有二。凡州百五十有六。縣千一百有九。宋孝武。州二十有二。郡凡二百三十有八。縣千一百七十有九。齊悉因宋代。州二十有三。郡三百九十有五。縣千四百七十有四。梁多沿舊制。州二十有三。郡三百五十。縣千二十有五。陳比梁代。土宇彌蹙。西不得蜀漢。北失淮淝。以長江爲境。有州四十有二。郡百有九。縣四百三十有八。隋文帝遂廢諸郡。以州治民。煬帝初。併省諸州。改州爲郡。大凡郡百九十。縣千二百五十五。東西九千三百里。南北萬四千八百一十五里。唐貞觀初。併省州縣。始於山河形便。分爲十道。一曰關內道。二曰河南道。三曰河東道。四曰田河北道。五曰山南道。六曰隴右道。七曰淮南

道。八曰江南道。九曰劔南道。十曰嶺南道。東西九千五百十里。南北萬六千九百十八里。高宗平高麗百濟。得海東數千餘里。旋爲新羅靺鞨所侵。失之。開元二十一年。分爲十五道。南北如前漢之盛。東則不及。西則過之。天寶初。又改州爲郡。刺史爲太守。大凡郡府三百二十有八。縣千五百七十有三。其後范陽盜起。西河隴右不守。陷于吐蕃。梁初。天下別爲十一。南有吳浙荆湖閩漢。西有歧蜀。北有燕晉。而宋氏所有七十八州。

宋太祖受周禪。凡州府軍監一百三十九。縣六百六十一。及平定諸國。分天下爲十五路。其後又增三路。一曰京東路。二曰京西路。三曰河北路。四曰河東路。五曰陝西路。六曰淮南路。七曰江南東路。八曰江南西路。九曰荆湖南路。十曰荆湖北路。十一曰兩浙路。十二曰福建路。十三曰益州路。十四曰梓州路。十五曰利州路。十六曰夔州路。十七曰廣南東路。十八曰廣南西路。天下凡十八路。州府軍監三百二十二。縣一千二百六十二。地東南皆至于海。西盡巴夔。北際中山。東西六千四百八十五里。南北一萬



一千六百二十里。元起朔漠。併西域。平西河。滅女真。臣高麗。定南詔。遂下江南。而天下爲一。故其地北踰陰山。西極流沙。東盡遼左。南越嶺表。蓋漢東西九千三百二十里。南北一萬三千三百六十八里。唐宋東西九千五百一十一里。南北一萬六千九百一十八里。元東西所至不下漢唐。而西北則過之。有難以里數限者。立中書省一行。中書省十有一。曰嶺北。曰遼陽。曰河南。曰陝西。曰四川。曰甘肅。曰雲南。曰浙江。曰江西。曰湖廣。曰征東。分鎮藩服。路一百八十五。府三十六。州三百五十九。軍四。安撫司十五。縣一千一百二十七。漢唐極盛之際。有不及焉。唐以前。以郡領縣。而元則有路府州縣四等。大率以路領州。州領縣。而腹裏。或有以路領府。府領州。州領縣者。其府與州。又有不隸路。而直隸省者。至以戶爲差。戶至四萬。四萬者。爲下州。五萬至十萬者。爲中州。下州。官五員。中州。六員。凡爲中州者二十八。下州者十五。其中書省。統山東山西河北之地。謂之腹裏。爲路二十九。州八。屬府三。屬州九十一。屬縣三百四十六。皇明以京畿府州直隸六

部。天下分爲十三布政司。以統諸府州縣。而都司衛所。則錯置於其間。以爲防禦。摠之爲府一百四十九。爲州一百二十八。爲縣一千一百五。北直隸古冀州之域。洪武初。設北平布政使司。太宗建爲北京。山東古兗州之域。置承宣布政使司。遼東古青冀二州之域。洪武初。置定遼都衛。山西古冀州之域。置承宣布政使司。河南古豫州之域。置承宣布政使司。浙江古楊州之域。置承宣布政使司。南直隸古楊州之域。太祖定鼎於此。爲京師。永樂中。於北平。肇建北京。正統中。以北京爲京師。遂以此爲南京。福建古楊州之域。置承宣布政使司。江西古楊州之域。置承宣布政使司。陝西古雍州之域。置承宣布政使司。四州古荊州之域。置承宣布政使司。湖廣古荊州之域。廣東古楊州南境。廣西古荊州之域。各置承宣布政使司。貴州古荊梁二州南境。洪武初。以其地。分隸湖廣四川雲南三布政司。永樂十一年。始置承宣布政使司。雲南古梁州之域。置承宣布政使司。

三代九州之不同



黃氏曰古者言九州有三禹貢之冀兗青徐楊荆豫梁雍夏制也爾雅之冀幽營兗徐楊荆豫雍商制也職方之楊荆豫青兗雍幽冀并周制也商有幽營而無禹貢之青梁周有幽并而無禹貢之徐梁此三代九州之不同也然此皆三代以前封建之制也後世郡縣亦不異焉

歷代都邑

黃帝都涿鹿。顓頊都帝邱。高辛都亳。堯都冀州。舜都蒲坂。禹都安邑。湯都亳。仲乙遷于囂。河亶甲居相。祖乙遷于耿。周太王居邠。文王居豐。武王都鎬。周公營洛邑。定九鼎。平王爲犬戎所逼。遷于洛。秦都咸陽。西漢都長安。東漢都洛陽。蜀漢都成都。魏都鄴。吳都金陵。晉都洛陽。東晉都金陵。宋都金陵。齊都金陵。梁都金陵。陳都金陵。隋都長安。唐都長安。後梁都汴。後唐都洛陽。後晉都汴。後漢都汴。後周都汴。宋都汴。南宋都臨安。元都燕京。明都金陵。成祖都燕京。清都燕京。

歷代帝系

黃帝姓公孫少典子在位百年。壽百十一歲。顓頊黃帝孫在位七十八年。壽九十八歲。帝嚳黃帝曾孫在位七十年。壽百五歲。帝堯姓伊祈名放在位九十八年。壽百十八歲。帝舜姓姚氏名重華在位六十一年。壽百九歲。夏禹命顓頊孫在位二十七年。壽百歲。啓禹子在位九年。太康啓子在位二十九年。仲康弟太康在位十三年。帝相仲康子在位二十八年。少康相子在位二十二年。帝杼少康子在位十七年。帝槐杼子在位二十六年。王芒槐子在位十八年。帝泄芒子在位十六年。帝不降泄子在位五十九年。帝扃不降子在位二十一年。帝厘扃子在位二十一年。帝孔厘子在位三十一年。帝皋孔子在位十一年。帝發皋子在位十九年。帝履發子在位五十二年。夏十七世。共四百五十八年。起禹丁巳。止桀乙未。

殷湯姓子氏名履在位十三年。壽百歲。太甲湯孫在位三十三年。沃丁太甲子在位二十九年。太庚沃丁弟在位十五年。小甲太庚子在位十七年。雍己小甲弟



在位十二年。太茂弟雍己在位七十五年。仲丁子太茂在位十三年。外壬弟仲丁在位十五年。河子在位九年。祖乙子河在位十九年。祖辛子祖乙在位十六年。沃甲弟祖辛在位二十五年。祖丁兄沃甲在位三十二年。南庚子沃甲在位二十五年。陽甲子祖丁在位七年。盤庚弟陽甲在位二十八年。小辛弟盤庚在位二十一年。小乙弟小辛在位二十八年。武丁子小乙在位五十九年。祖庚弟武丁在位七年。祖甲弟祖庚在位三十三年。廩辛子祖甲在位六年。庚丁弟廩辛在位二十一年。武乙子庚丁在位四年。太丁子武乙在位三年。帝乙子太丁在位三十七年。帝辛號為紂在位三十二年。殷二十八世。共六百四十五年。起湯乙未。止紂戊寅。

周武王姓姬氏名發后稷在位七年。壽九十三歲。成王名誦武在位三十七年。康王名釗成在位二十六年。昭王名瑕康在位五十一年。穆王名滿在位五十五年。共王名繫扈在位十二年。懿王名囂共在位二十五年。孝王名辟方在位十五年。夷王名變懿在位十六年。厲王名胡夷在位三

十七年。宣王名靖厲在位四十六年。幽王名宮涅在位十一年。東周平王名宜臼在位五十一年。桓王名林平在位二十三年。莊王名佗桓在位五年。釐王名胡齊在位五年。惠王名闕釐在位二十五年。襄王名鄭惠在位三十二年。頃王名壬臣在位六年。匡王名班頃在位六年。定王名瑜匡在位二十一年。簡王名夷定在位十四年。靈王名泄心在位二十七年。景王名貴靈在位二十五年。敬王名丐景在位四十四年。元王名仁敬在位六年。貞定王名介元在位二十八年。哀王名去疾貞在位三月。思王名叔在位五月。考王名嵬貞定在位十六年。威烈王名午考在位二十四年。安王名驕威在位二十六年。烈王名喜安在位七年。顯王名扁烈在位四十八年。慎靚王名定顯在位六年。赧王名延慎在位五十九年。東周君從曾孫在位七年。西周東周三十七世。共八百七十四年。起武王己卯。止東周君壬子。

秦始皇帝姓嬴氏名政伯翳後在位三十七年。二世名胡亥始在位三年。二世共四



十三年起莊襄壬子止二世甲午。

漢高祖姓劉名邦在位十二年壽五十三歲惠帝祖名盈高在位七年壽二

十四呂后稱文帝祖名恒高在位二十三年壽四十六景帝帝名啓文在位十

六年壽四十八武帝帝名徹景在位五十四年壽七十一昭帝帝名弗陵武在

位十三年壽二十二宣帝名詢武帝曾孫在位二十五年壽四十三元帝

名爽宣在位十六年壽四十三成帝帝名懿元在位二十六年壽四十六哀

帝帝名欣元在位六年壽二十六平帝帝名衍元在位五年壽十四孺子嬰帝宣

孫帝名孫在位三年西漢十二世共二百十五年王莽僭位十四年帝立二年共

十六年起高祖乙未止孺子己巳。

東漢光武名秀高祖在位三十三年壽六十二明帝名莊光在位十八年

壽四十八章帝帝名烜明在位十三年壽三十三和帝帝名肇章在位十七年

壽二十七殤帝帝名隆和在位一年壽三歲安帝帝名祐章在位十九年壽三

十二順帝帝名保安在位十九年壽三十冲帝帝名炳順在位一年壽三歲質

帝帝名諲童在位一年壽九歲桓帝帝名志章在位二十一年壽三十六靈帝

帝名宏章在位二十一年壽三十四獻帝帝名協靈在位三十二年壽五十四

凡十二世共一百九十六年起光武乙酉止獻帝庚子。

蜀漢昭烈帝帝名備景在位三年壽六十三後主名禪昭在位四十一年二

世共四十四年起昭烈辛丑止後主癸未魏文帝帝名丕操在位四十二年

世合四十六年吳大帝帝名權堅至歸命侯四世合五十二年。

晉武帝帝名懿司馬名炎在位二十六年壽五十五惠帝帝名衷武在位十七年

壽四十八懷帝帝名熾武在帝五年壽三十愍帝帝名鄴武在位四年壽十八

西晉四世共五十二年起武帝乙酉止愍帝丙子。

東晉元帝帝名睿琅邪在位六年壽四十七明帝帝名紹元在位三年壽二十

七成帝帝名衍明在位十七年壽二十二康帝帝名岳成在位二年壽二十二

穆帝帝名聃康在位十七年壽十九哀帝帝名丕成在位四年壽二十五廢帝

帝名顯哀在位六年簡文帝帝名顯元在位二年壽五十三武帝帝名曜簡在位



二十四年壽三十五安帝武帝名德宗在位二十二年壽四十一恭帝安帝名德文弟在位二年壽三十六十一世共一百四年起元帝丁丑止恭帝庚申  
 宋武帝名姓裕在位三年壽六十少帝名義符在位一年壽十九文帝名隆武在位三十年壽四十六武帝名駿文在位十一年壽三十五廢帝名業武在位一年壽十七明帝名或文在位八年壽三十四後廢帝名昱明在位四年壽二十五順帝名準明在位三年壽十八歲八世共六十年起  
 高祖庚申止順帝己未齊高帝名道成在位四年壽五十六武帝名曠高在位十二年壽五十四鬱林王名昭業海陵王名昭文明帝名鸞高在位五年壽四十七廢帝名寶卷在位二年壽十九和帝名寶融在位二年壽十六六世共二十二年起高帝己未止和帝辛巳梁武帝名統蕭在位四十八年壽八十三簡文帝名綱武在位三年壽四十九元帝名繹武在位三年壽四十七敬帝名方智在位二年壽十六四世共五十六年起高祖壬午止敬帝丁丑陳武帝名顓陳在位三年壽五十七文帝名翊武在位六年

年廢帝名伯宗在位三年宣帝名項武在位十三年後主名叔寶在位七年五世共三十三年起武帝丁丑止後主己酉隋文帝名堅楊在位二十四年壽六十四煬帝名廣文在位十三年壽五十恭帝名侑楊在位一年三世共三十八年起文帝辛丑止恭帝戊寅  
 唐高祖名淵李在位九年壽七十二太宗名世民在位二十三年壽五十二高宗名治太在位三十四年壽五十六中宗名顯高在位二十六年壽五十五睿宗名旦高在位三年壽五十五玄宗名隆基在位四十四年壽七十八肅宗名亨立在位七年壽五十二代宗名豫肅在位十八年壽五十四德宗名適代在位二十六年壽六十四順宗名誦德在位一年壽四十六憲宗名純順在位十五年壽四十三穆宗名恒憲在位五年壽三十敬宗名湛穆在位三年壽十八文宗名昂穆在位十四年壽三十二武宗名炎名在位六年壽三十三宣宗名憲宗在位十三年壽五十懿宗名漼宗在位十四年壽三十一僖宗名儂懿在位十六年壽三十六昭宗名晔宗



子在位十六年。壽三十八。哀帝名祝昭宗九子在位三年。壽十七。二十世。共二百九十年。起高祖辛丑。止哀帝丁卯。

後梁太祖姓朱名全忠在位六年。壽六十二。末帝名瑱太子在位十一年。壽三十

六。二世。共十七年。起太祖丁卯。止末帝癸未。後唐莊宗姓李名存勗在位四年。

壽四十二。明宗名宣莊子在位八年。壽六十七。閔帝名從厚在位一年。壽二

十一。末帝名從珂子在位三年。壽五十二。四世。共十四年。起莊宗癸未。止

末帝丙申。後晉高祖姓石名敬瑭在位七年。壽五十一。少帝名重貴在位四

年。壽三十四。二世。共十一年。起高祖丙申。止末帝丙午。後漢高祖姓劉名

在位二年。壽五十四。隱帝名承祐子在位三年。壽二十。二世。共四年。起高祖

丁未。止隱帝庚戌。後周太祖姓郭名威在位三年。壽五十一。世宗姓柴名榮在

位六年。恭帝名宗訓在位一年。壽二十一。三世。共十年。起太祖辛亥。止恭

帝己未。

宋太祖姓趙名匡胤在位十七年。壽五十。太宗名匡義在位二十二年。壽五十

九。真宗名恒太子在位二十五年。壽五十五。仁宗名禎真子在位四十一年。壽

五十四。英宗名曙太子在位四年。壽三十八。神宗名頊英子在位十八年。壽三

十八。哲宗名煦神子在位十五年。壽二十五。徽宗名佶神子在位二十五年。壽

五十三。欽宗名桓徽子在位二年。壽六十一。九世。共一百六十八年。起太祖

庚申。止欽宗丁未。南宋高宗名構徽子在位三十六年。壽八十二。孝宗名昚昚

後孫高宗名昚在位二十八年。壽六十八。光宗名惇孝子在位五年。壽五十四。寧

宗名擴光子在位三十年。壽五十七。理宗名昀寧子在位四十年。壽六十一。度

宗名昀寧子在位二年。壽三十五。恭帝名曷度在位二年。端宗名昀度在位

三年。壽十一。帝昺名度宗子在位二年。壽九歲。九世。共一百五十三年。起高宗

丁未。止帝昺己卯。

元世祖姓奇渥温在位三十五年。壽八十。成帝名鐵木耳在位十三年。壽

四十二。武宗名海山在位四年。壽三十一。仁宗名愛育黎拔力在位九

年。壽三十六。英宗名碩德八在位三年。壽二十一。泰定帝名世孫先鐵在



位五年。壽三十六。明宗名和世疎在位一年。壽三十。文宗名圖帖睦爾武宗子睦在位五年。寧宗名懿璘質班明宗子質在位月餘。壽七歲。順帝名妥權帖睦爾明宗子睦在位三十六年。十世。共八十八年。起世祖庚辰。止順帝丁未。

大明太祖姓朱名元章在位三十一年。壽七十一。惠宗名允收太祖孫在位四年。成祖名棣太祖子在位二十二年。壽六十五。仁宗名高熾成祖子在位一年。壽四十八。宣宗名瞻基在位十年。壽三十八。英宗名禛成祖子在位二十二年。壽三十。代宗名禔宣宗子在位七年。壽三十。憲宗名見塗在位二十三年。壽四十一。孝宗名昀憲宗子在位十八年。壽三十六。武宗名厚孝宗子在位十六年。壽三十一。世宗名憲武宗子在位四十五年。壽六十。穆宗名載世宗子在位六年。壽三十六。神宗名鈞穆宗子在位四十八年。壽五十八。光宗名常神宗子在位一月。壽三十九。熹宗名由校神宗子在位七年。壽二十三。毅宗名由檢熹宗子在位十七年。壽三十五。赧皇帝名不熹宗子在位一年。隆武帝名端宗孫不在位一年。永曆皇帝名由榔神宗子在位一年。五年。十九世。共二百八十三年。起太祖戊申。止永曆庚寅。

帝母之稱

漢因秦之稱號。帝母稱皇太后。祖母稱太皇太后。

太后臨朝

漢惠帝崩。太后取後宮子。名爲孝惠子立之。年幼。太后臨朝稱制。師古曰。言一曰制。書二曰詔。書今太后臨朝。行天子事。故稱制。詔。

垂簾尊號之始

宋仁宗即位。尊眞宗章獻明肅皇后劉氏爲皇太后。軍國大事。權取處分。宰相丁謂等請太后所御殿。太后曰。皇帝視事。當朝夕在側。何須別御一殿。於是謂太后與帝五日一御承明殿。帝位在太后位右。垂簾決事。有司請制令。稱吾以生日爲長寧節。出入御大安輦。鳴鞭侍衛如乘輿。天下皆避太后父諱。群臣上尊號曰應元崇德仁壽慈聖太后。天聖二年。宰臣王欽若等并表請上皇太后尊號曰應元崇德仁壽慈聖皇太后。命宰臣王曾撰册文。叅知政事魯宗道書册寶。帝御大安殿受册。百官稱賀畢。帝服



承天冠絳紗袍。隨冊寶降西階。禮儀使奏請皇帝再拜訖。太尉司徒就受冊寶位。皇帝措圭跪捧冊授太尉。太尉搢笏東向側身跪受冊文曰云云。又捧寶授司徒。如授冊儀。太尉司徒奉冊寶。至文德殿門外幄奉安行禮。石林葉氏曰。母后加諡。自東漢始。本朝后諡初止二字。明道中。以章獻明肅嘗臨朝。特加四字。元豐中。慶壽太皇太后上仙。章子厚爲諡議請于朝。詔以太皇太后功德盛大四字。猶懼未盡。始仍故事。遂諡慈聖光獻。自是宣仁聖烈。與欽聖憲肅。皆四字云。

雙隻日垂簾

英宗即位。尊仁宗慈聖光獻皇后曹氏爲皇太后。帝感疾。請權同處。分軍國事。御內東門小殿聽政。帝康復。乃撤簾。神宗立。尊英宗宣仁聖烈皇后高氏爲皇太后。居寶慈宮。哲宗嗣位。尊爲太皇太后。同御延和殿。詔書稱吾以生日爲坤成節。令天下避后父諱。元豐八年。哲宗即位。太皇太后權同聽政。皇帝御迎陽門。日叅官並赴起居。依例奏事。每五日遇隻日。於迎陽門垂簾。皇帝坐於簾內之北。宰臣執政。官升殿奏事。權屏去左右侍衛。事有幾速。許非時請對。及賜宣召。亦許升殿。皇帝雙日。御延和殿垂簾。日叅官起居。太皇太后移班少西起居。

六宮之制

昏義。古者后立六宮三夫人九嬪二十七世婦八十一御妻。以聽天下之內法。以明章婦順。故天下內和而家理。

皇后之稱

漢興。用秦之稱號。適稱皇后。地曰后。土故天子之妃。以后稱。妾皆稱夫人。又有美人良人八子七人。長使少使之號焉。至武帝制婕妤經娥。俗僂充依。各有爵位。而元帝加昭儀之號。凡十四等云。

納后之儀

漢惠帝納后。納采。鴈。璧。乘馬。束帛。聘黃金二萬斤。馬十二匹。

東漢皇后紀



東漢皇后紀叙論曰。秦並天下。多自驕大。宮侍七國。爵列八品。漢興。因循其號。而婦制莫釐。及光武中興。斲彫為朴。六宮稱號。惟皇后貴人。貴人金印紫綬。奉不過粟數十斛。又置美人宮人采女三等。並無爵秩。歲時賞賜充給而已。漢法常因八月算人。八月初為算賦。故曰算人。遣中大夫與掖庭丞及相士於洛陽鄉中。閱視良家童女年十三以上二十以下。姿色端麗。合法相者。載還後宮。擇視可否。乃用登御。所以明慎聘納。詳求淑哲。明帝聿遵先旨。宮教頗修。登建嬪后。必先令德。內無出閫之言。權無私溺之授。可謂矯其弊矣。

漢唐宮人之數

容齊洪氏隨筆曰。自漢以來。帝王妃妾之多。唯漢靈帝。吳歸命侯。晉武帝。宋蒼梧王。齊東昏。陳後主。晉武。至於萬人。唐世明皇為盛。白樂天長恨歌云。後宮佳麗三千人。杜子美劔器行云。先帝侍女三千人。蓋言其多也。新唐史所叙謂。開元天寶中宮嬪大率至四萬。嘻其甚矣。隋大業。離宮徧天下。

下。所在皆置宮女。故裴寂為晉陽宮監。以私侍高祖。及高祖義師經過處。悉罷之。其多可想。

開元禮納后儀

開元禮。皇帝納后儀。卜日告圓邱方澤。祝文臨時撰。將行納幣。制令太尉為使者。宗正卿為副使。吏部承以戒之。問名納徵。納吉告期。並奉迎。并同使。皇帝御殿。命使其制文。凡六禮。皆比版長一尺二寸。博四寸。厚八分。后家答版亦如之。曰。皇帝曰咨。具官封姓。渾元資始。肇經人倫。爰及夫婦。以奉天地宗廟社稷。謀于公卿。咸以為宜。率由舊典。今使持節太尉封某。宗正卿封某。以禮納綵。答文曰。皇后嘉命。訪婚陋族。備數采擇。姑姊妹則云先。臣某官之遺女。未閑教訓。衣履若如人。欽承舊章。肅奉典制。某官封臣姓名。稽首頓首。再拜承制。詔問名制文曰。皇帝曰咨。某官封姓。兩儀配合。承天統物。正位乎內。必俟令族。重章舊典。今使使持節太尉封某。宗正卿封某。以禮問名。答文曰。皇帝嘉命。使者某重宣中制。問臣名族。臣女夫婦所生。先臣故某官之遺玄孫。先臣故某官之遺曾孫。先臣故某官



之遺孫。先臣故某官之外孫女。年若干。欽承舊章。謹奉典制。某官某臣姓某稽首頓首再拜承制詔。若女祖以上在則直云某官臣之孫女等語。納吉制文曰。皇帝曰咨。某官姓。人謀龜從。僉曰貞吉。敬順典禮。今使使持節太尉封某。宗正卿封某。以禮納吉。答文曰。皇帝嘉命。使者某重宣中制。太卜元吉。臣陋族卑鄙。憂懼不堪。欽承舊章。肅奉典制。某官臣姓某稽首頓首再拜承制詔。納徵制文曰。皇帝曰咨。某官姓之女。有母儀之德。窈窕之姿。如山如海。宜奉宗廟。永承天降。以立纁車馬。以章典禮。令使使持節太尉封某。宗正卿封某。以禮納徵。答文曰。皇帝嘉命。使者某重宣中制。降婚卑陋。崇以上公。寵以豐禮。備物典冊。欽承舊章。肅奉典制。某官臣姓名稽首頓首再拜承制詔。告期制文曰。皇帝曰咨。某官姓謀於公卿。太筮元龜。罔有不臧。率遵典禮。令使使持節太尉封某。宗正卿封某。以禮告期。答文曰。皇帝嘉命。使者某重宣中制。告曰。惟某月某日可迎。臣欽承舊章。肅奉典制。某官臣姓某稽首頓首再拜承制詔。告廟。有司以特牲告。如常告禮。祝文臨時撰。册后册

文曰。維某年月日。皇帝使使持節太尉封某。司徒封某。册命某官女某氏爲皇后。咨爾易階乾坤。詩首關雎。王化之本。實出內本。是故皇英嬪虞。帝道以光。太姒妣姬。周胤克昌。皇后其抵勗厥德。以肅承宗廟。虔恭中饋。盡敬于婦道。于六宮作範儀于四海。皇天無親。惟德是依。可不慎歟。命使奉迎制文曰。皇帝曰咨。某官姓歲吉月令吉。惟某率由典禮。今遣使持節太尉封某。宗正卿封某。以禮迎。答文曰。皇帝嘉命。使者某重宣中詔。令月吉辰。備禮以迎。螻蟻之族。猥承大禮。憂懼戰悸。欽承舊章。夙奉典制。某官臣姓某稽首頓首再拜承制詔。行同牢禮。皇后表謝儀曰。皇后至宮之日。服展衣。出司言引尙宮。尙宮前導。及左右侍從如常。升正殿兩楹間北面立。又尙儀以謝表授皇后。又尙儀以案俟於前。皇后置表案上。尙宮贊拜。皇后再拜訖。尙儀以表降殿。授內侍。因中書以聞。初內侍出門。皇后降殿還寢如常。朝皇太后及皇后。廟見禮有儀法。

宋立后之儀



宋國初。主后妃皆不行冊禮。太中祥符七年。封婉儀楊氏爲淑妃。翰林草制。付中書。不宣於外庭。乾興元年。遣制尊皇后爲皇太后。淑妃爲皇太妃。亦不果行冊禮。自雍熙後。后妃乃寫告身。用金華羅紙。金塗標袋。有司進入。近臣牧伯皇親。皆修貢禮爲賀。景祐元年。立皇后曹氏。冊文曰。皇帝若曰。天地定位。陰陽相成。人道貫之。以綱大倫。后德配之。以熙內治。聖人有以端其本也。故造舟之迎言乎備。詩人有以美其化也。故周南之風著乎始。粵朕冲昧。祇若丕構。深惟承荷之重。輔佐攸艱。用簡納賢明。協於人神之望。咨爾贈尙書令冀王配饗太祖廟庭。曹彬孫女。惟乃祖克有武力。勤勞在家。保勳不伐。饗厥終慶。教流後昆。薰然慈和。善祥憑積。生此邦媛。其漸漬醇醴。發聞馨香。所從來遠矣。起居祖習。不待姆師之訓。風容矩度。自爲宗黨之憲。長秋曠位。陰教未序。咨求訓範。統正六列。宗公鼎臣。誦言于朝。願即嘉時。聿中典禮。朕以春秋之義。必娶大國摯疇之家。乃稱福耦。謀及秦筮。聘以穀圭。惟吉之從。有命旣集。今遣使工部尙書同平章事李廸。

副使戶部侍郎叅知政事王隨。持節冊命爾爲皇后。欽哉。夫惟肅恭。可以侍上。夫惟謙裕。可以接下。泰而能約。則驕不至。動不慎思。則悔不萌。懋乃后德。修乃嬪職。奉承宗廟。儀刑家國。永綏無疆之祚。不其躋歟。元祐五年。太皇太后詔以皇帝納后有期。令太常禮官檢詳古今六禮沿革。叅考通禮典故。具其節文。著爲成式者。先是太皇太后諭宰臣呂大防等曰。皇帝將納后。天聖景祐故事。止降進冊。未嘗御殿。禮甚簡略。大防等請退而討論。遂降是詔。又詔翰林學士御史中丞兩省給舍與禮部太常寺官同詳議。六年八月。三省樞密院言。納后六禮。命使。納采。問名。納吉。納成。告期。差執政官攝太尉充使。侍從官或判從正官攝宗正卿充副使。以舊尙書省權爲皇后行第。納綵問名同日。次日納吉。納成。告期。納成。加穀圭。請期。依開寶禮。改爲告期。七年。詔尙書左丞蘇頌撰皇后冊文。兼書學士院上六禮辭語。納采制文。太皇太后曰。咨。某官封姓名。渾元資始。肇經人倫。爰及夫婦。以奉天地。宗廟社稷。謀于公卿。咸以爲宜。率由舊典。今遣使持節太



尉某宗正卿某以禮納采。答文曰。太皇太后嘉命。訪昏陋族。備數采擇。臣之女。姑姊妹。即云先臣某官之遺女。未閑教訓。衣履若而人。欽承舊章。肅奉典制。某官封糞土臣姓某稽首再拜承制詔。問名制文。太皇太后曰。咨。某官封姓名。兩儀合德。萬物之統。以聽內治。必咨令族。重宣舊典。今遣使持節太尉封某宗正卿封某。以禮問文。答文曰。太皇太后嘉命。使者重宣中制。問臣名族。臣女夫婦所生。先臣故某官之遺微孫。先臣故某官之遺曾孫。先臣故某官之遺孫。先臣故某官之外孫女。年若干。欽承舊章。肅奉典制。某官糞土臣姓某稽首頓首再拜承制詔。若女祖以上在。直云某官臣之孫女。納吉制文。太皇太后曰。咨。某官封姓名。人謀龜從。同符元吉。恭順典禮。今遣使持節太尉封臣某宗正卿某臣封。以禮納吉。答文曰。太皇太后嘉命。使者某重宣中制。臣陋族卑鄙。憂懼不堪。欽承舊章。肅奉典制。某官糞土臣姓某稽首頓首再拜承制詔。納成制文。太皇太后曰。咨。某官姓名之女。孝友恭儉。實維母儀。宜奉宗廟。永承天祚。以黝纁縠圭六馬。以章

典禮。今遣使持節太尉封某宗正卿封某。以禮納成。答文曰。太皇太后嘉命。使者某重宣中制。降婚卑陋。崇以上公。寵以豐禮。備物典冊。欽承舊章。肅奉典制。某官糞土臣姓某稽首頓首再拜承制詔。告期制文。太皇太后曰。咨。某官姓名。謀于公卿。太筮元龜。罔有不臧。吉日維某月某甲子可迎。率遵典禮。今使使持節太尉封某宗正卿封某。以禮告期。答文曰。太皇太后嘉命。使者某重宣中制。以某月某甲子吉日告期。臣欽承舊章。肅奉典制。某官糞土臣姓某稽首頓首再拜承制詔。命使奉迎制文。太皇太后曰。咨。某官姓名。禮之大體。欽順重正。其期維吉。典圖是若。今遣使持節太尉封某宗正卿封某。以禮奉迎。答文曰。太皇太后嘉命。使者某重宣中詔。令日吉辰備禮。以螻蟻之族。猥承大禮。憂懼戰悸。欽承舊章。肅奉典制。某官糞土臣姓某稽首頓首再拜承制詔。

明立后之儀

明天子納后儀。昏禮有六。天子惟無親迎禮。漢晉以來。皆遣使持節奉迎。



其禮物儀文各以時損益。明興諸帝皆即位後行冊立禮。正統七年英宗大婚始定儀注。凡納采問名前期擇日遣官告天地宗廟。至期正使副使詣皇后第。正使取納采制宣曰。朕承天序。欽紹鴻圖。經國之道。正家爲本。夫婦之倫。乾坤之義。實以相宗祀之敬。協奉養之誠。所資惟重。祇遵聖母皇太后命。遣使持節。以禮采擇。副使取問名制宣曰。朕惟夫婦之道。大倫之本。正位乎內。必資名家。特遣使持節。以禮問名。尙佇來聞。主婚者跪授正使表曰。臣某伏承嘉命。正使某官某等。重宣制詔。聞臣名族。臣女。臣夫婦所生。先臣某官某之曾孫。先臣某官某之孫。先臣某官某之外孫。臣女。今年若干。謹具奏聞。次納吉。納徵告期。傳制。遣使竝如前儀。但納徵用元纁束帛六馬。穀圭等物。納吉制書曰。大婚之下。龜筮師士協從。敬循禮典。遣使持節告吉。納徵制書曰。卿女有貞靜之德。稱母儀。選宜共承天地宗廟。特遣使持節。以禮納徵。告期制書曰。歲令月良吉日。某甲子。大禮維宜。特遣使持節。以禮告期。至期行冊后禮。制詞曰。茲冊某官某女爲皇后。命

卿等持節奉冊寶。行奉迎禮。冊皇后儀。古者立后。無冊命禮。至漢靈帝立宋美人爲皇后。始御殿。命太尉持節奉璽綬讀冊。皇后北面稱臣妾跪受。其後沿爲定制。而儀文代各不同。明儀注大抵參唐宋之制而用之。太祖初定制。

天子冠禮

周制。文王年十二而冠。成王十五而冠。將冠。筮日。筮賓。行之於廟。冠委貌於阼。三加彌尊。裸樂於廟。周公冠成王。命史雍頌曰。近於仁。遠於佞。近於義。畜於時。惠於財。任賢使能。五經要義云。冠首服也。首服既加。而後人道備。故君子重之。以爲禮之始矣。按大戴禮有公冠篇云。公冠四加。天子亦四加。又家語冠頌云。王太子之冠。擬諸侯之冠。天子之元子。亦擬諸侯四加。諸侯之子。同於士。據此。自天子至於諸侯。無冠禮。但因秦焚書。遂同蕩滅。其周制。士冠禮頗備。王者時採行焉。漢惠帝加元服。用正月甲子。若景子爲吉。昭帝冠。有冠辭。東漢制。正月甲子。若景子爲吉日。加冠禮。初加緇



布進賢。次爵弁。次武弁。次通天冠。謁高廟。漢書世祖制冠於宗廟從古制魏冠一加。東晉冠一加。唐卜日告圓邱告宗廟。有祝文。冠於太極殿中楹間。南向祝曰。令月吉日。始加元服。壽考惟祺。以介景福。乃冠。見太后謁太廟。大明儀曰。古者冠必於廟。天子四加。魏以後始冠於正殿。又以天子至尊。禮惟一加。歷代因之。洪武三年定制。先期太史院卜日。工部製冕服。翰林院撰祝文。禮部具儀注。中書省承制。遣官告天地宗廟。陳冠席於奉天殿。是日。皇帝服空頂幘。雙童髻。雙玉導。絳紗袍。太尉進櫛設纓。太師讀祝加冕。皇帝着袞服。光祿卿奉酒進太師。太師受酒讀祝。授內使。內使捧進。皇帝受祭。少許啐酒訖。樂止。皇帝改服通天冠。絳紗袍。謁太后。擇日謁太廟。明日稱賀。賜宴謹身殿。

皇太子冠

周制。天子元子。猶士也。天下無生而貴者也。漢宣帝冠太子以正月。冠諸王遣使行事。魏冠太子再加。皇子王公乃三。晉武帝冠太子。臨軒遣使。宋

齊冠太子及王。以一加。唐司徒爲賓。卿爲贊。太子著空頂黑介幘。雙童髻。玉導。寶飾綵衣以出。初加緇布冠。賓立祝。再加遠遊冠。賓祝。三加冕冠。賓立祝。又行啐醴禮。皇明儀。叅用周文王成王冠禮之年。近則十二。遠則十五。卜日撰祝。如皇帝儀。命某官爲賓。某官贊。太子就冠席。賓祝畢。進加折上巾。再加遠遊冠。三加袞冕。賓進宗之辭。奉勅宗某。太子再拜。跪聽宣勅。復再拜。進御前跪奏曰。臣不敏。敢不祇承。太子入內殿。見皇后。明日謁廟。又明日百官稱賀。錫宴。成化十四年。續定冠儀。初加翼善冠。再加皮弁。三加冕旒。宣勅戒官。詣前立曰。有制。太子跪。宣曰。孝事君親。友于兄弟。親賢愛民。居仁由義。毋怠毋驕。茂隆萬世。

皇子冠禮

明儀。初加進網巾。再加進翼善冠。三加進冕袞。俱有祝詞。又有勅戒詞。

大夫士冠

夏小正記。二月。冠子之時也。冠禮筮日筮賓。冠於阼。醮於各位。三加彌尊。



初加緇布次加弁已冠而字之。見於母。母拜之。見於兄弟。兄弟拜之。成人而與為禮士男子二十而冠。將冠。筮日於廟門。主人戒賓。冠日。初加緇布冠。再加皮弁。三加爵弁。有啐醴儀。賓字之。唐制。大夫冠禮三加。一品之子。以袞冕。逮九品之子。以爵弁。皆倣士禮而增益之。明洪武元年定制。始加緇布冠。再加進賢冠。三加爵弁。俱有祝辭。庶人。次幘頭巾帽。

大夫士婚禮

太古。男五十而娶。女三十而嫁。中古。男三十而室。女二十而嫁。王肅據孔子家語。服經等以為。男十六可娶。女十四可以嫁。三十二。言其極耳。夏小正記曰。二月娶妻之時。周制。仲春之月。會男女。鄭玄云。嫁娶必以仲春之月。王肅以為。秋冬嫁娶之時也。昏禮。納采。問名。納吉。納徵。請期。皆主人筮几於廟。而拜迎於門外。入揖讓而升。聽命於廟。所以敬慎。重正昏禮也。穀梁傳曰。禮。送女。父不下堂。母不出祭門。兄弟不出闔門。父戒之曰。謹慎。從爾舅之言。母戒之曰。謹慎。從爾姑之言。諸母般。擊字之誤歟申之曰。謹慎。周

制。凡公侯大夫士之婚娶者。用六禮。唐以後。儀物多以官品為降殺。明洪武五年。頒行儀制。凡為子聘婦。使媒氏通書。女氏許之。納采。入鴈及禮物。主婚者曰。某之子。弗嫻姆訓。既辱采擇。敢不拜嘉。復問名。主婚者以紅羅或銷金紙。書女之第行年歲。結吉。如納采儀。納徵。如納吉儀。加玄纁束帛。函書不用鴈。主婚者亦答以函書。請期。如納吉儀。親迎日。壻父告禰廟。父命之曰。躬迎嘉偶。釐爾內治。媒氏導壻之女家。執鴈者從壻。再拜奠鴈。壻既出。父命女。母又命之。女乘車。壻先還以俟。揖婦入。進酒饌。明日見廟。次見舅姑。舅前進棗栗。姑前進服脩。其日嫁家備饌。至婿家。婦進饌於舅姑。庶人婚禮。假九品服。納采納幣。請期。略倣品官之儀。親迎前一日。女氏使人。陳設於壻之寢室。俗謂之鋪房。至若告詞。醮戒。奠鴈合卺。並如品官儀。見祖禰舅姑禮。亦略相準。

皇帝多子

黃帝二十五子。周文王十子。秦始皇十八子。漢景帝十四子。光武十一子。



魏武帝二十五子。晉武帝二十六子。宋文帝十九子。孝武帝二十八子。明帝十二子。齊高帝十九子。武帝二十三子。明帝十一子。梁簡文帝二十子。陳文帝十三子。宣帝四十二子。陳後主二十二子。後魏道武帝十子。太武帝十一子。景穆帝十四子。齊神武帝十五子。唐太宗十四子。玄宗三十子。肅宗十四子。代宗二十子。德宗十一子。順宗二十七子。憲宗二十子。宣宗十一子。宋神宗十四子。徽宗二十一子。元世祖十子。皇明太祖二十五子。仁宗十子。憲宗十三子。

册太子及太子妃儀

漢代始稱皇太子。明帝始有臨軒册拜之儀。唐則年長者臨軒册授。幼者遣使內册。宋惟用臨軒。元惟用內册。不以長幼。明興異定制册皇太子。是日皇帝升奉天殿。太子入東門再拜。承制官曰有制。太子跪。宣制曰册長子某爲皇太子。太子再拜受册寶如儀。太子詣內殿。行朝謝禮四拜。見諸叔行家人禮四拜。見諸兄二拜。諸叔諸兄立受。宣德二年皇子生。三年行

禮。以太子幼。命正副使授册寶於文華門。嘉靖十八年。太子方二歲。保母奉之。迎册寶於文華門。詣皇帝前謝恩。皇后代太子八拜。詣皇后前。貴妃代八拜。擇日謁太廟。皇太子妃受册。與皇太子同。女官宣册授妃。妃四拜。正副使持節復命。是日妃具禮服。詣奉先殿。行謁告禮。皇帝皇后前謝恩八拜。皇太子前四拜。

皇太子納妃

歷代之制與納后。隋唐以後始親迎。天字臨軒醮戒。宋始行盥饋禮。明因之。洪武元年定制。凡行禮皆遣使持節。皇帝大婚儀。納采問名制曰奉制納某氏女爲皇太子妃。命卿等行納采問名禮云云。皇帝行醮戒禮。四年册常遇春女爲皇太子妃。禮部上儀注。太祖覽之曰贊禮不用笄。但用金盤翟。車用鳳轎。鴈以玉爲之。古禮有親迎執綏御輪。今用轎則揭簾是矣。其合昏依古制用匏。妃朝見入宮中乘小車。以帷幕蔽之。謁廟則皇太子俱往。禮成後三日。乃宴羣臣。命婦著爲令。百官朝賀致詞曰某官臣某等



恭惟皇太子嘉禮既成。益綿宗社隆長之福。臣某等不勝欣忭之至云云。

公主婚禮

古者天子嫁女。不自主婚。以同姓諸侯主之。故曰公主。唐猶以親王主婚。宋始不用。惟命掌婚者。於內東門納表。則天子自爲主矣。明因之。凡公主出降。行納采。問名。納吉。納徵。請期之禮。親迎日。壻公服。至內東門內入次。執鴈者從。公主禮服詣帝后前。四拜受爵。帝后訓戒。至內東門降輦。壻揭簾。公主陞轎。婿執鴈進於內使。再拜乘馬。還至府候於門。公主至。壻揭簾。公主降。同詣祠堂。壻東。公主西。皆再拜。合昏明日。見舅姑。四拜。舅姑答二拜。第十日。駙馬謝恩。行五拜禮。儀注雖存。其拜姑舅及公主駙馬相向拜之禮。終明之世。實未嘗行也。嘉靖年。給事中安磐等言。駙馬見公主。行四拜禮。公主坐受二拜。雖貴賤本殊。而夫婦分定。於禮不安。不聽。崇禎時。教習駙馬主事陳鍾盛言。駙馬於府門外月臺四拜。至三月後。始上堂視膳。於公主前。公主飲食。駙馬侍立。過此方議成婚。駙馬餽菓。書臣。公主答禮。書賜。皆大失禮。既合昏。則儼然夫婦。安有稱臣侍膳。然後成婚者。帝是其言。令即擇日成婚。凡選駙馬。禮部榜諭在京官員軍民子弟。年十四至十六。容貌齊整。行止端莊。有家教者。報名司禮內臣。於諸王館會選。不中則博訪於畿內山東河內。選中三人。領定一人。餘二人。送本處儒學充廩生。

文獻撮錄卷一終



文獻撮錄卷二目錄

歷代宗廟之制	漢宗廟之制
東漢宗廟之制	唐宗廟之制
宋宗廟之制	明宗廟之制
薦果之始	宋四時祭祀
梁四時祭祀	魏罷寒食祭
隋四時祭祀	唐四時祭祀
宋四時祭祀	統論宗廟之制
功臣配享之制	大夫士廟制
大夫士立主之禮	唐公卿立廟之制
歷代田賦之制	漢田賦之制
魏晉隋田賦之制	唐田賦之制

五代田賦之制	宋田賦之制
遼金田賦之制	元田賦之制
皇明田賦之制	歷代水田之制
歷代屯田之制	歷代籍田之制
歷代官田之制	歷代錢幣之制
宋明錢幣之制	宋明鼓鑄之數
宋明交鈔之法	歷代戶口數
歷代丁中賦役之法	歷代鄉黨職役之法
征權之法	權茶
征商	鹽鐵
坑冶	雜征斂
市	糴



文獻撮錄卷二

歷代宗廟之制

唐虞立五廟。始祖而五與夏氏因之。夏后氏世室。世室者宗廟也。爾雅室有世室。室者宗廟也。爾雅室有世室。室者宗廟也。爾雅室有世室。室者宗廟也。有東西廂曰廟。無東西廂有室曰寢。疏曰凡大室有東西廂夾室及前堂。令仲春云寢廟畢備。鄭注云前曰廟。後曰寢。以廟是接殷制。七世之廟。可神之處尊。故在前。寢衣冠所藏之處對廟為卑。故在後。殷制。七世之廟。可以觀德。周制。右社稷。左宗廟。小宗伯辨廟祧。昭穆。朱子曰。凡廟主在本廟之室中。皆東向。及其祫于太廟之室中。則唯太祖東向自如。而為最尊之位。群昭之入乎此者。皆列於北。羣穆之入乎此者。皆列於南。羣廟之列。則左為昭。右為穆。祫祭之位。則北為昭。而南為穆也。又曰。王制。天子七廟。三昭三穆。與太祖之廟而七。諸侯大夫士。降殺以兩。二昭二穆。為四親廟。高祖以上親盡。則毀而遞遷。古制。諸帝之廟各在一處。不容合。

為都宮。以序昭穆。韋元成傳曰。宗廟異處。昭穆不序。但考周制。先公廟在。無甚異。未詳其說。貢禹。章立成。康衡之徒。雖欲正之。而終不能盡合古制。

漢宗廟之制

漢高祖十年。令諸侯王皆立太上皇廟于國都。惠帝令郡諸侯王立高廟。叔孫通請原廟。原重也。先已有廟。今更立之。故云重也。文帝作顧成廟。應邵曰。文帝自為廟。成猶文王靈臺不日成之。故曰顧成。如淳曰。身存而為廟。若尚書之顧命也。景帝廟號德陽武帝廟號龍淵昭帝廟號徘徊宣帝廟號樂游元帝廟號長壽成帝廟號陽池。武帝六年。遼東高廟災。上素服五日。宣帝二年。有司請孝武宜加尊號。六月。尊孝武廟為世宗廟。奏盛德文始五行之舞。天子世世獻武帝巡狩所幸之郡國。皆立廟。元帝時。罷祖宗廟在郡國者。毀太上皇惠帝寢園廟。時祖宗廟在郡國百六十七所。而京師。自高祖下至宣帝。與太上皇。悼皇考。各自居陵旁立廟。并為百七十六。又園中各有寢便殿。師古曰。便殿者。皆非正大之處。寢者。即陵上正日祭於寢。月祭於廟。時祭於便殿。寢日四上食。廟歲二十五祀。便殿歲四祠。又月一游衣冠。而昭靈后。武



哀王。昭哀后。孝文太后。孝昭太后。衛思后。戾太子戾后。各有寢園。與諸帝合。凡三十所。一歲祠上食。二萬四千四百五十五。用衛士。四萬五千一百二十九人。祝宰樂人。萬二千一百四十七人。養犧牲卒。不在數中。元帝時。貢禹言。古者天子七廟。今惠景廟親盡。宜毀。郡國廟不應古禮。宜正定。至永光間。下詔罷之。

東漢宗廟之制

光武帝立高廟于洛陽。四時禘祀。高祖爲太祖。文帝爲太宗。武帝爲世宗。如舊餘帝。四時。春以正月。夏以四月。秋以七月。冬以十月及臘。一歲五祀。三年立親廟洛陽。祀父南頓君。以上至春陵節侯。後張純朱浮言。禮爲人後者。則爲之子。既事太宗。太宗謂元帝則降其私親。今禘禘高廟。陳序昭穆。而春陵四世君臣並列。以卑廁尊。不合禮意。宣帝以孫後祖。不敢私親。故爲父立廟。詔下公卿。大司徒戴涉。大司空竇融。議宜以宣元成哀平五帝四世代。今親廟。宣元皇帝尊爲祖父。可親奉祠。成帝以下。有司行事。別爲南

頓君立皇考廟。其祭上至春節侯。羣臣奉祠。上可之。明帝遺詔。無起寢廟。藏主於光烈皇后更衣別室。志云光武廟更衣續漢書。五年再殷祭。三年一禘。五年一禘。父爲昭南向。子爲穆北向。禘以夏四月。禘以冬十月。禘之爲言。諦諦審昭穆尊卑之義。禘者。合也。冬十月五穀成。故骨肉合飲食於祖廟。謂之殷祭。四時正祭外。有五月嘗麥。三伏立秋嘗棗盛酎。十月嘗稻等。謂之間祀。即各於更衣之殿。更衣者。非正處也。園中有寢。有便殿。寢者。陵上正殿。便殿。寢側之別殿。即更衣也。殤帝生二百餘日而崩。鄧太后攝政。以尙嬰孩。故不列於廟。就陵寢祭之而已。

唐宗廟之制

唐高宗追尊高祖以下。立四廟於長安通義里。太宗時。增修太廟。玄宗五年。太廟四室壞。上素服避正殿。開元十年。制創立太廟九室。天寶末。兩都傾陷。神主亡失。肅宗既克復。但建廟。作主於上都。其東都太廟。毀爲軍營。九室神主亡失。大曆間。始於人間得之。遂寓於太微宮。不復祔饗。自建中



至於會昌。議者不一。或以爲東西二京。宜皆有廟。而舊主當瘞。虛其廟。以俟巡幸。則載主而行。或爲宜藏神主於夾室。或曰周豐洛有廟者。因遷都。乃立廟爾。今東都不因遷而立廟。非也。又曰古者。載主以行者。惟新遷一室之主耳。未有載群廟之主者也。至武宗時。悉廢群議。詔有司擇日修東都廟。已而武宗崩。宣宗竟以太微神主。祔東都廟焉。

宋宗廟之制

宋太祖追尊高曾四代。備禮冊四親廟。奉安神主。行上諡之禮。太宗時。有司言。唐制。長安太廟凡九廟。同殿異室。其制二十一間。皆四柱。東西夾室各一。前後面各三階。東西各三側階。國朝太廟四室。室三間。今太祖升祔。共成五室。請依長安制。東西留夾室。外餘十間。分爲五室。室二間。從之。仍置尊號冊寶於室內。凡神御殿者。古之原廟。天聖初。知制誥張師德。奉安太祖太宗御容于鴻慶宮。迎景靈宮。眞宗御容。奉安于西京應天院。酌獻。二年。奉安塑像及玉石像。五年。天章閣迎御容。奉安慈孝寺崇眞殿。御

飛白書額。太后塑像侍側。後葺重徽隆福殿。奉安明德元德章穆皇后御容。范鎮言。祖宗御容。非郡國所宜奉安。英宗治平初。景靈宮西園。作仁宗神御殿。奉安御容。帝親行酌獻。命大臣分詣諸神御。代行禮。翌日。皇太后酌獻。自渡江後。行在靡有定所。神御奉安它州。朝獻遣官分詣。至紹興時。和議成。駐蹕臨安。始備太廟原廢之制。建炎以來。國朝宗廟之制。太廟以奉神主。一歲五享。朔祭而月薦新。五享以宗室諸王。朔祭以太常卿行事。景靈宮以奉塑像。歲四孟享。上親行之。帝后太忌。則宰相率百官行香。僧道士作法事。而后妃六宮。皆亦繼往天章閣。以奉畫像。時節朔望。帝后生辰日。皆偏薦之。內臣行事。欽先孝思殿。亦奉神御。上日焚香。而諸陵之上宮。亦有御容。時節酌獻。如天章閣。每歲寒食及十月朔。宗室內人。各往朝拜。春秋二仲。太常行園陵。季秋。監察御史檢視。太廟之祭。以俎豆。景靈宮用牙盤。而天章閣等。以常饌。用家人之禮。徽宗時。詔仁宗神考廟。永祀不祧。



明宗廟之制

明太祖作四親廟於宮城東南各爲一廟。皇高祖居中。曾祖東。祖西。考東。皆東向。每廟中室奉神主。東西兩夾室。旁兩廡三門。門設二十四戟。外爲都宮正門之南齋次。其西饌次。俱五間北向。門之東。神厨五間西向。其南。宰牲池一。南向。洪武元年。太祖曰。近世泥古。好用古籩豆之屬。以祭其先。生既不用。死而用之。甚無謂也。其製宗廟器用服御。皆如事生之儀。於是造銀器以金塗之。酒壺孟觶皆入朱漆。盤盃二百四十。及桴。棊。枕。簞。篋。笥。幔。幃。浴室。皆具。後又詔。器皿以金塗銀者。俱易以金。二年。詔。太廟祝文。止稱孝子皇帝。不稱臣。凡遣皇太子行禮。止稱命長子某。勿稱皇太子。後稱孝元孫皇帝。又改稱孝曾孫嗣皇帝。初。太廟每室用幣一。二年。從禮部議。用二白繒。又從尙書崔亮奏。作圭瓚。八年。改建太廟。前正殿。後寢殿。翼皆有兩廡。寢殿九間。間一室。奉藏神主。爲同堂異室之制。每歲四孟及歲除。凡五享。命孟春。特祭於各廟。三時及歲除。則禘祭於德祖廟。二年。定時享

之制。春以清明。夏以端午。秋以中元。冬以冬至。歲除如舊。禮部尙書崔亮言。孟月者。四時之首。因時變致孝思。故備三牲黍稷品物以祭。至仲季之月。不過薦新而已。既行郊祀。則廟享。舉宜改從舊制。其清明等節。各備時物以薦。從之。孟春。擇上旬日。三孟用朔日。及歲除。皆合享。自是五享皆罷。特祭而行合配之禮。三年。太祖以太廟時享未足以展孝思。復建奉先殿於宮門內之東。以太廟象外朝。以奉先殿象內朝。正殿五間。南面。前軒五間。製四代帝后神位衣冠。定儀物祝文。每月朝。晡。帝及皇太子諸王二次朝享。皇后率嬪妃。日進膳羞。諸節致祭。月朔薦新。又考皇考妣忌日。歲時享祀。以爲常。成祖遷都北京。建如制。嘉靖十四年。定內殿之祭。清明。中元。聖誕。冬至。正朝。有祝文。樂如宴樂。兩宮壽朝。皇后并妃嬪生日。皆有祭。無祝文。樂。立春。元宵。四月八日。端陽。仲秋。重陽。十二月八日。皆有祭。用時食。舊無祝文。今增告祠。就位四拜。獻帛爵祝畢。后妃助亞獻。執事終獻。撤饌。又四拜。奉慈殿。孝宗即位。追上母妃孝穆太后紀氏諡。祔葬茂陵。以不



得祔廟。遂於奉先殿右。別建奉慈殿以祀。一歲五享。薦新忌祭。俱如太廟奉先殿儀。

薦果之始

漢惠帝時。叔孫通。古者有春嘗果。方今櫻桃熟。可獻。遂獻宗廟。諸果之獻。由此興。

宋四時祭祀

宋四時祭祀。將祭。必先夕牲。皇帝散齋七日。致齋三日。百官將事者。亦如之。

梁四時祭祀

梁武帝制春祠。夏禱。秋嘗。冬蒸。并臘。一歲凡五。謂之時祭。

魏罷寒食祭

魏孝文帝。四時常祀。以孟月。皆親祭。詔罷寒食饗。致堂胡氏曰。四時之祀。天子用孟月。禮之正也。若寒食。其始既不出於先王。其節或跨乎仲季。非天子之所宜行也。苟以爲祖宗常行。有其舉之。莫敢廢也。蓋亦擇禮之中。否。而行之歟。寒食之祀。始於晉人。思介之推之焚死。爲之不火食。然則有天下國家者。以是日祀其祖考。可謂不經之禮。雖祖考行之。而未暇革。今而革之。去非以從是。何不可之有。魏孝文。斷然行之。不膠者卓矣。

隋四時祭祀

隋四時之祭。各以太牢。四時薦新於太廟。有司行事。而不出神主。祔禘之禮。並准時享。

唐四時祭祀

唐四時。各以孟月。享太廟。室各用一太牢。若品物時新。堪進御者。有司先送太常。令尙食相知。簡擇。務令潔淨。仍以滋味與新物相宜者配之。太常卿及少卿一人。奉薦太廟。有司行事。不出神主。仲春薦冰。亦如之。開元間。大祭。差丞相特進少保少傅尙書賓客御大夫攝行。貞觀六年。監察御史馬周上言。陛下踐祚以來。宗廟之享。未曾親事。遂使大唐一代之史。不書



皇帝入廟之事。將何以貽厥孫謀。垂則末葉。太宗親饗廟。崔沔議曰。毛血盛於槃。宋書志。南郊以二陶豆盛毛血。開元開寶通禮。及今儀註。皆以豆盛之禮。以豆盛菹醢登盛羹。其毛血當以槃。

宋四時祭祀

宋制。太廟歲以四孟月。及季冬凡五享。朔望薦食薦新。三年一禘以孟冬。五年一禘以孟夏。開寶初。上親享太廟。見所陳籩豆簠簋。問曰。此何物也。左右以禮器對。上曰。吾祖宗寧識。亟命撤去。進常膳如平生。既而曰。古禮不可廢也。命復設之。於是判太常寺和峴言。按唐天寶中。享太廟。禮料外。每室加常食一牙盤。五代以來。遂廢其禮。今請如唐故事。乃詔別設牙盤食。禘祫時享。皆用之。

統論宗廟之祭

古者宗廟之祭。有正祭。有告祭。皆人主親行其禮。正祭。則時享禘祫是也。告祭。則國有大事。告于宗廟是也。自漢以來。禮制隳廢。郊廟之祭。人主多不親行。至唐中葉以後。始定制。於三歲一郊祀之時。前二日朝享太廟。此乃告祭禮。若正祭。則未嘗親行。禘祫大禮。亦命有司攝事。果朝惟仁宗嘉祐四年十月。親行禘祭禮一次而已。蓋法駕屬車。其鹵簿鄭重。裸薦升降。其禮節繁多。故三歲享帝之時。僅能舉一親祠。然告祭之事。亦有大於祀天者。如即位而告廟。則自舜禹受終。以至太甲之見祖。成王之見廟。皆是也。雖西漢時。人主每嗣位。亦必有見高廟之禮。而自唐以來。則人主未嘗躬謁宗廟致祭。以告嗣位。宋朝惟孝宗光宗。以親受內禪。特行此禮。而其它。則皆以喪三年不祭之說。爲拘。不復舉行。然自以日易月之制既定。諒闇之禮廢久矣。何獨於嗣位告祭一事。以爲不可行乎。

功臣配享之制

周禮。夏官司勳。王功曰勳。國功曰功。民功曰庸。事功曰勞。治功曰力。戰功曰多。凡有功者。銘書于正之太常。祭於太蒸。司勳詔之。漢制。祭功名於庭。生時侍謙於堂。死則降在庭。位與士庶爲列。唐太宗貞觀禮。祫享。功臣配



享於廟庭。禘享則不配。後令禘之日。功臣並得配享。

大夫士廟祭

大夫三廟。士一廟。庶人於寢。朱子語錄。問官師一廟。若只是一廟。只祭得父母。更不及祖矣。母乃不近人情。曰位卑則澤淺。其理自當如此。曰。今雖士庶人家。亦祭三代。如此却是違禮。曰。雖祭三代。却無廟。亦不可謂之僭。古之所謂廟者。其體面甚大。皆有門堂寢室。如所居之宮。非如今人。但以一室爲之。有問程子曰。今人不祭高祖如何。曰。高祖自有服。不祭甚非。某家却祭高祖。又曰。自天子至於庶人。五服未嘗異。皆至高祖。服既如是。祭祀亦須如是。其疏數之節。未有可考。但其理必如此。七廟五廟。亦只是祭及高祖。大夫士雖式三廟二廟一廟。或祭寢廟則雖異。亦不害祭及高祖。若止祭禰。是爲知母而不知父。禽獸道也。祭禰不及祖。非人道也。朱子曰。程子之言。最爲得祭祀之本意。禮家言。大夫有事。省於其君。干祫及其高祖。此則可爲立三廟。而祭及高祖之驗。但干祫之義。它有可考耳。馬端臨

曰。自天子以至於士。五服之制則同。而祭祀止及其立廟之親。則大夫不祭其高曾。士不祭其祖。非人情也。程子以爲有服者皆不可不祭。其說當矣。愚又嘗攷之經禮。叅以諸儒注疏之說。然後知古今異宜。禮緣人情。固當隨時爲之損益。不可膠於一說也。

大夫士立主之禮

後漢許慎五經異義。或曰。卿大夫士有主否。荅曰。按公羊說。卿大夫非有上之君。不得祫享昭穆。故無主。大夫束帛依神。士結茅爲菴。晉人問蔡謨云。時人祠有板。板爲用當主。爲是神坐之榜。題謨答。今代有祠板木。乃始禮之奉廟主也。主亦有題。今版書名號。亦是題主之意。安昌公荀氏。桐制神板。皆正長尺一寸。博四寸五分。厚五寸八分。大書某祖考某封之神座。夫人某氏之神座。以下皆然。書訖。蠟油炙令入理。刮拭之。後魏清河王懌議曰。原夫作主之禮。本以依神。孝子之心。非主莫展。今銘旌紀柩。設重憑神。祭必有尸。神必有廟。皆所以展事孝敬。想像乎存。上自天子。下達於士。



如此四事。並同其禮。何至於主。惟謂王侯若位擬諸侯者。則有主。位為大夫者。則無主。是使三神有主。一位獨闕。求諸情禮。實未安。宜通為主。以銘神位。

唐公卿立廟之制

唐制。一品二品四廟。三品三廟。五品二廟。嫡士一廟。庶人祭於寢。及開元定禮。二品以上四廟。三品三廟。四五品有兼爵。亦三廟。六品以下達於庶人。祭於寢。

歷代田賦之制

夏五十而貢。殷七十而助。周百畝而徹。秦使黔首自實田。蓋古者因地而稅。秦壞井田。任民所耕。不計多少。以為賦歛。其後遂舍地而稅人。或耕豪民之田。見稅十五。十分之五輸田主也。漢興循以未改。

漢田賦之制

漢高祖輕田租。十五而稅一。文帝恭儉節用。除民田租稅者至十餘年。景

帝二年。令民再出田租。三十而稅一。武帝元封後。幸行所過縣。毋出當年租賦。昭帝元年。除今年民租。六年。令民得以律占租。武帝時賦歛頗多律外而取之今始復舊宣帝元年。勿收天下租稅。自是至平帝末。郡國被災害。什四以上。毋收田租。東漢初。郡國田租。三十而稅一。如舊制。章帝三年。度田為三品。分別肥瘠各立之。簿桓帝八年。畝稅歛錢。畝十錢也乃出於常賦三十取一之外。今所謂稅錢。始此。

魏晉隋田賦之制

魏武初。畝粟四升。戶絹二疋。而綿二斤。晉武帝置戶調之式。丁男之戶。歲輸絹三疋。綿三斤。女及次丁男為戶者。半輸。至隋文帝。征稅之法。屢變。

唐田賦之制

唐高祖二年。制每丁租二石。絹二疋。綿三兩。七年。定均田賦稅。男丁十八以上者。給田一頃。廢疾。給四十畝。寡妻妾。三十畝。若為戶者。加二十畝。皆以二十畝為永業。其餘為口分。永業之田。凡授田者。丁歲輸粟二石。謂之



租丁。隨鄉所出。歲輸絹綾緹各二丈。布加五之一。綿二兩。輸布者。麻三斤。謂之調。用人之力。歲二十日。閏加二日。不役者。日爲絹三尺。謂之庸。有事而加役二十五日。免調三十日。租調皆免。代宗時。以江淮租調之違負。及逋逃者。計其大數而徵之。豪吏察民有粟帛者。發徒圍之。籍其所有。而中分之。謂之白著。不服者嚴刑。民相聚爲盜。詔天下。一畝稅錢十五。以國用急。苗方青則徵之。號青苗錢。德宗時。楊炎爲相。作兩稅法。夏輸無過六月。秋輸無過十一月。置兩稅使以總之。凡百役之費。先度其數。而賦於人。量出制入。戶無主客。以見居爲簿。人無丁中。以貧富爲差。不居處而行商者。在所州縣。稅三十之一。度所取與居者均。使無僥利。其租庸雜徭悉省。而丁額不廢。其田畝之稅。以大曆十四年墾田之數爲定。而均收之。遣黜陟使。按諸道丁產等級。免鰥寡。獨不齊者。敢加歛。以枉法論。舊制。三百八十萬五千。使者按得主戶三百八十萬。客戶三十萬。天下之民。不土斷而地著。不更版籍。而得其虛實。歲歛錢二千五十餘萬緡。米四百餘斛。以供

外錢九百五十餘萬緡。米千六百餘萬斛。以供京師。天下便之。議者以爲。祖庸調。高祖太宗之法。不可輕改。而帝方任災。乃行之。自是吏姦無所容。輕重之權。始歸朝廷矣。至穆宗時。當時爲絹二疋半者。爲八疋。大率加三倍。豪家大商。積錢以逐輕重。故農人日困。末業日增。帝亦比貨輕錢重。民困而用不充。詔百官議革其弊。

五代田賦之制

後漢隱帝時。三司使王章。聚歛刻急。舊制。田稅每斛。更輸二斗。謂之雀鼠耗。章始令更輸二斗。謂之省耗。舊錢出入。皆以八十爲陌。章始令入者八十。出者七十七。謂之省陌。

宋田賦之制

宋太祖元年。遣使度民田。五代以來。常檢視墾田。以定歲租。吏緣爲姦。稅不均適。上憫之。許民闢土。州縣無得檢括。止以見佃爲額。又命課民種樹。每縣定式。籍爲五等。第一等種雜樹百。每等減二十爲差。桑棗半之。令佐



春秋巡視。開寶元年。詔諸倉場受納所收頭子錢。一半納官。一半公用。令監司知州通判同支使。頭子錢納官。始於此。止齋陳氏曰。是歲令川陝八戶兩稅以上輸納錢帛。每貫收七分。每疋收一文。絲綿一兩。茶一斤。秤草一束。各一文。是爲頭子錢。八年。詔民稅紬絹不滿疋者。許計丈尺納價錢。毋得以三戶五戶聚合成疋。送納煩擾。仁宗寶元中。詔諸州旬上雨雪。著爲令。皇祐中。作寶岐殿於苑中。每歲詔輔臣觀刈穀麥。神宗熙寧二年。分遣諸路常平官。使傳領農田水利事。應吏民能知土知種植之法。陂塘圩埤堤堰溝洫之利害者。皆得自言之。有效。隨大小酬賞。五年。重修定方田法。八月。詔司農以均稅條約并式。頒之天下。以東西南北各千步。當四十一頃六十六畝。一百六十步。爲一方。歲以九月。縣委令佐。分地計量。隨陂原平澤。而定其地。因赤游黑壚。而辨其色。方量畢。以地及色。參定肥瘠。而分五等。以定稅則。至明年三月。畢。揭以示民。元豐間。天下墾田之數。總四京八路田。四百六十一萬六千五百五十六頃內。民田。四百五十五萬三千一百六十三頃六十一畝。官田。六萬三千三百九十三頃。孝宗初。州縣受納青苗。官吏並緣多收加耗。規度濫數。肆爲奸欺。虛印文鈔。給與人戶。民間相傳謂之白鈔。方時艱虞。用度未足。欲減常賦。而未能。豈忍使貪賊之徒。重爲民蠹。今後違犯官吏。並坐重典。理宗元年。詔諸路受納苗米。不許過數增入。多量斗面。

遼金田賦之制

遼聖宗。詔定均稅法。金之田制。以營造尺五尺爲步。濶一步。長二百四十步。爲畝。百畝爲頃。民田業。各從其便。賣質與人無禁。但令隨地輸租而已。其租稅法。官地輸租。私田輸稅。租之制不傳。大率分田之等。爲九而差次之。夏稅。畝取三合。狄稅。畝取五升。又納秸一束。束十有五斤。夏稅。六月止。八月。秋稅。十月止。十二月。非時之災。損十之八者。全免。七分。免所傷之數。桑被災不能蠶。則免絲綿絹稅。

元田賦之制

元之取民。大率以唐爲法。其取於內郡者。曰丁稅。曰地稅。此倣唐之租庸



調也。取於江南者。曰秋稅。曰夏稅。此倣唐之兩稅也。丁稅地稅之法。自太宗始行之。至丙申年。乃徵科徵之法。令諸路驗民戶成丁之數。每丁歲科粟一石。驗丁五升。新戶丁驗各半之。老幼不與。其間有耕種者。或驗其牛具之數。或驗其土地之等徵焉。丁稅少而地稅多者。納地稅。地稅少而丁稅多者。納丁稅。工匠僧道。驗地。逮及世祖。申明舊制。官吏商賈。驗丁。於是輸納之期。收受之式。關防之禁。會計之法。莫不備焉。

皇明田賦之制

明太祖覈實天下田土。乃集糧長暨耆民。躬履田畝。以量度之。遂圖其田形之方圓大小。次書其主名及田之四至。編彙為冊。號曰魚鱗冊。令官田起科。每畝五升三合五勺。民田每畝三升三合五勺。重租田每畝八升五合五勺。蘆地每畝五合三勺四抄。草場地每畝三合一勺。沒官田每畝一斗二升。民田以萬石為率。置糧長。每品設正副二名。專督其鄉賦稅。國初田賦總數。十二布政司並直隸府州縣。共田八百四十九萬六千五百二十三頃畝零。夏稅米麥。四百七十一萬二千九百石。錢鈔。三萬九千八百錠。絹二十八萬八千四百八十七疋。秋糧米。二千四百七十三萬四千五百十石。錢鈔。五千七百三十錠。絹五十九疋。洪武迄弘治百四十年。天下額田。已減強半。至神宗萬曆間。十三布政司並直隸府州田土總計。田七百一萬三千九百七十六頃二十八畝。凡民間賦稅。自有常額。諸人不得於諸王駙馬。功勳大臣。及各衙門。妄獻田土。山場窑冶。遺害於民。又令諸處荒閑田地。許諸人開墾。永為己業。俱免雜泛差科。三年後。並依民田起科稅糧。國初。秋夏稅糧。每歲徵收。必先預為會計。除對撥官軍俸糧。並存留學糧。廩給孤老口糧。及常存軍衛二年糧斛。以備支用外。餘糧通行。定奪立案具奏。

歷代水田之制

魏史起。為鄴令。曰。魏氏之行田也。以百畝。賦田之法。一夫百畝。鄴獨二百畝。是田惡也。漳水在其傍。西門豹不知用。乃引漳水溉鄴。民歌曰。終古瀉鹵兮。生稻



梁韓欲疲秦人。使水工鄭國。說秦開涇水。注三百里。溉田。中作而覺。秦欲殺國。國曰。始臣為間。然渠成亦秦利也。渠成溉四萬餘頃。收皆畝一鍾。關中為沃野。名曰鄭國渠。秦李冰為蜀守。穿二江。成都中。灌溉諸郡。蜀沃野千里。號為陸海。漢武帝開渭渠。龍首渠。白渠。東漢順帝時。馬臻為會稽太守。始立鏡湖築塘。周回三百十里。灌田九千頃。至今人獲其利。晉武帝時。東南水災。杜豫請決壞諸陂。從之。馬端臨曰。水利之說。三代無有也。方井二尋。謂之澮。時其蓄洩。以備水患。子產相鄭。必使田有封洫。自秦人開阡陌。溝洫之制壞。智者因水。溉田而水利之。說與水就下者也。陂而遏之。利於旱。澮則唐太宗時。楊州築白城塘。玄宗時。三輔諸渠。王公之家。緣渠立磴。以害水田。一切毀之。宋太宗於河北諸州。置水利田。興堰六百里。置斗門灌溉。神宗時。遣使察農田水利。勸誘興修塘堰圩堤。元世祖時。懷孟路旱。令民鑿塘造渠。因沁水以溉田。明太祖濬涇陽等五縣渠堰。民獲其利。世宗時。汪鉉奏請興水利。

歷代屯田之制

漢昭帝時。發習戰射士。調故吏將屯田。張掖郡。宣帝時。趙充國擊先零羌。罷騎兵屯田。以待其弊。東漢邊郡。置農都尉。屯田殖穀。蜀漢諸葛亮。由斜谷伐魏。亮以前者數出。皆以運糧不繼。使己志不伸。乃分屯田。為久駐之計。耕者雜於謂濱居民之間。而百姓按堵。軍無私焉。唐開軍府。以扞要衝。因隙地置營田。天下屯總九百九十二。司農寺因屯三頃。州鎮諸郡。每屯五十頃。水陸腴瘠。播植地宜。與其功庸煩省。收率之多少。皆決於尙書省苑內屯。以善農者。為屯官。屯副。上地五十畝。瘠地二十畝。稻田八十畝。給牛一。宋太祖時。置河北等路。招致營田使。天禧末。諸州屯田。總四千二百餘頃。而河北屯田。歲收二萬九千四百餘石。神宗時。詔熙河路。有弓箭手耕種不及之田。經略安撫使。權點廂軍田之官。置牛具農器。人給一頃。歲終。叅較弓箭手廂軍所種。孰為優劣。以行賞罰。寧宗時。諸州夏秋輸租。十四萬一千餘石。元憲宗時。置經略司于汴。分兵屯田。敵至則戰。退則耕。西起襄鄧。東連清口桃源。列障守之。左右中前後衛等諸衛。皆有屯田。為樞



密院所轄諸路各有屯田。爲大農司宣徽院腹裡所行中書省及行省所轄。皇明每軍種田五十畝爲一分。或有多寡不等者。大率衛所軍士以三分守城。七分屯種。又有二八一九四六中半等例。皆隨地而異。其耕種器具牛隻皆給牛官。官給牛種者十稅其五。自具牛種者稅其四。各處屯田肥瘠不同。所獲亦異。考較之法。宜有等差。成祖時欲廣遼東屯田。命禮部索耕牛于朝鮮。朝鮮國王遣使送耕牛萬頭至遼東。命戶部每一頭酬絹一疋。仍賜王紋綺表裡各百疋。勅遼東都司分給屯田。

歷代籍田之制

月令孟春之月。天子乃擇元辰。親載耒耜。措之于叅保介之御間。三公九卿諸侯大夫躬耕帝籍。天子三推。三公五推。卿諸侯九推。反執爵于大寢。三公九卿諸侯大夫皆御命曰勞酒。漢文帝二年詔曰。夫農天下之本也。其開籍田。朕親率耕。以給宗廟粢盛。十三年詔皇后親桑。以奉祭服。其具禮儀。景帝親耕籍田。昭帝耕于上林。東漢禮儀志正月始耕。晝漏上水初

納執事告祠。先農已享。耕時。有司請行事。就耕位。天子三公九卿諸侯以次耕。力田種各稷訖。有司告事畢。魏制。天子親耕籍田。晉武帝躬耕籍田于東郊。唐太宗籍田于千畝之甸。宋太宗親耕籍田。

歷代官田之制

詩曰。雨我公田。惟助爲有。公田。漢武帝罷苑馬。以賜民爲田。宣帝假郡國貧民田。又詔池籬未御幸者。假與貧民。又令流民還歸者。假公田貸種食。東漢明帝詔郡國以公田賜貧民。各有差。章帝詔月令孟春。善相邱陵土地所宜。今肥田尙多。未有墾闢。其悉以賦貧民。給與種糧。務盡地力。勿令游手。宋仁宗時。福建八州各納租課。皇明時。有皇莊及宮莊田。

歷代錢幣之制

自太昊以來有錢矣。太昊氏高陽氏謂之金。有熊氏高辛氏謂之貨。陶唐氏謂之泉。商人齊人謂之布。齊人莒人謂之刀。神農列鄺於國。以聚貨帛。日中爲市。以交有無。虞夏商之幣。金爲三品。或黃或白或赤。或錢或布。或



刀或龜具。管子曰。湯七年旱。禹五年水。人之無糧。有賣子者。湯以莊山之金鑄幣。而贖人之無糧。賣子者。禹以歷山之金鑄幣。以救人之困。夫玉起於禹氏。金起於汝漢。珠起於赤野。東西南北去周七八千里。水絕壤斷。舟車不能通。為其道之遠。其至之難。故託用於其重。以珠玉為上幣。以黃金為中幣。以刀布為下幣。三幣握之。則非有補於暖也。食之。則非有補於飽也。先王以守財物。以御人事。而平天下也。是以命之曰衡。衡者。使物一高一下。不得有調也。周制。以商通貨。以賈易物。太公又立九府圜法。周官有太府外府。泉府。天府。職內。職幣。職金。皆掌財幣之官。故云九府。圜謂均而通也。黃金方寸而重一斤。錢圓函方。輕重以銖。

布帛廣二尺二寸為幅。長四丈為疋。故貨寶於金。利於刀。流如泉。布於布。束於帛。周官司市。國凶荒。則市無征而作布。置錢以饒民。周景王患錢輕。更鑄大錢。徑一寸二分。重十二銖。文曰大泉五十。肉好皆有周郭。秦兼天下。幣為二等。黃金銖二十兩為上幣。銅錢。質如周錢。文曰半兩。重如其文。而珠玉龜貝銀錫之屬。為器飾寶臧。不為幣。然各隨時而輕重無常。漢興。以為

秦錢重難周。更令民鑄莢錢。文帝時。為錢益多而輕。乃更鑄四銖錢。其文為半兩。除盜鑄錢。使民放鑄。景帝定鑄錢偽黃金律。武帝行三銖錢。以經錢易作奸詐。乃鑄五銖。周郭其質。令不得磨錢取鋸。元鼎年。令京師鑄官赤仄。以赤銅為其郭也。一當五。民不便。又廢。平帝時。錢二百八十億萬餘云。王莽變漢制。以周錢有子母相權。更造大錢。徑寸二分。重十二銖。東漢世祖。行五銖錢。天下賴其便。吳孫權鑄一當五百錢。錢既太貴。但有空石。人間患之。權鑄為器物。唐高祖廢五銖錢。鑄開通元寶。每十錢重一兩。計一千。重六斤四兩。得輕重大小之中。鄭虔粹云。歐陽詢製錢文書之字。含甲跡。故錢上有指文。每兩二十四銖。則一錢重二銖半。以下古秤比。今乾封時。私錢犯法。日蕃。有以舟筏鑄江中者。詔所在納惡錢。而姦亦不息。玄宗時。宰相宋璟。請禁惡錢。肅宗時。戶部侍郎第五琦。請鑄乾元重寶錢。徑一寸。每緡重十斤。以一當十。與開元通寶參用。及琦為相。又鑄重輪乾元錢。一當五十。每緡重十二斤。與三品錢並行。法既屢易。物價騰踴。代宗時。



大小錢皆以一當一。人甚便之。武宗時。許諸道觀察使。皆得置錢坊。淮南節度使李紳。請天下以州名鑄錢。京師爲京錢。大小徑寸。如開元通寶。

宋明錢幣之制

宋初。錢文曰宋元通寶。太平興國後。又鑄太平通寶錢。太宗親書淳化元寶。但真作草三體。自後每改元。必更鑄。以年號元寶爲文。乾德五年。禁輕小惡錢。限一月送官。凡鑄銅錢有四監。饒州曰永平。池州曰永豐。江州曰廣寧。建州曰豐國。每千文。用銅三斤十兩。鉛一斤八兩。錫八兩。成重五斤。惟建州增銅五兩。減鉛如其數。至道中。歲鑄八十萬貫。景德中。至一百八十三萬貫。大中祥符後。銅坑多不發。天禧末。鑄一百五萬貫鐵錢。有三監。邛州有惠民。嘉州有豐遠。興州有濟衆。大錢貫重十二斤兩。以准銅錢。歲總鑄二十一萬餘貫。皇明太祖洪武初。置寶源局於府天府。鑄大中通寶錢。與歷代錢兼行。以四百爲一貫。四十爲一兩。四文爲一錢。設官專管。江西等行省。各置貨泉局。頒大中通寶大小五等錢。設官鑄造。成祖鑄永樂

通寶。宣宗鑄宣德通寶。孝宗鑄弘治通寶。世宗鑄嘉靖通寶。穆宗鑄隆慶通寶。神宗鑄萬曆通寶。

宋明鼓鑄之數

宋諸路鑄錢。總二十六監。每年鑄銅鐵錢。五百四十九萬九千二百三十四貫。明北平爐座二十一。廣西十五。陝西三十九。廣東十九。四川十。山東二十二。山西四十。河南二十二。浙江二十一。江南百十五。每歲鑄錢有定數。

宋明交鈔之法

宋時。有交子務。錢引務。會子務。見錢關子。及交鈔等法。官印文行之。明初。寶鈔通行民間。與銅錢兼使。立法甚嚴。其後鈔賤不行。而法尙存。其折祿折捧罪贖。及各項則例。輕重不等矣。太祖洪武八年。令中書省。造以青色爲質。外爲龍文花欄。橫題其額曰大明通行寶鈔。內上兩旁。復爲篆文八字曰大明寶鈔。天下通行。中圖鈔貫狀十患。則爲一貫。其下曰戶部奏准



印造大明寶鈔。與錢通行。宋馬端臨曰。按錢幣之權。當出於上。則造錢幣之司。當歸于一。漢時。常令民自鑄錢。及武帝。則專令上林三官鑄之。而天下非三官。錢不得行。郡國前所鑄錢。皆廢。銷輸其銅。三官。然錢以銅鐵鉛錫而成。而銅鐵鉛錫。搬運重難。是以歷代多即坑冶附近之所。置監鑄錢。亦以錢之直日輕。其用日廣。不容不多置監治鑄。以供用。中興以來。始轉而爲楮幣。夫錢重而直小。則多置監以鑄之可也。楮輕而直多。則就行都印造足矣。今既有行在會子。又有川引。淮引。湖會。各自印造。而其末也。收換不行。稱提無策。何哉。蓋置會子之初意。本非即以會爲錢。蓋以茶鹽鈔引之屬。視之而暫以權錢耳。然鈔引則所直者重。而會子則止於一貫。下至三百二百鈔引。只令商人。憑以取茶鹽香貨。故必須分路會子。則公私買賣支給。無往不用。且自一貫造至二百。則是明之以代見錢矣。又况尺楮而代數斤之銅。賚輕用重。千里之遠。數萬之緡。一夫之力。剋日可到。何必川自川。淮自淮。湖自湖。而使後來。或廢或用。號令反覆。民聽疑惑乎。蓋

兩淮荆湖所造。朝廷初意。欲暫用而即廢。而不知流落民間。便同見錢。所以後來。收換生受。只得再造。遂愈多而愈賤。亦是立法之初。講之不詳。故也。

歷代戶口之數

禹平水土爲州。人口千三百五十五萬三千九百二十三。塗山之會。諸侯執玉帛者萬國。及諸侯相兼。逮湯受命。存者三千餘國。周武王列五等之封。千七百七十三國。人衆之損。亦如之。周公相成王。致理刑措。人口千三百七十萬四千九百二十三。漢自高祖。訖於孝平。民戶千二百二十三萬二千六十二。口五千九百五十九萬四千九百七十八。東漢明帝時。戶五百八十六萬百七十三。口三千四百十二萬五千二十一。桓帝時。戶千六百七萬九百六。口五千六萬六千八百五十六。魏武帝時。戶六十六萬三千四百二十三。口四百四十三萬二千八百八十一。蜀漢。戶二十萬。口九十萬。吳。戶五十二萬。口二百三十萬。晉武帝時。戶二百四十五萬九千八



百四。口千六百十六萬三千八百六十三。宋孝武時。戶九十萬六千八百七十。口四百六十八萬五千五百一。齊梁未詳。陳後主時。戶五十萬。口二百萬。隋煬帝時。戶八百九十萬七千五百三十六。口四千六百一萬九千九百五十六。唐玄宗時。管戶總八百九十一萬九千三百九。不課戶。三百五十六萬五千五百。應課戶。五百三十四萬九千二百八。管口總五千二百九十一萬九千三百九。不課口。四千四百七十萬九百八十八。課口。八百二十萬八千三百二十一。宋神宗時。主客戶一千七百二十一萬一千十三。口二千四百九十六萬九千三百。寧宗時。戶一千二百六十七萬八百一。口二千八百三十二萬八千五百五。元世祖時。戶一千一百六十三萬三千二百八十一。口五千三百六十五萬四千三百三十七。皇明時。戶總計一千六十五萬二千八百七十。口總計六千五十四萬五千八百二十一。

歷代中丁賦役之法

周載師。凡民無職事者。出夫家之征。夫稅者百畝之稅。家稅者出土徒車輦給徭役。橫渠張氏曰。夫家之征。疑

無過家一人者。謂之夫。餘夫。謂家閭師。凡無職者。出夫布。蓋古人於游惰。或三人。或二人。或二家。五人。謂家閭師。凡無職者。出夫布。蓋古人於游惰。不耕及商賈末作之人。皆於常法之外。別立法以抑之。征者。所以抑之也。夫布。其常也。均人。掌均人民牛馬車輦之力政。政。讀為征。人民。則治城郭。塗巷溝渠。牛馬輦轉。委積。屬之。凡均力政。以歲上下。豐年則公旬用三日焉。中年則公旬用二日焉。無年則公旬用一日焉。凶札則無力政。王制。用民之力。歲不過三日。秦用商鞅之法。月為更卒。已復為正。一歲屯戍。一歲力役。三十倍於古。更卒。謂給而更者。正卒。謂給中郡官者也。漢興。循而未改。漢高祖。初為算賦。六年十五以上至五十。為一戶口之賦。始於此。惠帝。令民女子年十五以上。至三十不嫁。五算。文帝。丁男三年而一事。常賦。歲一事。景帝。令民年二十始傅。傅。著也。言著名。漢儀注。民年二十三。為正一歲。為衛士一歲。為材官騎士。習射御。馳戰陳。年五十六。乃免為庶民。就田里。則知漢初。民在官三十有三年也。今景帝。更為異制。令男子年二十始傅。則在官三十有六年矣。武帝。詔民年八十。復二算。二口之算也。所巡縣。無出今年算。宣帝。減民算三十。東漢章帝。詔人無田



徙他界者。除算三年。令人之有產子者。復勿算三歲。令諸懷妊者。賜胎養穀人三斛。復其夫。勿算一歲。著以爲令。隋文帝頒新令。男女三歲以下爲黃。十歲以下爲小。十七歲以下爲中。十八歲以上爲丁。以從課役。六十爲老。乃免。唐制。民始生爲黃。四歲爲小。六爲中。二十一爲丁。六十爲老。凡丁附籍帳者。春附則課役並征。夏附則免課從役。秋附則課役俱免。制每歲一造帳。三年一造籍。州縣留五比。尚書省留三比。定天下戶。量其資產。定爲三等。後詔三等未定升降。宜爲九等。宋男夫二十爲丁。六十爲老。女口不預。民輸丁錢丁米。身有疾廢者。免之。眞宗詔除兩浙福建荆南廣南舊輪身丁田凡四十五萬四百貫。丁謂言。恐有司經費不給。上曰。國家所務。正爲澤及下民。但敦本抑末。節用謹度。自然富足。元太宗始定算賦。中原以戶。西域以丁。蒙古以馬牛羊。令諸路驗民戶成丁之數。無丁歲科粟一石。驅丁五升。新戶丁駟各半之。老幼不預。明太祖議編賦役黃丹之制。十年一輪造。各布政司類總解。南京戶部八後湖藏之。在外各布政司及府

州縣各存一本。以一百十戶爲一里。推其中丁糧多者十人爲里長。餘百戶分爲十甲。歲役里長一人。管攝一里之事。城中曰坊。近城曰箱。鄉都曰里。每里編爲一冊。冊首總爲一圖。其田糧不及而附於一甲內者曰畸零。不在十戶之限。里長輪役十年。終而復始。故曰排年。里中依次充當。至於大小雜浮差役。各照人戶之上中下。每歲終。所在官司審編。謂之均徭冊。成進戶部。布政司及府州縣各存一本。令中書省臣。凡行郊祀禮。以天下戶口錢糧之籍。陳于臺下。祭畢收藏內庫。令本部榜諭天下軍民。凡有未占籍而不應役者。許自首。軍發衛所。民歸有司。匠隸工部。

歷代鄉黨職役之法

昔黃帝始經土設井。以塞爭端。立步制畝。以防不足。使八家爲井。井開四道。而分八宅。鑿井於中。一則不泄地氣。二則無費一家。三則同風俗。四則齊巧拙。五則通貨財。六則存亡更守。七則出入相司。八則嫁娶相媒。九則無有相貸。十則疾病相救。是以情性可得而親。生產可得而均。均則欺凌



之路塞。親則鬪訟之心弭。既收之於邑。故井一爲隣。隣三爲朋。朋三爲里。里五爲邑。邑十爲都。都十爲師。師七爲州。夫始分於井。則地著。計之於州。則數詳。迄乎夏殷。不易其制。周制。大司徒令家爲比。使之相保。五比爲閭。使之相受。寄托也。四閭爲族。使之相葬。五族爲黨。使之相救。五黨爲州。使之相調。五州爲鄉。使之相賓。及三年則大比。大比則受國邦之比要。比者簡閱人數。及財物也。要漢高祖。舉民年五十以上。有修行能率衆爲善。置以爲三老。鄉一人。擇鄉三老一人爲縣三老。與鄉令丞尉。以事相教。復勿徭戍。以十月賜酒肉。十里一亭。亭有長。十亭一鄉。鄉有三老。有秩。畜夫游徼。三老掌教化。畜夫職聽訟收賦稅。游徼徼循禁盜賊。縣大率方百里。其民稠則減。稀則曠。鄉亭亦如之。皆秦制也。東漢。鄉置三老。掌教化。凡有孝子順孫。正女義婦。遜財救患。及學士爲民法式者。皆扁表其門閭。以興善行。晉制。每縣戶五百以上。皆置鄉。三千以上。置二鄉。五千以上。置三鄉。萬以上。置四鄉。鄉置畜夫一人。鄉戶石每千以下。置治書吏一人。千以上。置史佐各一

人止一人。五千五百以上。置史一人。佐二人。縣率百戶。置里吏一人。其土廣人稀。聽隨宜。置里吏。唐令諸戶以百戶爲里。五里爲鄉。四家爲隣。三家爲保。每里設正一人。掌按比戶口。課植農桑。檢察非遲。催驅賦役。周顯德中。詔諸道州府。令團併鄉村。大率以百戶爲一團。每團選三大戶爲耆長。凡民家之有姦盜者。三大戶察之。民田之有耗登者。三大戶均之。宋太祖時。舊制凡有課役戶。皆出於戶民。郡國輦運官物。率以僑居人充。至是。始令文武官內諸司臺省監諸使。不得占川縣課役戶。及諸州不得役道路居民爲遞夫。詔令佐檢察差役有不平者。許民自相糾舉。京百官補吏。須下礙役。宋朝。凡衆役。多以廂軍給之。罕調丁男。大中祥符五年。提點府界段惟幾。發中牟縣夫。修馬監倉。群牧制置使。以旣卒代焉。因下詔禁之。仁宗時。詔川陝閩廣吳越諸路衙前仍舊制。餘路募有版籍者爲衙前。滿三期。罪不至徒。補三司軍將。孝宗詔諸充保正副。依條。只令管烟火盜賊外。并不得浮有科擾差使。如違許令。越訴知縣。重行黜責。守倅各坐失覺察。



之罪。寧宗時。州縣保正。止許幹當本都。賊盜鬪毆烟火公事。不許非汎科配戶長。止許專一拘催都內土着租稅。不許抑勒代納逃絕官物。違者。官吏重罰。理宗時。黃幹上奏曰。國家之制。保副正。謂之大役。戶長。謂之小役。二役皆選之。每都人戶。大役者。非戶產稍高。不在其數。至於小役。則稅錢或不滿百。亦所不免。寬都人戶。有至二三十年方一差者。狹都人戶。有五家循環充役。無歲不受其害者。故物力之家。雖置產於狹都。而必立戶於寬都。雖散其產於狹都。而必併其稅於寬都。彼寬都之役。日加寬。狹都之役。日以密。寬者益富。而密者益貧。貧者益勞。而富者益逸。勞者日益駿削。而逸者日益封殖。勞逸不均。而中產以下。破蕩流移。深可憐悶。莫若差大役。則限以都。差小役。則不限以都。而限以鄉。一鄉數都。寬狹相通。則富者不至於逃逸。而貧者不至於獨勞。度宗時。行義役法。元世祖時。定科差條列。成宗時。詔江浙行省。橫覈富強避役之戶。又詔大都路。凡和顧和買。及一切差役。以諸色戶與民均當。英宗。詔京師勢家與民均。

征權之法

周官萍氏。掌幾酒。謹酒。幾者幾察。酤賣過多及非時。者謹者使民節用而無彝也。漢時。有酒酤酤禁。其律。三人以上。無故群飲酒。罰金四兩。武帝時。初權酒酤。昭帝時。罷權酤官。從賢良文學之議也。令民占租賣酒。升四錢。租即賣酒之稅也。隋文帝時。罷酒坊。與百姓共之。唐德宗時。罷酒稅三年。復制禁人酤官。自置店酤收利。以助軍費。斛收直三十。州縣總領簿。私釀者論其罪。尋以京師四方所湊。罷權。憲宗時。京兆府奏權酒錢。宋朝之制。三京官造麴。聽民納直。諸州城內。皆置務釀之。縣鎮鄉閭。或許民釀。而定其歲課。太宗時。詔先是募民。掌茶鹽權酤。民多增掌數。求掌以規利。歲或荒儉。商旅不行。致虧常課。多籍沒家財以償。甚乖仁恕之道。今後宜並以開寶八年額爲定。不得復增。眞宗詔曰。權酤之法。素有定規。宜令計司。立爲永式。自今中外不得復議增課。以圖恩獎。孝宗時。右正言晁公武言。私酒私麴。有禁法也。未聞有犯糴米之罰者。乞行禁止。



唐德宗時。稅天下茶。漆竹木。十取一。以為常平本錢。時軍用廣。常賦不足。所稅亦隨盡。亦莫能充本儲。及出奉天。乃悼悔。下詔亟罷之。文宗時。復置權茶。使徙民茶樹於官場。權其舊積者。天下大怨。宋太祖時。詔民茶折稅外。悉官買。敢藏匿不送官。及販鬻者。沒入之。論罪主吏。凡茶有二類。曰片。曰散。片茶。蒸造實。捲摸中串之。惟建劍則既蒸而研。編竹為格。置焙室中。最為清潔。他處不能造。其名有龍鳳石乳的乳白乳頭金蠟面頭骨且骨末骨鹿骨山挺十二等。以充歲貢及邦國之用。高宗時。罷建州茶蠟。元之茶課。大率因宋之舊而為之制。世祖時。權成都茶於京兆鞏昌。置局發賣。私自採賣者。其罪與私鹽法同。順帝時。李宏陳言。茶權之制。古所未有。自唐以來。其法始備。宜令茶司。少革貪黷之風。茶戶免損乏之害。命如所言之。皇明太祖。初議定官給茶。引付產茶府州縣。凡商人買茶。具數赴官納錢。給引。方許出境貨賣。每引昭茶一百斤。茶不及引者。謂之畸零。別置

由帖付之。凡賣茶去處。赴宣課司。依例三十分抽一分。芽茶葉茶。各驗價直。納課販茶。不拘地方。武帝時。議准漢中所屬金州西北石泉漢陰等處。舊額歲辦茶課。二萬六千八百餘斤。新收茶課。二萬四千一百六十四斤。俱照數歲辦茶課。永為定例。英宗時。命罷運茶支壩事例。孝宗時。以陝西歲饑。關中茶二百萬斤。召商派撥缺糧倉。分止納備賑。

征商

周官司市。國凶荒札喪。則市無征而作布。貨泉也。廛人。掌斂市紵布總布質布罰布塵布。而入于泉府。凡屠者。斂其皮角筋骨。入于玉府。漢武帝時。初算商賈。如稅商賈車算。船令出算。算緡錢。末作則率緡錢四千一算。隋文帝時。除入市之稅。唐德宗時。趙贊請諸道津會置吏。閱商賈錢。每緡稅二十。竹木茶漆。稅十之一。以贍常平本錢。帝納其策。宋太祖時。詔所在。不得苛留行旅。齎裝非有貨幣當算者。無得發篋搜索。開寶中。詔嶺南商賈齎生藥者。勿算。先是偽蜀時。部民凡嫁娶。皆籍其幃帳粧奩之數。估價抽稅。是年。詔除之。



太宗時。詔除商旅貨幣外。其販夫販婦細碎交易。並不得收算。常稅名物。令有司件析。揭榜頒行天下。至道元年。詔兩浙諸州。紙扇芒鞋及細碎物。皆勿稅。民間所織繅帛。非出鬻於市者。勿得收算。真宗時。除杭越等十三州軍稅鵝鴨年額錢。京東西河北陝西江淮南民以柴薪渡河津者。勿稅。仁宗時。有請算錢。以助給費者。帝曰。貨泉之利。欲流天下。而通有無。何可算也。不許。神宗時。詔三司。凡民承買酒麴坊場。率千錢。輸稅五十。儲之以祿吏。詔減國門稅數十種。錢不滿三十者。蠲之。哲宗時。商人載米入京。糶者力勝稅權。蠲。力勝當時名從蘇軾請而蠲之徽宗時。詔在京諸門。凡民衣屨穀菽鷄魚果蔬炭柴磁瓦器之類。並蠲其稅。歲終計所蠲。令大觀庫給償。高宗時。詔京城久閉。道路方通。有販貨上京者。與免稅。孝宗時。詔諸路州縣。創立場務者。皆罷之。知臨安府吳淵。乞復置西溪等兩處發引欄稅。上曰。關市譏而不征。去城五十里之外。豈可復置欄稅。元武宗時。耶律楚材。奏薦張奐。為河南路徵收課稅所長官。廉訪使。奐將行。言於楚材曰。僕不敏。誤蒙

不次之用。以書生而理財賦。已非所長。又况河南兵荒之後。遺民無幾。烹鮮之喻。正在今日。急而擾之。糜爛必矣。願假以歲月。使得撫摩瘡痍。以為朝廷愛養基本萬一之助。楚材嘉之。奐既至。按行境內。親問監務。日課幾何。難易若何。有以增額言者。奐責之曰。剝下欺上。汝欲我為之耶。減元額四之一。公私便之。皇明英宗時。詔罷徐州濟寧州收船料鈔。憲宗時。罷蘇杭金沙洲九江四處鈔關成租。永樂中。詔凡軍民之家。嫁娶喪祭時節。追送禮物。染練自織布帛。及買已稅之物。或船隻車輛。運自己物貨。並農用之器。各處小民挑擔蔬菜。各處谿河小民貨賣雜魚。民間家園池塘。采用雜果。非興販者。及民間常用竹木蒲草器物。並常用雜物。銅錫器物。日用食物。俱免稅。世宗時。令宣課司。今後小民發賣瓜果蔬菜。毋得抽稅。

鹽鐵

齊管子曰。海王之國。海王者言以負海之利而王其業也謹正鹽莢。正者征也十口之家。十人食鹽。百口之家。百人食鹽。終月。大男食鹽五升少半。少半猶劣薄也大女食鹽三升



少半。吾子食鹽二升少半。吾子謂小也。此其大曆也。曆數鹽百升而釜。三兩  
七銖一黍十分之一為升。當米六合四勺。百斤之鹽。今鹽之重升。加分強  
七十六斤。十二兩。十九銖。二釐。為釜。當米六斗。四升。一斗。加半。升。加一。強釜。  
釜五十也。分強半強也。今使鹽官稅其鹽。得五十合。而為之強。升。加一。強釜。  
百也。升。加二。強釜。二百也。鍾二千。為十釜。當米六百。四斗。八升。十鍾。二萬。百  
鍾。二十萬。千鍾。二百萬。萬乘之國。人數開口。千萬也。開口。所謂大男。大。禹。筮  
之商。二百萬。而。立筮。以計所稅之鹽。一日計。二百萬。合。為。二百。鍾。也。口。數。十  
日。二千萬。一月。六千萬。萬乘之正。九百萬也。今鐵官之數。曰。一女。必有一  
鍼。一。刀。若其事立。然。後。畊者。必有一耒。一耜。一鈹。若其事立。之。鋤。謂。行。服  
連。輦。名。所以。載。輶。輦。局。者。駕。馬。必。有。一。斤。一。鉅。一。鉅。一。鑿。若其事立。今。鍼  
之。重。加。一。也。三十。鍼。一。人。之。籍。也。一。重。每。十。分。得。三。十。分。為。強。取。刀。之。重  
加。六。五。六。三。十。五。刀。一。人。之。籍。也。五。刀。之。重。每。十。分。得。六。分。以。為。強。而。取。之  
鉅。鐵。之。重。加。七。三。鉅。鐵。一。人。之。籍。也。而。取。之。則。金。每。十。分。得。七。分。以。為。強。其  
餘。輕。重。皆。准。此。而。行。也。梁。趙。宋。衛。濮。陽。彼。盡。饋。食。之。國。遠。本。國。無。鹽。而。食。無。鹽。則

腫守圉與禦之用鹽獨甚。桓公乃使糶之。得成金萬斤。奏賦鹽鐵之利二

十倍於古。漢興循而未改。武帝置鹽鐵官。鹽官二十八郡。安邑鐵官四十

郡。夏陽宣帝詔減鹽賈。東漢凡郡縣出鹽多者。置鹽官主鹽稅。出鐵多者。

置鐵官主鼓鑄。明帝時。官自鬻鹽。後魏弛鹽禁。官雖無權。而豪貴之家。乘

勢占奪。復置監官。後周文帝置掌鹽之政令。一曰散鹽。煮海以成之。二曰

監鹽。引池以化之。三曰刑鹽。掘地以出之。四曰飴鹽。於戎以取之。凡監鹽

每池為之禁。百姓取之皆稅焉。唐玄宗置鹽屯。公私取利。劉彤請檢校海

內鹽鐵之利。從之。有鹽池十八。井六百四十。皆隸度支。穆宗時。奉天鹵地。

生水栢。以灰一斛。得鹽十二斤。利倍鹵。文宗時。采灰一斗。比鹽一斤。論

罪。宋朝之制。顯鹽出解州安邑。解縣兩池。以戶民為畦。夫悉蠲其他役。每

歲自三月一日墾畦。四月始種。八月乃罷。官廩給之。安邑池。每戶歲種鹽

千席。解池減二十席。至道二年。兩池得鹽三十七萬二千五百四十。宋初

鹽莢。只聽州縣給賣。歲以所入課利申省。而轉運司操其贏。以佐一路之



費。東南鹽利。視天下爲最厚。鹽之入官。淮南福建斤爲錢四。兩浙杭秀爲錢六。溫台明亦爲錢四。廣南爲錢五。視道里遠近。而上下其估。元世祖定鹽酒稅課等法。申嚴瀕海私鹽之禁。立常平鹽局。皇明兩淮都轉運鹽使司所轄。泰州等鹽場三十處。各省置都轉運鹽使。兩浙鹽場三十五處。山東十九處。福建七處。陝西四處。廣東二十九處。四川雲南有鹽井。置鹽課提舉司。河東司所轄。解池東場西場中場各處。每歲鹽課。各有定額。

坑冶

周官冢人。掌金玉錫石之地。而爲之禁厲以守之。若以時取之。則物其地。圖而授之。其物形色占東漢時。灤湖出黃金。廬江太守取以獻。後魏時。有司奏。長安驪山。有銀鑛。二石。得銀七兩。言白登山。有銀鑛。八石。得銀七兩。錫三百餘斤。其色潔白。有踰上品。詔常令採鑄。又漢中。舊有金戶千餘家。常於漢水沙金。年終輸之。唐凡金銀鐵石之冶。一百八十六。宋興。金銀銅鐵鉛錫之貨。凡諸金產金有五。曰商饒歛撫州南安軍。產銀有三監。曰桂陽鳳

州之開寶。建州之龍焙。又有五十一場。產鐵有四監。曰大通兗州之茱萸。徐州之利國。相州利成。又有十二冶。二十務。二十五場。產鉛有三十六場。務。產錫有九場。產水銀有四場。曰秦階商鳳州。產朱砂有三場。曰商宜州富順。元世祖二十一年。取高麗所產鐵。二十六年。以高麗國多產銀。遣工即其地。治以輸官。凡天下產金之所。益都等三十八所。產銀之所。大都等二十七所。產珠大都等五所。產玉于闐等二所。產銅益都等四所。產朱砂水銀遼陽等四所。產碧甸子和林等二所。產鉛錫鉛山等九所。產鐵河東等四十五所。納課興革不一。皇明國初。取用諸課。皆因各處土產。若金有常例。鑿鐵水銀銅錫有常額。至於銀鑛珠池。間或差官暫取。隨即封閉者。看守馴今日。令更加嚴。

雜征歛

周官委人。掌歛野之賦。歛薪芻。凡疏村。凡畜聚之物。漢文帝時。弛山澤稅。東漢和帝。自京師離宮果園。上林廣成圃。悉以假貧民。恣得採捕。不收其



稅。官有陂池。令得采取。物收假稅。唐德宗時。稅間架筭除陌。其法。屋二架爲間。上間錢二千。中間一千。下間五百。除陌法者。公私給與。及買賣每緡。官留五十錢。及經原兵反。並竹木茶漆鐵之稅皆罷。宋太祖詔除滄德等三十九處津渡所算錢。太宗時。詔諸處魚池。舊皆有司管係。與民爭利。非朕素懷。自今應池塘河湖魚鴨之類。任民采取。如經市貨賣。乃收稅。神宗時。民有交易。官爲之據。因收其息。皇明成祖。設通州白河盧溝通積廣積。抽分五局。如松木等三十種。三十分取六。椶毛等四種。三十分取三。石灰等八種。三十分取二。茅草等七種。三十分取一。蘆葦。三十分取五。蘆葦柴。三十分取十五。

市

周官泉府。貨之滯於民用者。以其賣買之物。揭而書之。以待不時而買者。買者各從其抵。漢武帝。置均輸官。置平准于京師。大農諸官。盡籠天下貨物。貴賣賤買。商賈亡所牟利。則反本。萬物不得騰躍。故抑天下之物。名曰平准。唐德宗時。宮中取物於市。以中官爲宮市使。宋初。凡官所須物多。有司下諸州。從風土所宜。及民產厚薄。而率買。謂之科率。開寶三年。令天下諸州。凡絲繭純絹麻布香藥毛翎箭筈皮革筋角等所在。約支二年之用。不得廣有科布。以致煩民。淳化五年。詔諸州。科買物。非風土所出。多課民。轉市於他處。及調役飛輓不均者。件析以聞。當議均減。初。市師有雜買務。雜買場。以主禁中貿易。景祐中。嘗詔須庫物有缺。乃聽市於雜買務。皇祐中。帝謂輔臣曰。國朝懲唐宮市之弊。置務以京朝官內侍參主之。以防侵擾。而近歲非所急物。一切收市。擾人甚矣。乃申景祐之令。使皆給實直。神宗時。制置三司條列司。宋開寶時。置市舶司於廣州。元世祖立平准庫。以均平物價。通利鈔法。立回易庫。市易幣帛諸物。勅上都和顧和買。並依大都。中統二年。於高麗鴨綠江西。立互市。詔許諸番國互市。諭沿海官司。通日本國人市舶。又立市舶司。皇明初。令凡內外軍民官司。缺用之物。照依時值對物。兩平收買。或客商到來。中買物貨。並即給價。



齊管仲曰。歲有豐穰。穀有貴賤。人君不理。則畜賈游於市。謂賈人多畜積。乘民之不給。百倍其本矣。民有餘則輕之。故人君歛之以輕。民不足則重之。故人君散之以重。凡輕重歛散之。以時准平。魏李悝曰。糴甚貴傷人。甚賤傷農。善爲國者。使人無傷而農益勸。故善平糴者。必謹視歲有上中下熟。大熟則上糴。三而舍一。中熟則糴二。下熟則糴一。小饑則發小熟之所歛。中饑則發中熟之所歛。大饑則發大熟之所歛。而糴之。故取有餘以補不足也。按古今言糴糶歛散之法。始於管仲李悝。然管仲之意。兼主於富國。李悝之意。專主於濟民。桑孔以來。所謂理財之道。皆從管說。漢大司農中丞耿壽昌。請穀賤時。增其價而糴。以利農。穀貴時。減價而糶。名曰常平倉。民便之。隋文帝時。工部尙書長孫平。請令諸州百姓。當社共立義倉。收穫之日。勸課出粟及麥。造倉而貯之。即委社司。執帳檢校。有饑饉。以此賑給。唐制。凶荒則有社倉賑給。不足則徙民就食諸州。尙書左丞戴胄建議。自王公

以下。計墾田秋熟。所在爲義倉。歲凶以給民。太宗乃詔王公以下。每年戶別據所種田畝。別稅穀二升。其商賈戶若無田者。上上戶稅五石。上中以中下遞減。北倉等諸色倉糧。總千二百六十五萬六千六百二十石。關內道等十道正倉糧。總四千二百一十二萬六千一百八十四石。義倉糧。總六千三百一十七萬七千六百六十石。常平倉糧。總四百六十萬二千二百二十石。關內等四道和糴。一百一十三萬九千五百三十石。宋太祖元年。令諸州於所屬縣。各置義倉。令官所收二稅石。別稅一斗貯之。以備凶歉。民欲借充種食者。州縣計給以聞。勿俟報。義倉不足。當發公廩者。奏待報。太宗令諸州置惠民倉。如穀稍貴。即減價糶。與貧民不過一斛。神宗時。行青苗法。寧宗時。浙東提舉朱熹言。乾道間。建民艱食。熹請於府。得常平米六百石。請劉如愚共任賑貸。夏受粟於倉。冬則加二計息以償。逐年歛散。小歉。即蠲其息之半。大饑。盡蠲之。十有四年。得息米造成倉敷。元數六百石。還府。見管米三千一百石。以爲社倉。不復收息。每石。只收耗米三升。以故一鄉。



遇凶年不闕食。時陸九淵在勅令局。編入賑恤門。嘉定末。真德秀帥長沙行之。元世祖立義倉于鄉社。又置常平于路府。置和糴所于開平。皇明太學士楊士奇言。凡豐稔。州縣各出庫銀平糴。儲以備荒。命戶部行之。

文獻撮錄卷二終

文獻撮錄卷三目錄

- 土貢之式
- 外國常貢之式
- 東國漂人送歸之式
- 各國貢回限日
- 各國通事額員
- 歷代國用之式
- 賑恤
- 蠲貸
- 歷代選舉之法
- 魏晉梁隋舉士之式
- 唐舉士之式
- 宋舉士之式
- 元選士之式
- 皇明舉士之式
- 歷代登科記總目
- 高麗人甲科
- 歷代薦舉之式
- 武舉
- 任子
- 考課之式
- 歷代學校之制
- 歷代祠祭先聖先師之禮



養老

歷代書院之制

歷代郡國之學

四大書院

# 文獻撮錄卷三

土貢之式

禹立九州之貢。周官太宰以九貢致邦國之用。一曰祀貢。犧牲包屬二曰賓貢。皮屬三曰器貢。宗廟器四曰幣貢。繡帛五曰材貢。木財六曰貨貢。珠貝七曰服貢。祭服八曰旂貢。羽毛九曰物貢。九州之所貴外各漢高祖詔諸侯常以十月朝獻。東漢光武詔郡國異味不得有獻御。薦宗廟者如舊制。和帝時舊南海獻龍眼荔枝。十里一置。五里一候。奔騰險阻。唐雋上書陳狀。詔太官勿受遠國珍羞。晉武帝時程據獻雉頭裘。帝焚之於殿前。敕有獻奇技異服者罪之。唐制州府歲市土所出以爲貢。其價視絹之上下。無過五十匹。異物滋味名馬鷹犬。非有詔不獻。中宗時大臣初拜官獻食。天子名曰燒尾。蘇瓌獨不進。宗晉卿嘲之。瓌曰宰相變和陰陽。代天治物。今粒食踴貴。百姓不足。臣誠不稱職。不敢燒尾。玄宗時千秋節群臣皆獻寶鏡。張九齡乃述



前世興廢之源。爲書五卷。謂之千秋金鏡錄。上之。代宗時。生日端午。四方貢獻。至數千萬。加以恩澤。諸道尙侈麗。以自媚。德宗時。藩鎮常賦外。進奉不息。劔南韋臯。有日進。江西李兼。有月進。李錡等。以常賦入貢。名爲羨餘。宋太祖。詔文武官及致仕官僧道百姓。自今長春節及他慶賀。不得輒有貢獻。仁宗。却川峽獻織綉。元世祖。免耽羅國入貢白苧。十九年。高麗國。貢細布四百匹。皇明。凡貢獻金銀器皿珍珠段疋等。先日具奏。次日照進。太祖時。江西行省。以陳友諒鏤金床進。太祖曰。此與孟昶溺器何異。命毀之。蘄州進簞。却之。詔四方。非朝廷所需者。毋妄獻。成祖時。周王肅。獻騶虞。上曰。若果爲祥。朕宜加慎。孝宗時。吏部尙書馬文升疏言。南京所進物。若青梅竹笋蒿苔菜。宣州梨。因太祖時所用。故猶進奉。供薦。今京師果品蔬菜。其味尤佳。隨時供薦。奚待於南京。請免其撥馬快船擾害之弊。疏入。上大  
喜。

外國常貢之式

外國常貢物。朝鮮國金銀器皿。各色紵布。白細花席。人蔘。豹皮。獺皮。黃毛筆。白綿紙。

東國漂人送歸之式

凡朝鮮國漂流人。至會同館。即行該通事序班。譯審明白。日給薪米養贍。兵部委官伴送沿途。應付至遼東。鎮巡衙門另差人員。轉送歸國。通行國王知會。如該國使臣在館。即令帶回。一體給賞施行。

各國貢回限日

皇明神宗時。凡外國貢回定限。分爲三等。朝鮮國。一月十日。安南琉璃暹羅各國。一月二十日。

各國通事額員

皇明世宗時。通事悉屬提督官。凡在館鈐東外國人。入朝引領。回還伴送。皆通事專職。憲宗時。定通事額數。不過六十名。朝鮮國五員。日本四員。琉球國二員。安南二員。暹羅三員。回回七員。



歷代國用之式

王制。冢宰制國用。必於歲之抄。五穀皆入。然後制國用。視年豐耗。以三十年之通。制國用。量入爲出。國無九年之蓄。曰不足。無六年之蓄。曰急。無三年之蓄。曰國非其國也。三年耕。必有一年之食。九年耕。必有三年之食。以三十年之通。雖有凶旱水溢。民無菜色。然後天子食。日舉以樂。周官太宰。以九賦歛財賄。一曰邦中之賦。二曰四郊之賦。三曰邦甸之賦。四曰家削之賦。五曰邦縣之賦。六曰邦都之賦。七曰關市之賦。八曰山澤之賦。九曰幣餘之賦。以九式均節財用。一曰祭祀之式。二曰賓客之式。三曰喪荒之式。四曰羞服之式。五曰工事之式。六曰幣帛之式。七曰芻秣之式。八曰匪分頒之式。九曰好用燕好之式。漢初。天子不能具醪不雜。而將相或乘牛車。文帝躬耕籍田。勸百姓。東漢大司農。掌諸錢穀金帛諸貨幣。四時上。月旦。見錢穀簿。其逋未了。各具別之。晉自元帝寓居江左。僑立郡縣。諸蠻。販。儼。洞。霑。沐。王。化。者。各隨輕重。收其賸物。以裨國用。歷宋齊梁陳。皆因而

不改。隋文帝開皇時。調絹一疋者。減爲二丈。役丁十二番者。減三十日。以宇內無事。益寬徭賦。百姓年五十者。輸庸停放。唐天寶時。海內富實。天下歲入之物。租錢二百餘萬緡。粟千九百八十餘萬斛。庸調絹七百四十萬匹。綿百八十餘萬屯。布千三十五萬餘端。天子驕於佚樂。而用不知節。大抵用物之數。常過於所入。於是錢穀之臣。始事朘削。肅宗時。江淮置調用使。以用度不足。人納錢給空名告身。授官勳邑號。初。轉運使掌外。度支使掌內。永泰間。分天下財賦。鑄錢常平。轉運鹽鐵。置二使。德宗時。楊炎爲相。請爲兩稅法。以均之。憲宗時。分天下之賦。以爲三。一曰上供。二曰送使。三曰留州。會昌末。置邊備庫。收度支戶部鹽鐵錢物。宣宗更號延資庫。以屬宰相。宋太祖。詔諸州支度經費外。凡金帛悉送闕下。無得占留。國初。貢賦悉入左藏庫。始於講武殿。別爲內庫。號封樁庫。以備軍旅饑饉。英宗時。內外入。一億一千六百十三萬八千四百五。出一億二千三十四萬三千一百七十四。非常出者。又一千一百二十五萬一千二百七十八。是歲。諸路



積一億六千二十九萬二千九十三。而京師不與焉。神宗留意節用。雖藏冰治竈畜羊之小事。亦節省。皇明國初。總計天下田土。共八百四十九萬六千五百二十三頃零。人戶共九百三十五萬二千五百口。五千八百五十五萬八千一百一十。夏秋二稅。大約二千六百零八萬五千九百十六石。絹二十萬五千五百九十八疋。絲一萬七千零三斤。又三百十六萬八千十七兩。棉花二十四萬六千五百六十二斤。棉布十萬八百七十疋。麻布二千七十七疋。又洞蠻蓆布二百五十九條。苧六十五斤。鈔八萬一千二百十五錠零。一百八十四貫。馬草一千四百六十九萬五千九百九十一包。又一千一百十六萬二千六百四十三斤。總各處鹽課司凡一百六十九。每歲一百十七萬六千五百二十五引。又鹽價並引價銀四萬六千一百五十八兩。其運入太倉庫者。歲額運銀一百四十九萬兩內。夏稅五萬五百餘兩。秋稅九十四萬四千八百餘兩。馬草折銀二十三萬七千餘兩。鹽課折銀二十餘萬兩。雲南開辦銀三萬餘兩。總計各處稅糧馬草折銀各

鹽課銀。各鈔關船料及雲南開辦銀。每歲入貢二百四十三萬兩。神宗時。戶部遵依先朝故事。錄上國計。每歲終會計。

賑恤

周禮。委人掌邦之委積。以待施惠。鄉里之委積。以恤民之艱阨。門閭之委積。以養老孤。郊里之委積。以待賓客。野鄙之委積。以待羈旅。縣都之委積。以待凶荒。廩人掌九穀之數。以歲之上下數邦用。以知足否。以詔穀用。以治年之豐凶。凡萬民之食食者。人四鬴。六斗四升謂一月食米也。上也。人三鬴中也。人二鬴下也。若食不能人二鬴。則令邦移民就穀。漢高祖。關中饑。令民就食蜀漢。文帝。大旱。發倉庾賑貧民。武帝。山東水災。遣使虛郡國倉廩以賑。猶不足。又募豪富相假貸。尚不能救。乃徙民於關以西。新秦中七十餘萬口。衣食皆仰給於縣官。使者分部護。冠蓋相望。費以億計。詔有撓振饑民。免其扈者。具以名聞。河內傷水旱。汲黯以便宜持節發倉粟以賑。請罪。上釋之。昭帝詔。民被災匱食。遣使振困。其止四年。毋漕三年以前所賑貸。勿收責。



宣帝詔。歲不登。丞相以下至都官令丞。入穀輸長安倉。助貸貧民。元帝詔。貲不滿千錢者。賑貸種食。成帝永始年。詔關東比歲不登。吏民以義收食貧民。入穀物助縣官。賑贍者。已賜直。其百萬以上。加賜爵右更。欲爲吏補三百石。其吏也。遷二等。三十萬以上。賜爵五大夫。吏亦遷二等。民補郎。十萬以上。家無出租賦二歲。萬以上一年。東漢光武。令郡國給廩。高年鰥寡。孤獨篤癯無家不能存者。明帝賜穀人三斛。獻帝三輔旱。出太倉米豆。作糜粥食饑人。經日而死者。始帝疑有虛。親於御座前。量試作糜。乃知非實。責有司杖之。是後多令濟來。文帝元嘉間。三吳饑。彭城王義康立議。令蓄積之家。聽留一斗儲。餘皆勒使糶貨。爲制平價。魏文帝冀定二州饑。詔郡縣爲粥於路。以食之。隋文帝開皇間。關中大旱。民饑。上遣左右視民食。得豆屑雜糠以獻。爲之流涕。不御酒。殆將一朞。乃帥民就食於洛陽。敕斥候不得輒有駟逼。男女參廁於仗衛之間。遇扶老携幼。輒引馬避之。慰勉而去。至艱險之處。見負擔者。令左右扶助之。唐太宗謂黃門侍郎王珪曰。開

皇間大旱。隋文帝不許賑給。而令百姓就食山東。比至末年。天下儲積。可供五十年。煬帝恃其富饒。侈心無厭。卒亡天下。但是倉庾之積。足以備凶年。其餘何用哉。唐太宗山東旱。鬻子者。出金寶贖還之。周世宗淮南饑。上命以米貸之。或曰民貧恐不能償。上曰民猶子也。安有子倒懸而父不爲解者。安責其必償也。致堂胡氏曰。世宗視民猶子。匡救其乏。而不責其必償。仁人之心。王者之政也。宋太祖遣使賑貸。戶部郎中沈義倫使吳越還言。楊泗饑民多。郡中有軍儲萬斛。貸民。秋收新粟。有司沮之曰。若歲不稔。孰任其咎。義倫曰。國家以廩粟濟民。自當召和氣致豐年。寧憂水旱耶。此當斷自宸衷。上從之。太宗詔永興等州旱。貸官倉粟人二斗。給復二年。命陳堯叟等往宋毫等州貸粟。每州五千石。或萬。更不理納。仁宗英宗。一遇災變。避朝變服。損膳撤樂。災之所被。發倉賑貸。或平價以糶。轉漕他路粟。誘富人入粟。秩以官爵。出內藏。或奉宸庫金帛。或鬻祠部度僧牒。賦租之未入。入未備者。或縱不取。或寡取。或倚格以須。豐年寬逋。負休力役。賦入



之有支移折變者。省之。應給蠶監。若和糴及科。率追呼不急。妨農者。罷之。薄關市之征。鬻牛者。免算。利有可與民共者。不禁。水鄉則蠲蒲魚果蔬之稅。民流亡者。關津毋責渡錢。過京師者。分遣官諸城門。賑以米。所至。舍以官第。爲淖糜食之。或賦以閑田。或聽隸軍籍。老幼不能自存者。聽官司收養。因餞役。若厭溺死者。官爲瘞埋祭之。厭溺死者。加賜其家錢粟。蝗爲害。則募民捕。以若粟易之。蝗子一升。至易菽粟三升。或五升。下詔州郡戒告。吏存撫其民。緩縲繫省刑罰。饑民劫困窘者。薄其罪。且以戒監司。俾察官吏之老疾。罷慳不任職者。間遣內侍存問。災甚。則遣使安撫。其前後所施。大略如此。嗚呼。仁君也。聖主也。百代人主之所當監法也。初。天下沒入戶。絕田官自鬻之。仁宗時。韓琦請勿鬻。募人耕收。租貯倉。以給老幼貧疾。謂之廣惠倉。後詔改隸司農寺。州選官二人。主出納。歲十月。應受米者。書名于籍。自十二月始。三日一給米。人一升。幼者半之。次年二月止。慶曆間。河北京東西大水饑。知青州富弼。擇所部豐稔者五州。出粟十五萬斛。益官

廩。擇公私廬舍十萬區。散處其人。山林之利。聽流民取之。五日以酒肉糧飯勞之。死者爲大冢葬之。謂之叢冢。自爲文祭之。凡活五十餘萬人。上遷其秩。弼曰。救災。守臣職也。辭不受。前此救災者。聚民城郭中。煮粥食之。饑民聚爲疾疫。弼所立法。簡便周至。天下傳以爲法。元凡元賑恤之名有二。曰蠲免者。免其差稅。即周官大司徒所謂薄征者也。曰賑給以米粟。即周官大司徒所謂散利也。然蠲免。有以恩免者。有以災免者。賑貸。有以鰥寡孤獨而賑者。有以水旱疫癘而賑者。皇明。凡遇水旱災。則蠲免租稅。或遣官賑濟。遇蝗蝻生發。則委官打捕。皆隨時與地。而異其法。凡各處田禾。遇有水旱災傷。所在官司。路勘明白。具實奏聞。太祖令天下有司。凡遇歲饑。先發倉廩賑貸。然後具奏定災傷去處。散糧則例。大口六斗。小口三斗。五歲以下不與。成祖被災。民典賣子女者。官爲給鈔贖還。孝宗水災。滄死人家。量給米二石。房屋頭蓄之家。給與米一石。定預備食糧。州縣每十里以上。積糧一萬五千石。州縣官考滿。稽其備荒積穀多少。以爲殿最。世宗令



檢案曉諭積糧之家。量其所積多寡。以禮勸借。若有仗義出穀二十石。銀二十兩者。給與冠帶。三十石三十兩者。授正九品散官。四十石四十兩者。正八品。五十石五十兩者。正七品。俱免雜泛差役。出至五百石五百兩者。除給與冠帶外。有司仍於本家。豎立坊牌。以彰尙義。又災傷地方。有能收養小兒者。每名日給米一升。埋屍一軀者。給銀四分。隣近州縣。不得閉糴。穆宗。以霖雨壞民廬。令五城御史分賑之。每戶給銀五錢。次銀三錢。

蠲貸

漢文帝除民田租。其後或因行幸所過。或各處災傷。除田租。武帝諸逋貸。在孝景後三年以前。皆勿收。昭帝詔所賑貸種食。勿收責。宣帝元帝成帝時。並如之。東漢和帝詔。秋稼旱蝗所傷者。什四以上。勿收田租。順帝以疫癘水旱。全半輸今年田租。晉武帝逋債宿負。皆勿收。減天下戶課三分之一。唐太宗復天下一年。玄宗開元九年。免天下七年以前逋負。天寶十四年。免今年租庸半。宋眞宗初。王文穆公與母賓古同佐三司。賓古謂天下

宿逋。自五代訖咸平。理督未已。民病不能勝。將啓蠲之。文穆得賓古言。即夕俾吏治其數。翌日具奏上。眞宗愕曰。先帝曷不知此。文穆曰。先帝固知之。特留遺陛下。收天下心耳。眞宗感悟。因遣使四出。蠲宿逋。凡一千餘萬。釋係囚三千餘人。由是遇文穆甚異。卒用爲相。仁宗繼立。推廣先志。亟改追欠司曰蠲納司。旋命近臣評定應在名物。下諸路轉運使。期以三年悉蠲之。每三年復一大赦。凡宿逋之總於蠲納司者。苟非侵盜。皆得除洗。列聖相授。率由舊章。所蠲當以數百萬計。究其本原事迹。實自文穆發之。文穆晚繆所爲。要爲合古。而眞宗獨加寵待。亦惟文穆早有恤民之言。宜爲宰相故爾。隋仁宗嘉祐四年。蠲三千二百十六萬。其餘或千萬。或數百萬。推是以知四十餘年之間。以恩釋者多矣。然有司或務聚斂。有嘗以恩除而追督不捨者。朝廷知其弊。下詔戒飭。英宗治平三年。詔逋負非侵盜。皆除之。或請所負。須嘉祐七年赦後。已輸十之三。乃以赦除。學士錢明逸言。此非赦意。請如初令。詔可。神宗釋逋負。貸糧一百六十二萬八千五百石。



錢十一萬七千四百緡。詔諸路人戶積年負欠。以十分爲率。每年隨夏料各帶納一分。願併納者聽。又詔諸路負欠。許將斛斗增價折納。詔兩浙舊欠。總計六百五十餘萬。分作十五年撥還。按宋以仁立國。蠲租已責之事。視前代爲過之。而中興後。尤多郡所上水旱盜賊逃移倚閣錢穀。則以詔旨徑直蠲除。無歲無之。殆不勝書。元世祖詔真定路官民所貸官錢。貧不能償者。免之。又免江淮貧民。至元十六年至二十六年。逋租三百萬石。鈔一千一百五十錠。絲綿九千四百餘斤。成宗以水旱減郡縣田租十分之三。皇明太祖令水旱去處。不拘時限。從實踏勘實災。稅糧即與蠲免。孝宗時。議准災傷應免糧草事例。全災者免七分。九分者免六分。八分者免五分。七分者免四分。六分者免三分。五分者免二分。四分者免一分。世宗時。命自嘉靖四十五年以前。悉從蠲免。

歷代選舉之法

周官大司徒。以鄉三物。教萬民而賓興之。一曰六德。知仁聖義忠和。二曰六行。孝友睦婣任恤。三曰六藝。禮樂射御書數。鄉大夫三年則大比。考其德行道藝。而興賢者能者。鄉老及帥其吏。與其衆寡。以禮禮賓之。漢高祖詔。賢士大夫有肯從我遊者。吾能尊顯之。布告天下。使明知朕意。御史大夫昌。下相國。相國鄼侯。下諸侯王。御史中執法。下郡守。其有意稱明德者。必身勸爲之駕。遣詣相國府。署行義年。行狀年紀有而弗言。覺免。年老癯病。勿遣。文帝詔。諸侯公卿郡守。舉賢良能直言極諫者。武帝令郡國舉孝廉各一人。詔補博士弟子。二千石謹察可者。令與計偕。詣太常。得受業如弟子。按漢制。郡國舉士。其目有三。曰賢良方正也。孝廉也。博士弟子也。然是三者。在後世則各自爲科目。其與鄉舉里選。又自殊塗矣。元光年。徵吏民有明當世之務。習先聖之術者。縣次續食。令與計偕。制郡國口二十萬以上。歲察一人。四十萬以上。二人。六十萬。三人。八十萬。四人。百萬。五人。百二十萬。六人。不滿二十萬。二歲一人。不滿十萬。三歲一人。限以四科。一曰德行高妙。志節清白。二曰德通行修。經中博士。三曰明習法令。足以決疑。能接



章覆。文中御史。四曰剛毅多略。遭事不惑。明足決斷。材任三輔縣令。昭帝。詔舉郡國文學高第。宣帝。遣太中大夫。循行天下。舉茂材異倫之士。東漢之制。選舉於郡國。屬功曹。於公府。屬東西。於天臺。屬吏曹。尚書。亦曰選部。凡郡國守相。視事未滿歲。不得察舉孝廉。以其未久。不周知也。東漢舉士多以孝廉光武。詔舉賢良方正各一人。詔三公舉茂材各一人。光祿勳。歲舉茂材四。行謙遜厚質樸各一人。監察御史司隸州牧。歲舉茂材一人。章帝時。所徵舉率皆特邦。不復簡試。令郡國上明經者。口十萬以上之人。不滿十萬。三人。順帝時。限年四十以上。儒者。試經學。文吏。試章奏。尚書令左雄議也。

魏晉梁隋舉士之式

魏文帝時。尚書陳群。立九品官人之法。州郡皆置中正。以定其選擇。州郡之賢。有試鑑者。爲之別人物。第其高下。詔今之計考。古之貢士也。若限年取士。呂尙周。晉。不顯於前。令郡國所選。勿拘老幼。按魏晉以來。雖立九品中正之法。然仕進之門。則與兩漢一而已。或公府辟召。或郡國薦舉。或由曹椽積累而升。或由世胄承襲而用。大率不外此三四塗轍。晉文元嘉間。限年三十而仕。孝武時。仕者不拘長幼。梁初無中正。制年二十五。方得入仕。陳依梁制。凡年未三十。不得入仕。唯經學生策試得第。諸州迎主簿。西曹左奏。及嘗爲挽節。得未壯而仕。隋文帝時。制諸州歲貢三人。工商不得入仕。隋世。天下舉秀才不十人。杜正玄一門三秀才。煬帝始建進士科。

唐舉士之式

唐制。取士多因隋舊。然大要有三。由學館者曰生徒。由州縣者曰鄉貢。皆升有司而進退之。科目有秀才。有明經。有進士。有俊士。有明法。有明字。有明筭。有一史。有三史。有開元禮。有道舉。有童子而明經之別。有五經。有三經。有二經。有學究。一經。有三禮。有三傳。有史科。此歲舉之常選也。凡舉司課試之法。帖經。以其所習經。掩其兩端。中間惟惟一。行。裁紙爲帖。凡帖三字。隨時增損。可否不一。或得四。或得五。或得六。爲通。後舉人積多。故其法益難。務欲落之。至有帖孤章。絕言疑似。參互者。以惑之。甚者。或上抵共注。



下餘一二字。使尋之難知。謂之例技。既甚難矣。而舉人則有駢縣孤索幽隱。爲詩賦而誦習之。不過數十篇。則難者悉詳矣。其於平文大義。或多面墻焉。秀才之科久廢。而明經。雖有甲乙丙丁四科。進士則甲乙二科。自武德以來。明經惟有丁第。進士惟有乙科而已。進士大抵千人。得第者百一。二。明經倍之。得第者十一二。高祖詔。諸州明經秀才俊士。進士明於治體。爲鄉里稱者。縣考試。州長重覆。歲隨方物入貢。高宗考功員外郎劉思立言。明經多抄義條。進士唯誦舊策。皆亡實材。而有司以人數充第。乃詔自今。明經試帖。十得六以上。進士試雜文二篇。通文律者。然後試策。武后策問。貢人於洛陽城。數日方了。殿前試人自此始。故致堂曰。漢策問賢良。非試之也。延于大殿。天子稱制。訪以理道。其事重矣。貢士既試于南宮。已精其較選。而又試之殿廡。是以南宮爲不足信耶。其先所第名。必從而升降之。殆猶兒戲耳。故先正富文忠公。請罷殿試。其說當然。未有能行也。馬端臨曰。武后所試。蓋如後世之省試。非省試之外。再有殿試也。唐自開元以

前。試士未屬禮部。以考功員外郎主之。武后自詭文墨。故於殿陛間。下行員外郎之事。玄宗勅進士以聲韻爲學。多昧古今。明經以帖誦爲功。罕窮旨趣。自今明經。問大義十條。對時務策三首。進士試大經十帖。開元間。考功員外郎李昂。爲舉人詆訶。帝以員外郎望輕。遂移貢舉於禮部。以侍郎主之。禮部選士。自此始。侍郎親故。移試考功。謂之別頭。德宗勅明經進士。每年考試。明經不得過一百人。進士不得過二十人。如無其人。不必滿數。按唐科目。考校無糊名之法。故主司得以採取譽望。然以錢徽高鐸事觀之。權倖之囑託。亦可畏也。

宋舉士之式

宋朝禮部貢舉。設進士九經五經開元禮三史三禮三傳學究及明法等科。皆秋取解。冬集禮部。春考試合格及第者。列名放榜於尙書省。凡進士試。詩賦雜文各一首。策五道。經書帖對。太祖詔。及第人不得拜知舉官。子弟弟侄及目爲師門恩門。并自稱門生。故事。知舉官將赴貢院。臺閣近臣。



得篇所知進士之負藝者。號曰公薦。上慮其因緣挾私。詔禁之。盧多遜。知貢舉。上復詔叅知政事薛居正。於中書覆試。皆合格。乃賜及第。陶穀子邴。擢上第。上曰。聞穀不能訓子。邴安得登第。乃詔食祿之家。有登第者。禮部具析以聞。當令覆試。初取進士不過十數人。至是禮部試到十一人。上召對講武殿下。詔放榜。李昉知貢舉。會有訴昉用情。上召見下第人三百六十人。擇其一百九十五人。御講武殿。賜紙札試詩賦。命考官得進士二十人。賜及第。又賜錢張宴會。昉等坐責。自茲殿試遂爲常式。太宗初卽位。思振掩滯。禮部上所試合格人姓名。上御講武殿覆試。出詩賦題。命李昉定優劣爲三等。得呂蒙正以下一百九人。賜綠袍鞞笏。賜宴開寶寺。上爲詩二章賜之。第一第二等進士。授將作監丞大理評事通判諸州。寵章殊異。歷代未有也。是年。諸道所發貢士得五千二百餘人。賜第者。并明經等諸科共五百餘人。爲十取其一。唐朝有勅賜及第。以表特恩。至是御試中第者皆稱之。其後文學之臣。不由科第者。或獻文別試。亦勅賜進士及第。

石林葉氏曰。國初取進士。循唐故事。每歲多不過三十人。太宗有意修文。特取一百九人。呂文穆爲狀頭。李叅政。至第二。張齊賢王化基在其間。自是連放五榜。通取八百一人。一時名臣。悉自茲出矣。詔命春官知舉。如唐故事。雍熙端拱年。禮部放進士之後。慮有遺材。至於再試再放。上親試舉人。有中書吏人及第。上令奪所授勅牒。乃詔禁吏人應舉。淳化年。諸道舉人。凡萬七千餘人。蘇易簡知舉殿試。始令糊名考校。眞宗時。高麗賓貢一人爲進士。親試舉人。上臨軒三日無倦色。得進士陳堯咨以下四百九人。諸色四百三十餘人。及諸科凡九百餘人。共千八百餘人。仁宗賜舉人宋郊葉清臣以下及第。國朝以來。以策擢高第者。自清臣始。郊與弟祁。俱以詞賦得名。時奏祁第一。太后不欲弟先兄。乃擢郊第一。祁第十。慶曆年。臣僚上言。改更貢舉進士所試詩賦策論先後。詔下兩制詳議。歐陽修請先試策論。而後詩賦。神宗議更貢舉法。罷詩賦明經諸科。以經義論策。試進士。初王安石以爲古之取士。俱本於學。詔兩制三館議。韓維請罷詩賦。蘇



頌欲先士行而後文藝。去封彌謄錄之法。蘇軾曰。自文章言之。則策論爲有用。詩賦爲無益。自政事言之。則詩賦論策。均爲無用矣。雖知其無用。然自祖宗以來。莫知廢者。以爲設法取士。不過如此也。近世文章華麗。無如楊億。使億尙在。則忠清鯁亮之士也。通經學古。無如孫復石介。使復介尙在。則迂濶誕謾之士也。矧自唐至今。以詩賦爲名臣者。不可勝數。何負於天下。而必欲廢之。上得軾疏曰。吾固疑此。今得軾議釋然矣。他日以問王安石。卒如安石議。罷詩賦。各治詩書易周禮禮記一經。兼以論語孟子。每試四場。哲宗更科場法。進士分四場。第一場。試本經義二道。語孟義各一道。第二場。賦及律詩各一首。第三場。論一道。四場。子史時務策二道。其後中書言。復用祖宗法。試詩賦論策三題。後又罷詩賦。專習經義。光宗初。建議者云。省闈試士。春令尙淺。天寒晷短。間遇風雪。則硯冰筆凍。書字不成。縱有鉅材。莫克展布。請展至二月朔。而殿試則於四月初選日。從之。言者云。今之詩賦。雖未近古。然貫穿六藝。馳騁百家。研精覃思。始能成章。經義

全用套類。父兄相授。囊括冥搜。士子誰務實學哉。策問。有司取本朝故事問之。寒遠之士。無由盡知。請自今。詩賦純正者。寘之前列。從之。舊制。秋貢春試。皆置別頭場。以待舉人之避親者。自總麻以上親及大功已上婚姻之家。皆牒送。惟臨軒親試。謂之天下門生。雖父兄爲考官。亦不避。寧宗時。因議臣有請。詔在朝官。有親屬赴廷對者。免差。考校新進士。舊有期集。渡江後。置局於貢院。特旨賜之資錢。集英殿。賜第之三日。赴焉。上三人得自擇。同升之彥。分職有差。朝謝後。拜黃甲。其儀設褥於堂上。東西相向。皆再拜。拜已。擇榜中年長者一人。狀元拜之。復擇最少者一人。拜狀元。所以侈寵靈。重好明。長少也。又數日。赴國子監。謁謝先聖先師。用釋奠禮。遂賜聞喜宴。侍從已上。及知舉官館職。皆預焉。

元選士之法

元太祖得中原。用耶律楚材言。科舉選士。世祖時。王鶚獻計。許衡立法。未果行。仁宗時。斟酌舊制而行之。取士以德行為本。試藝以經術爲先。太宗



時試諸路儒士。中選者得四千三十人。仁宗時。會試省部。依鄉試例。於次年二月初一日試第一場。初三日第二場。初五日第三場。御試三月初七日。前期奏委考試官二員。監察御史二員。讀卷二員。殿庭考試。每舉子一名。一人看守。延祐二年。始開科取士。分進士左右榜。蒙古色目人爲右。漢人南人爲左。

皇明舉士之式

明朝凡舉用人才。俱隸禮部。凡有司起送至者。咨發吏部。聽用禮部。掌鄉會考試庭試及歲貢。生員初進府州縣學。歲貢生員各一人。翰林院。試經義四書義各一道。中式者發國子監。太祖詔開科舉。使中外文臣。皆由科舉而選。京師及各行省鄉試。八月初九日試初場。復三日試第二場。又三日試第三場。初場。經義二道。四書義一道。第二場。論一道。第三場。策一道。會試。次年二月初九日。十二日。十五日爲三場。頒行科舉成式。一。凡三年大比。子午卯酉年鄉試。辰戌丑未會試。直隸府州縣。試於應天府。外府州

縣。試於各布政司。一。考試官。皆訪明經公正之士。監試官。在內監察御史二員。在外收掌試券官一員。封彌官一員。謄錄官一員。搜檢等官四員。一。舉人試券及筆墨硯自備。每場初券正券各紙十二幅。首書姓名年甲籍貫三代。會試殿試。同前期。在內赴應天府。在外赴布政司。印券置簿。附寫於縫上。用印鈐記。仍將印券官姓名。置長條印。記用於券尾。各還。舉人一試之日黎明。舉子入場。每人用軍一人看守。禁講問代冒。黃昏納券未畢者。給燭三枝。燭盡不成者。扶出一。考試官各將不識字從人一名。不許縱令出入。成祖時。令會試考官。賜宴於本部。又令下第舉人再試。送國子監進學。其優等者。仍賜冠帶。或加俸給。後令發回原籍進業。仁宗時。會試臨期。請旨。不過百名。南卷取十之六。北卷取十之四。後復以百名爲率。南北各退五名爲中卷。凡殿試用三月初一日。或用十五日。御殿而親試之。讀卷官內閣官。定第一甲三名。試卷讀訖。御筆親定三名。賜宴。宴畢。鈔賜折奏第一甲某姓名某貫人。第二第三同。



歷代登科記總目

唐自高祖武德元年。至昭宗天祐四年合二百八十九年。進士六千七百三十五人。諸科一千五百七十二人。每年進士則四五十八人。多則四十五人。後梁自太祖開平二年。至均王龍德二年合十七年。進士一百八十九人。諸科三十四人。每年進士不過二十人。餘人多不過二十人。後唐莊宗同光二年。至廢帝清泰二年合十四年。進士一百七十二人。諸科一百四十人。每年進士則二十三人。多者二十三人。少者二十人。後晉高祖天福二年。至出帝開運三年合十二年。進士一百一十二人。諸科一百八十一人。每年進士則十人。多者二十人。少者十人。後漢自高祖乾祐。至隱帝合四年。進士八十四人。諸科四百九十八人。後周自太祖廣順元年。至世祖顯德六年合九年。進士一百一十三人。諸科六百五十八人。宋自太祖建隆元年。至徽宗宣和六年合一百六十七年。進士一萬八千五百四十六人。諸科一萬二千三百四十八人。太祖時每年進士則取六七人。至三十餘人。太宗時進士則取一百餘人。至三百餘人。仁宗時為四百五十餘人。徽宗時為六七百。南宋自建炎二年。至度宗咸淳十年合一百四十八年。進士二萬九百二十六人。

元自延祐二年。至順帝至正二十六年合五十八年。進士一千三十九人。每三年則取八十餘人。多則八十餘人。少則八十餘人。皇明自太祖洪武四年。至神宗萬曆二十九年合二百三十年。進士一萬四千六百七十七人。每三年則取進士自一百一十人。至三百五十人。宋度宗時及明神宗萬曆二十九年以後。榜目無可考。

高麗人甲科

明太祖洪武四年三月。親策會試中式舉人於奉天殿。賜吳伯宗等一百二十人進士及第。出身有差。是科高麗人金濤中三甲。授東昌安邱縣丞。以不通華言。請還本國。詔給道里費送歸。

歷代薦舉之式

漢制。凡郡國之官。非傅相。其他既自署置。又調僚屬及部人之賢者。舉爲秀才。廉吏。而貢於王庭。多拜爲郎。東漢明帝。令司隸校尉部刺史。歲上墨綬。長吏視事三歲以上。理狀尤異者各一人。與計偕上。魏文帝立九品官人之制。宋文帝限年三十而仕。郡縣以六周而代。刺史或十餘年。孝武時。



仕者不復拘老幼。守宰以三周為滿。齊因宋代限年之制。鄉舉里選。不覈才德。其所進取。以官婚胄籍為先。遂令甲族。以二十登仕後門。以三十試吏。故有增年矯貌。以圖進者。梁初。無中正制。年二十五方得入仕。天監中。制九流常選。年未三十。不通一經者。不得為官。晉依梁制。州郡皆有中正。掌選舉。每以季月。與吏部銓擇可否。其秀才對策第居中。上表叙之。隋文帝制。諸州歲貢三人。工商不得入仕。唐制。凡選有文武。文選則吏部主之。武選則兵部主之。皆為三銓。尚書侍郎分主之。凡擇人之法有四。一曰身體貌豐偉。二曰言辭辯正。三曰書楷法適美。四曰判文理優長。唐初。有所謂冬薦官。即後來所謂舉狀也。凡官不歷州縣者。不擬臺省。憲宗時。定考薦之法。諸州刺史四品以上。皆五考。宋制。凡入仕者。貢舉。吏部銓。惟注擬州縣官。舊幕職。皆使府辟召。吏曹擬授京諸司六品以下官。皆無選。中書特授使臣。則三班院主之。少卿監以上。刺史副率內職。中書樞密院主之。自前藩鎮。多奏初官人。為掌書記。詔自今。令歷兩任。有文學者。方得奏

舉。英宗時。京朝官至鄉監。凡二千八百餘員。皇明。令在外官員有政蹟者。許巡按等官奏舉。太祖命天下朝覲官。舉所知一人。唐制。二三品冊授。五品以下。敕授。六品以下。旨授。流外官。判補之。

武舉

漢興。六郡良家子。選給羽林期門。以材力為官。名將多出焉。唐武舉起於武后之時。其制有長塼馬射。步射筒射。又有馬槍翹關。長一丈七尺。經三寸半。凡十舉。後手持關。距出處。負重行。負米五斛。身材之選。武選。兵部主之。課試之法。如舉人無過一尺。負重行。二十步。武選。兵部主之。課試之法。如舉人之制。宋有武舉。武選。仁宗。親試武舉十二人。先閱其騎射。而後試之以策。為去留。明十月考試武學。選取送兵部會數。於次年夏四月開科。初九日。初場。較騎射。十二日。二場。較步射。十五日。三場。試策。二道。論一道。先期請命翰林院官二員。為考試官。給事中並部屬官四員。為同考試官。

任子

漢儀注。吏二千石以上。視事滿三歲。得任同產若子一人。為郎。唐制。凡用



蔭一品子正七品上。二品子正七品下。三品子從七品上。從三品子從七品下。正四品子正八品上。從四品子正八品下。正五品子從八品上。從五品及國公子從八品下。宋制。臺省六品諸司五品歷兩任。然後許蔭補。明制。蔭叙有五例。其一。用蔭以嫡長子。若殘廢則同母弟及長孫。其二。用蔭者。孫降子。曾孫降孫。皆于應叙品第降一級。其三。正一品官蔭其子正五品。從一品子從五品。正二品子正六品。從二品子從六品。正三品子正七品。從三品子從七品。正四品子正八品。從四品子從八品。正五品子正九品。從五品子從九品。其四年五十以上。能通本經四書大義者。用蔭。其五。應叙之人。係遠方地面。各於原籍附近布政司所屬。銓注大學及內閣。有特蔭事例。登極及册皇后生皇子慶。又有加恩蔭子之例。

考課之式

虞三載考績。周冢宰歲終。則令百官府各正其治。受其會計也。聽其致事。而詔王廢置。三歲則大計群吏之法。而誅賞之。漢法。刺史以六條。察二千

石。歲終舉殿最。

一。豪右踰制。二。背公向私。三。不恤疑獄。四。蔽賢寵頑。五。子弟恃怙。六。通行貨賂。

宣帝。二千石有治

理效。以璽書勉勵。公卿闕則選所表。以次用之。東漢太尉掌四方兵事功課。司徒掌民事功課。司空掌水土功課。歲盡奏殿最。以刑罰之。唐考功之法。凡百司之長。歲較其屬功過。差以九等。有二十七最。自上上至下下。凡考中上以上進一等。中中守本祿。中下以下退一等。下下解任。在任釐理不滿二百日。不成考。宋制。文武常叅官。各以曹務閑劇爲月限。考滿即遷。凡考第之法。內外選人周一歲爲一考。又詔立考課縣令之法。治行分定上中下等。至其能否尤殊絕者。別立優劣二等。歲上其狀。以詔賞罰。皇明太祖。勅中書令有司。今後考課。必書農桑學校之績。成祖令州府縣官。到任半年之上者。巡按御史按察司。察其能否廉貪之跡具奏。

歷代學校之制

王制。有虞氏養國老於上庠。養庶老於下庠。夏后氏養國老於東序。養庶老於西序。殷人養國老於右學。養庶老於左學。周人養國老於東膠。養庶



老於虞庠。虞庠在國之西郊。米廩令盛有虞氏之庠也。序序次夏后氏之序也。瞽宗樂師殷學也。類宮類班政教周學也。夏曰校。殷曰序。周曰庠。皆鄉也。學國則三代共之。禮書曰：秀於一鄉者，謂之秀士。中於所選，謂之選士。俊士以其德之敏也。造士以其材之成也。進士以其將進而用之也。大司樂掌成均之法，以治建國之學政，而合國之子弟焉。凡侍坐於大司成者，遠近間三席可以問，終則負墻列事未盡不問。白虎通言：八歲入小學者，乃天子世子之禮。所謂小學，則在師氏虎門之左。大學則在王宮之東。亦皆天子之學也。大戴禮保傅傳之說亦同。尚書大傳云：十三年入小學。二十入大學。程子朱子從保傅白虎通王制。天子曰辟明，應和也。諸侯曰泮宮。漢興至武帝始興太學。在長安西北七里。置博士弟子員。公孫弘以春秋白衣為弟子。崇鄉里之化，以廣賢材焉。儒林傳：武帝立五經博士，問弟子員，設科射策，勸以官祿。射策者問難疑義書之於策，列而置之，不使彰顯，有欲射者隨所取釋之射之言，後世舉人糊名之意，以射。

防囑托循私則一也。成帝時增弟子員三千人。河間獻王來朝，獻雅朱對三雍宮。明臺也。武帝時封泰山。濟南人公玉帶上黃帝時明堂圖，明堂中有一殿，四面無壁，以茅蓋，通水。水圜宮垣，為復道，上有樓，從西北入，名曰崑崙。天子從之以入，拜祀上帝。於是上令奉高作明堂汶上，如帶圖。修封時以祠太一五帝。東漢世祖營起太學，車駕幸太學，賜博士弟子有差。太學在洛陽城南，開陽內外去官八里。講堂長十丈，廣二丈。堂前石經，四部服方領，習矩步者委它乎其中。帝先訪儒雅，四方學士雲會京師，立五經博士，各以其家法教授。凡十四博士。謂易有施孟、京氏、尚書歐陽、大小戴、春秋嚴顏。太常卿每選士，博士奏其能否。明帝臨辟雍行大射禮，冠通天衣，日月備法物之駕，盛清道之儀，坐明堂而朝群后，登靈臺以望雲物，袒割辟雍之上，尊養三老五更，饗射禮畢，帝正坐自講，諸儒執經問難於前。冠帶搢紳之人，圓橋門而觀聽者億萬計。自期門羽林之士，悉令通孝經章句。章帝大會諸儒於白虎觀，考詳同異，連月乃罷。順帝繕太學，開拓房室。魏黃初五年。



立太學。制五經課試之法。置春秋穀梁博士。時慕學者。始詣太學爲門人。滿二歲。試通一經者。稱弟子。不通一經者。罷遣。晉武帝初。太學生三千人。隋文帝以天下學校生徒多而不精。唯簡留國子學生七十人。唐制。凡學六。皆隸于國子監。國子學生三百人。以文武三品以上子弟爲之。太學生五百人。以五品以上子弟爲之。四門學生千三百人。七品以上子及庶人之俊異者爲之。律學生五十人。書學生三十人。算學生三十人。以八品以下子及庶人之通其事者爲之。京都學生八十人。大都督中都督序上州各六十人。下都督序中州各五十人。下州四十人。京縣五十人。上縣四十人。中縣中下縣各三十五人。下縣二十人。太宗數幸國學。於門一別置弘文館。於東宮置崇文館。遂增創學舍一千二百間。國學太學四門。亦增生員。書算各置博士。屯營飛騎。授以經業。高麗百濟新羅遣子弟請入國學。唐六典。國子生初入。置束帛一筐。酒一壺。脩一案。爲束脩之禮於師。宋初增修國子監學舍。修飾先聖十哲像。畫七十二賢及先儒二十一人像于

東西廊之板壁。仁宗時。王拱臣等言。首善自京師。漢太學二百四十房。千八百餘室。生徒三萬人。唐學舍亦千二百間。今國子監才二百楹。不足以容學者。請以錫慶院爲太學。從之。皇祐末。胡瑗爲國子監講書。專管句太學。每公私試罷。掌議率諸生會于首善。令雅樂歌詩。乙夜乃散。諸齋亦自歌詩奏琴瑟之聲。瑗在湖學。教法最備。取爲太學法。神宗時。增太學生員九百人爲額。元豐年。頒學令。太學置八十齋。齋容三十人。外舍生二千人。內舍生三百人。上舍生百人。總二千四百。月一私試。歲一公試。補內舍生。間歲一舍試。補上舍生。封彌謄錄。如貢舉法。元太宗設國子總教及提學官。命侍臣子弟十八人入學。世祖命生員八十人入學。永爲定式。皇明國初。作先師孔子廟。改國子學爲監。命歲報監生冊。即周人學士之版也。每歲終。總一歲諸生之數。具冊以獻於天府。太祖洪武己未。遣國子生一百三十四人歸省。仍各賜其父母帛各四疋。有妻孥者。携以來。月與粟錢。務得其歡。勿惜有司費。命禮部頒行科舉成式。凡三年大比。子午卯酉年鄉



試。辰戌丑未年會試。三月殿試。命選進士。題名記立碑于監門。成祖改北平郡學爲國子監。正堂七間。曰彛倫堂。又爲率性堂。誠心堂。崇志堂。修道堂。正義堂。廣業堂。各十一間。乃諸生肄業之所。太學門三間。門東敕諭碑一通。申明學制一通。定學規碑一通。

歷代祠祭先聖先師之禮

文王世子凡學春館。釋奠設薦饌酌于先師。秋冬亦如之。天子視學大昕鼓徵。乃命有司行事。興秩節。祭先師先聖焉。有司卒事反命。始之養也。適東序。釋奠于先老。周禮始立學者。既興器興也禮樂之器成則樂之用幣。然後釋菜。惟釋菜而漢高祖十二年。上過魯。以太牢祠孔子。元帝時。孔霸以帝師。賜爵號褒成君。奉孔子。後平帝追諡孔子曰褒成宣尼公。追封孔均爲褒成侯。東漢光武幸魯。使大司空祠孔子。封孔均子志爲褒成侯。子損嗣。和帝徙封褒尊侯。損子曜。曜子元。相傳。至獻帝初國絕。魏時再襲封。世世不絕。明帝幸孔子宅。祠仲尼及七十二弟子。章帝東巡。幸闕里及七十二人。作六代之

樂。大會孔氏男子二十以上者六十三人。講論語。帝謂孔僖曰。今日之會。於鄉宗。有光榮乎。對曰。臣聞明主聖王。莫不尊師貴道。今陛下親屈萬乘。辱臨敝里。此崇禮先師。增輝聖德。至於光榮。非所敢承。帝笑曰。非聖者子孫。焉有斯言乎。遂拜僖郎中。賜褒成侯損及孔氏男女錢帛。安帝幸太常祠孔子。自魯相令丞尉及孔氏親屬婦女諸生悉會。賜褒成侯以下帛有差。魏文帝以議郎孔羨爲宗聖侯。晉武帝封孔子二十三代孫震爲奉聖亭侯。宋文帝以孔邁爲奉聖侯。齊武帝釋奠。設軒懸之樂。六佾之舞。牲牢器用。悉依上公。後魏封孔子二十七葉孫乘爲崇聖大夫。改封二十八葉孫珍爲崇聖侯。北齊封三十一代孫恭聖侯。隋文帝封孔子後爲鄒國公。改封爲紹聖侯。隋制。每歲四仲月上丁。釋奠。州縣學則以春秋仲月釋奠。鄉飲酒禮。唐高祖詔國子學。立周公孔子各一所。太宗時。房玄齡等建議。武德中。以周公爲先聖。孔子配享。歷代所行。皆以孔子爲先聖。顏回爲先師。請停祭周公。升孔子爲先聖。以顏回配。詔從之。封孔子裔德倫爲褒聖



侯。皇太子釋奠為初獻。國子祭酒為亞獻。攝司業為終獻。貞觀二十一年。詔以左丘明。卜子夏。公羊高。穀梁赤。伏勝。高堂生。戴聖。毛萇。孔安國。劉向。鄭眾。杜子春。馬融。盧植。鄭康成。服子慎。何休。王肅。輔嗣。杜元凱。范甯。賈逵等二十二人。代用其書。垂於國胄。自今有事於太學。並令配享尼父廟堂。高宗時。贈孔子為太師。又封為隆道公。廟用宣和之舞。顏回贈少師。曾參贈少保。並配享。玄宗時。司業李元瓘言。顏子像立侍。據禮文合從坐侍。又四科弟子。閔子騫等。雖列像廟堂。不參享祀。請春秋釋奠列享。在二十二賢之上。七十子則請圖形於壁。兼為立贊。曾參孝道可崇。宜從享。詔顏子等十哲。為坐像。曾參為塑像。坐十哲之次。因圖畫七十二弟子及二十二賢於廟壁上。以顏子亞聖。親為製贊書于石。仍令當朝文士。分為之贊。題其壁焉。二十七年。追諡夫子為文宣王。令三公持節册命。其後嗣褒聖侯。夫子南面坐。十哲東西列侍。並褒贈顏子。優其秩。顏子贈充公。宋兗國公 閔子騫贈費侯。宋琅琊公 冉伯牛贈鄆侯。宋東平公 冉仲弓贈薛侯。宋下邳公 宰子

我贈齊侯。宋臨淄公 端木子貢贈黎侯。宋陽黎公 冉子有贈徐侯。宋彭城公 仲子路贈衛侯。宋河內公 言子游贈吳侯。宋丹陽公 卜子夏贈魏侯。宋東河公 春秋二仲上丁。令三公攝行事。七十二子并追贈。曾參贈郈伯。宋郈侯 顓孫師贈陳伯。宋陳侯 澹臺滅明贈江伯。宋金鄉侯 宓子賤贈單伯。宋單父侯 原憲贈原伯。宋任邱侯 公冶長贈莒伯。宋高密侯 南宮子容贈郟伯。宋魯郟侯 公哲哀贈郟伯。宋北城侯 曾點贈宿伯。宋萊蕪侯 顏路贈杞伯。宋曲阜侯 商瞿贈蒙伯。宋須昌侯 高柴贈共伯。宋共城侯 漆雕開贈滕伯。宋平輿侯 公伯寮贈任伯。宋壽張侯 司馬牛贈向伯。宋楚邱侯 樊遲贈樊伯。宋都邑侯 有若贈卞伯。宋陰平侯 公西赤贈郛伯。宋鉅野侯 巫馬期贈鄒伯。宋東阿侯 梁鱣贈梁伯。宋千乘侯 顏柳贈蕭伯。宋陽穀侯 冉孺贈紀伯。宋臨沂侯 曹邴贈曹伯。宋上蔡侯 伯虔贈聊伯。宋沐陽侯 公孫龍贈黃伯。宋枝江侯 冉季贈東平伯。宋諸城侯 秦子南贈少梁伯。宋鄆城侯 漆雕子歛贈武成伯。宋濮陽侯 顏子驕贈琅瑯伯。宋雷澤侯 漆雕徒父贈須句伯。宋高宛侯 壤駟赤贈北徵伯。宋上邳侯 商澤贈睢陽伯。宋鄒平侯 石作蜀贈石邑伯。宋成紀侯



任不齊贈任城伯宋當侯 公夏守贈亢父伯宋鉅侯 公良孺贈東牟伯宋牟侯  
 后處贈營邱伯宋膠侯 秦子開贈彭衙伯宋新息侯 奚容箴贈下邳伯  
 公有定贈新田伯宋梁父侯 顏襄贈臨沂伯宋富陽侯 鄒單贈銅鞮伯  
 旬井疆贈淇陽伯宋滏陽侯 罕父黑贈乘邱伯宋祁鄉侯 秦商贈上洛伯  
 申黨贈邵陵伯宋淄川侯 公祖子之贈期思伯宋即墨侯 榮子期贈  
 零婁伯宋厭次侯 縣成贈鉅野伯宋成武侯 左人郢贈臨淄伯宋南華侯 燕伋贈  
 漁陽伯宋沂源侯 鄭子徒贈滎陽伯宋山陽侯 顏之僕贈東武伯宋宛句侯 原亢  
 贈萊蕪伯宋樂平侯 樂欬贈昌平伯宋建城侯 廉潔贈莒父伯宋昨侯 顏何贈  
 開陽伯宋堂邑侯 叔仲會贈瑕邱伯宋平博侯 狄黑贈臨濟伯宋慮侯 邾異贈  
 平陸伯宋高堂侯 孔惠贈汶陽伯宋鄆城侯 公西舉如贈重邱伯宋臨朐侯 公西  
 箴贈祝阿伯宋徐城侯 蘧瑗贈衛伯宋內黃侯 施常贈乘氏伯宋濮侯 林放贈  
 清河伯宋長山侯 秦非贈汧陽伯宋華亭侯 陳亢贈穎伯宋南頓侯 申棖贈魯伯  
 登宋文侯 琴牢贈伯 顏噲贈朱虛伯宋昌侯 步叔乘贈淳于伯宋昌侯 琴張

贈南俊伯宋頓邱侯 德宗時以三十八代孫惟昉為兗州參軍又以三十八代  
 孫惟睦襲文宣王武宗時以三十九代孫榮為國子監丞後周時以四十  
 三代孫仁玉為曲阜縣令賜緋魚袋以顏淵孫涉為曲阜主簿敕兗州修  
 葺祠宇禁樵採宋初增修塑像畫像廟門立戟十六枝太祖以四十四代  
 孫宜為曲阜主簿太宗授宜太子右贊善大夫襲封文宣公免租稅真宗  
 賜孔延世經書以二十戶守孔子墳東封幸曲阜縣謁墓上服韡袍有司  
 定儀肅揖上特再拜又幸叔梁紇堂命尙書奠七十六弟子及叔梁紇顏  
 氏上製贊刻石幸孔林以樹木擁道降輿乘馬至廟奠拜謚曰立聖文宣  
 王封叔梁紇齊國公顏氏魯國太夫人並官氏鄆國夫人詔追封兗公以  
 下又詔封廟配享先魯史左丘明瑕邱伯 齊人公羊高臨淄伯 魯人  
 穀梁赤龔邱伯 秦博士伏勝乘氏伯 漢博士高堂生萊蕪伯 九江  
 太守戴聖楚邱伯 河間博士毛萇樂壽伯 臨淮太守孔安國曲阜伯  
 中壘校尉劉向彭城伯 後漢大司農鄭衆中牟伯 河南杜子春緱



氏伯。南郡太守馬融扶風伯。北中郎將盧植良鄉伯。大司農鄭康成高密伯。九江太守服虔滎陽伯。仲中賈逵岐陽伯。諫議大夫何休任城伯。魏衛將軍太常蘭陵亭侯王肅。贈司空尚書郎王弼封偃師伯。晉鎮南大將軍開府儀同三司當陽侯杜預。贈司徒豫章太守范甯封鉅野伯。命館閣官作贊。詔改立聖文宣王諡。爲至聖文宣王。避聖祖名也。以四十六代孫聖祐襲封文宣公。仁宗時。用登歌。皇祐年。詔兗州仙源縣。自國朝。以孔氏孫知縣事。近廢不行。其復之。至和年。封孔子後爲衍聖侯。神宗時。常秩等言。唐開元中。文宣王用袞冕。先儒依本爵用冕服。下太常議。文宣王冕用九旒。顏子以下冠服。禮部言。孟子同顏子配食。封鄒國公。荀況蘭陵伯。楊雄成都伯。韓愈昌黎伯。從事。頒行天下。學廟塑像。徽宗時。以王安石爲舒王配享。王雱爲臨川伯。從祠。文宣王用冕十一旒。服九章。用戟二十四。執鎮圭。並用王者之制。政和年。詔弟子侯爵與聖名同。以假邱侯曾參。改封爲武成侯。宛邱侯顓孫師。爲潁川侯。龔邱侯南宮縉。爲

汝陽侯。楚邱侯司馬耕。爲雒陽侯。頓邱侯琴張。爲陽平侯。瑕邱侯左丘明。爲中都伯。龔邱伯穀梁赤。爲雒陵伯。楚邱伯戴聖。爲考城伯。鄒學孟子廟。樂正子配享。公孫丑以下從祠。皆封爵。欽宗時。楊時。乞毀去王安石之像。詔依鄭康成例從祀。以五十代孫摯。封衍聖公。光宗時。以五十一代孫文遠。封兗聖公。理宗時。封朱熹爲徽國公。周敦頤汝南伯。張載郿伯。程顥河南伯。程頤伊陽伯。張栻華陽伯。呂祖謙開封伯。並列從祀。度宗時。邵雍司馬光從祀。又陞顓孫師於十哲。元世宗修先聖廟。以五十三世孫治權。主以洙。爲祭酒。成宗時。加孔子號曰大成。仁宗延祐三年。封顏子復聖公。曾子宗聖公。子思述聖公。孟子亞聖公。封孟子父爲邾國公。母爲邾國宣獻夫人。封孔子後思晦衍聖公。魏國公許衡從祀。文宗時。以董仲舒從祀。封孔子父爲啓聖王。母顏氏爲啓聖王夫人。妻开官氏爲大成至聖文宣王夫人。封孟子父爲聊國公。母爲聊國宣獻夫人。封顏子父顏無繇。爲杞國公。諡文裕。母齊姜氏。杞國夫人。諡端獻。妻戴氏。兗國夫人。諡貞素。先是开



官夫人神座。生木芍藥一本。見者異之。而修廟令下。皇明太祖詔天下。通祀孔子。東廡五十五位。西廡五十五位。子夜先祭啓聖公孔氏。用小牢。先賢顏無繇曾點孔鯉孟孫氏。左右配享。而廡先儒程昫朱松蔡元定從祀。英宗時。進宋儒胡安國蔡沈真德秀從祀。封吳澄爲臨川郡公從祀。世宗釐正祀典。撤去塑像。始爲木主曰。至聖先師孔子神位。木主高二尺三寸七分。濶四寸厚七分。大成殿爲先師廟。大成門爲廟門。東廡四十七位。西廡四十四位。皆稱某子之位。代宗時。二十一代孫弘緒八歲。襲封衍聖公。賜鶴袍玉帶。以其軀小。去二膀俾藏之。以爲榮。世宗穆宗時。六十三四五代孫。連爲襲封。明世宗時。建啓聖祠。

養老

有虞氏深衣而養老。養國老於上庠。養庶老於下庠。而用燕禮。其禮尙矣。憲養氣體而不乞。言有善則記之。爲惇史。夏氏燕衣而養老。養國老於東庠。養庶老於西序。而用享禮。殷人縞衣而養老。養國老於右學。養庶老於

左學。而用食禮。周制玄衣而養老。養國老於東膠。養庶老於虞庠。虞庠在國之西郊。兼用虞燕夏享殷食之禮。夏官羅氏。仲春羅春。鳥獻鳩。以養國老。月令仲秋。天子養衰老。授几杖。行糜粥飲食。五十養於鄉。六十養於國。七十養於學。達於諸侯。八十拜君命。一坐再至。九十使人受几。三王養老。皆引年。乞言合語之禮。皆小樂正。詔之於東序。凡大合樂。必遂養老。樂記。食三老。五更於太學。天子但以割牲。執醬而饋。執爵而酌。冕而總干。所以教諸侯之弟也。三五皆老人。知三德五事者也。又取象三辰五星。天所以照明。祭義。有虞氏貴德而尙齒。夏后氏貴爵而尙齒。殷人貴富而尙齒。周人貴親而尙齒。虞夏殷周。天下之盛王也。未有遺年者。年之貴乎天下久矣。次乎事親也。是故朝廷同爵。則尙齒。七十杖於朝。君問則席。八十不俟朝。君問則就之。七十者不有大故。不入朝。若入。君與之揖讓。東漢明帝養三老。五更于辟雍。三公年者。高者一人爲老。次一人爲更。皆服都紵夫袍。單衣。皂緣。領袖中衣。冠進賢。扶玉杖。祝鯁在前。祝饘在後。唐制。仲秋皇帝親養三老。五更於太學。所司先



奏定三師三公致仕者。用其德行及年高者一人爲三老。次一人爲五更。設三老座於檻東南面。設五更座於階上東向。設國老致仕者五品以上三人座於三老座西。設衆國老致仕者六品以下座於堂下。天寶間。制天下百姓丈夫七十五以上。婦人七十以上。各給中男一人充侍。宋養老如唐儀。元世祖時。順天路民王住兒。過誤致死罪。其母年七十。言於朝曰。兒死則妾亦死矣。乃宥其罪。俾養母。成宗時。賜高年帛八十者一疋。九十者二疋。親年七十。別無侍丁者。從近遷除。皇明太祖。令民年七十以上者。許一丁侍養。免其雜泛差役。詔中外學官。行養老之禮。凡民八十九十而鄉黨稱善者。有司以時存問。若貧無產業。年八十以上。月給米五斗。肉五斤。酒米三斗。九十以上。歲加帛一疋。絮一斤。有田產者。止給歲酒肉絮帛。惟應天鳳陽二府。富民年八十以上。社士八十以上。賜爵冠帶復其家。建文帝元年。民八十九十者。賜米一石。肉十斤。酒三斗。九十者。加帛一疋。綿一斤。鰥寡孤獨無產不能自存者。有司歲給米三石。成祖時。八十以上。給絹二疋。二疋

酒一斤。肉十斤。時加存恤。英宗時。九十以上。給冠帶。百歲以上。給板木。太祖時。百歲以上人。召見賜宴。賜冠帶襲衣。

歷代郡國之學

學記。古之教者。家有塾。黨有庠。術有序。國有學。比年入學。中年考校。一年視離經辨志。三年視敬業樂群。五年視博習親師。七年視論學取友。謂之小成。九年知類通達。強立而不反。謂之大成。漢文翁爲蜀郡守。見蜀地僻陋。選郡吏開敏有材者張叔等十餘人。詣京師受業。博士買刀布蜀物。齎計吏以遺博士。數歲。郡生皆成就還歸。有至郡守刺史者。又修起學官於成都市中。招下縣子弟。以爲學官弟子。由是大化。蜀地學於京師者。比齊魯焉。至武帝時。乃令天下郡國皆立學校官。自文翁爲之始云。平帝立學官。郡國曰學。邑侯國曰校。校學置經師一人。鄉曰庠。聚曰序。序庠置孝經師一人。何武爲刺史。行部。必先即學官。見諸生。試其誦論。問其得失。東漢光武時。李忠爲丹陽太守。起學校。習禮容。春秋鄉飲。選用明經。明帝時。幸



南陽召校宮弟子奏鹿鳴。辰陽長宋均。南陽守寇恂。武威守任延。泰山守秦彭。南陽守鮑德。皆造立校宮。修起黌舍。班固東都賦曰。四海之內。學校如林。庠序盈門。獻酬交錯。俎豆莘莘。下舞上歌。蹈德詠仁。唐制。州縣學生。州縣長官。補長史。每歲州縣館監舉其成者。送之尚書省。宋仁宗賜兗州學田。命藩鎮皆得立學。諸郡願立學者。悉可之。由是學校之說。遍天下。神宗時。諸路州府學官教授。共五十三員。元世祖命置諸路學校官。凡諸生進修者。嚴加訓誨。務使成材。以備選用。置高麗國儒學提學司。明初。兩京及中都。俱設國子監。天下府州縣。俱設儒學。其後。裁中都國子監。而各都司衛所。亦設學。太祖詔郡縣立學校。養士。月廩食米人六斗。有司給魚。又立社學。

歷代書院之制

浚儀王氏曰。漢初。郡國往往有夫子廟。而無校官。且不置博士弟子員。其學士嘗課試。供養與否。不見經傳。然諸儒以明經教于其鄉。率從之者數

百人。其齊魯燕趙之間。詩書禮易春秋論語名家者甚盛。則設書院。昉是矣。蓋未修庠序之教。士病無于學。相與擇勝地立精舍。爲群居講習之所。若岳麓白鹿洞之類是也。逮慶曆熙寧之盛。學校之官。遂遍天下。按書院之制。昉自石鼓嶽麓白鹿睢陽。皆碩德鴻儒講道明教之地。世所謂四大書院者是也。厥後書院遍天下。日增月益。星羅而鱗次。然多尙虛名而實學荒矣。宋應天書院。在歸德府。亦以睢陽名之。玉海所謂四大書院。有嵩陽而無石鼓。當以玉海爲正。

四大書院

白鹿洞書院。在江西南康府廬山五老峰下。唐李渤與兄涉創臺榭。南唐昇元中建學館。置田。李善道爲洞主掌教授。宋太宗時。知江州周述言。白鹿洞學徒常教千人。請賜九肄習。從之。真宗時。有司重修繕。又塑宣聖十哲之像。仁宗時。孫琛爲學館十間。牌曰。白鹿洞之書堂。孝宗時。南康守朱熹重建。爲賦示學者。呂祖謙爲記。



嶽麓書院。在湖廣善化縣。宋太祖時。潭州守朱洞。剏宇于嶽麓山抱黃洞下。作講堂五間。齋序五十二間。李允益崇大其規模。塑宣聖十哲之像。畫七十三賢。請賜經史。從之。孝宗時。劉珙重建為四齋。張栻為之記。理宗時。賜御書嶽麓書院額。

應天書院。即睢陽書院。宋曰。宋真宗時。應天府民曹誠。即楚邱戚同文舊居。初同文通五經。造舍百五十間。聚書數千卷。院學士入官。令同文孫舜賓主之。命賜院額。以誠為助教。給田十頃。

嵩陽書院。在河南登封縣太室山下。五代時建。宋太宗時。賜院額及九經。通考曰。石鼓書院。唐元和間。衡州李寬建。宋初賜額。

### 文獻撮錄卷三終

### 文獻撮錄卷四目錄

歷代職官之制

歷代官員之數

三公

宰相

門下省

中書省

史官

尚書省

尚書令僕射

吏部尚書

戶部尚書

禮部尚書

兵部尚書

刑部尚書

工部尚書

御史臺

學士院

殿閣學士之制

諸卿

諸監

內侍省

樞密院



歷代將軍之職

諸吏

歷代東宮之官

州縣牧守之職

文武散官

歷代祿秩之制

歷代職田之制

歷代秩品之數

命婦資品之制

官誥制之制

### 文獻撮錄卷四

#### 歷代職官之制

伏羲氏以龍紀。故爲龍師名官。共工氏以水紀。故爲水師水名。神農氏以火紀。故爲火師火名。黃帝雲師雲名。少昊氏其立也。鳳鳥適至。故以鳥紀官。自顓帝以來不能紀遠。乃紀於近。爲民師而命以民事。又有五行之官。唐堯內有百揆四岳。外有州牧侯伯。舜爲六官。以主天地四時。夏后亦置六卿。殷制建官曰太宰。大宗。大史。大祝。大士。大卜。典司。六典。周制立天官冢宰。地官司徒。春官宗伯。夏官司馬。秋官司寇。冬官司空。各有徒屬。秦制罷侯置守。太尉主五兵。丞相總百揆。又置御史大夫。以二於相。漢初因循不革。其後頗有所改。東漢務從節約。廢丞相與御史大夫。以三司綜理衆務。事歸臺閣。論道之官。備員而已。魏與吳蜀多依漢制。晉略同。宋齊無改作。官司有三臺五省之號。郡縣有三歲爲滿之期。梁定諸卿之位。分配四



時陳遵梁制。後魏位號准南朝。北齊類江東。後周兼用秦漢隋。有三臺五省五監十二衛十六府。唐因隋制。貞觀時。大省內官。文武定員六百四十。有二。肅代以後。府庫無蓄積。以爵賞功。皆給空名告身。大將軍告身一通。纔易一醉。名器之濫。至是而極。宋制用唐舊。然三師三公不常置。宰相不專用。三省長官。中書門下。並列於外。又別置中書於禁中。是謂政事堂。與樞密院對掌大政。天下財賦。中外筦庫。悉隸三司。臺省寺監官無定員。無專職。悉皆出入。分莅庶務。故三省六曹二十四司。互以他官典領。雖有正官。非別勅。不治本司事。神宗時。詳定官制。省臺寺監之官。各還所職。置宣正履正大夫。郎凡十階。元初國俗淳厚。以萬戶統軍旅。以斷事官治刑政。任用者一二重臣耳。及取中原。太宗始立十路宣課司。選儒臣用之。世祖中統以來。始建官府。輔相者曰中書省。本兵者曰樞密院。主彈劾者曰御史臺。內外百司庶務。各因其事而舉矣。皇明初立中書省。總省事。李善長爲左丞相。徐達爲右丞相。及胡唯庸汪廣洋事後。罷中書省。散其職六部。

置四輔官。以耆儒王本杜祐龔敷爲春官。杜敷趙民望吳源爲夏官。惟秋冬官缺。以本等攝之。建文時。更定官制。六部尙書陞正一品。成祖初改北平爲北京。南京亦置六部尙書。

歷代官員之數

唐虞六十員。

夏百十二員。

殷二百四十員。

周六萬三千六百七十五員。

漢自丞相至佐史。凡十三萬二千八百八十五員。

後漢七千五百六十七員。

晉六千八百三十六員。

宋六千一百七十二員。

齊二千一百三員。



後魏七千七百六十四員。

北齊二千三百二十二員。並內官

後周二千九百八十九員。並內官

隋一萬二千五百七十六員。內官二千五百八十一員外郡縣官九千九百九十五

唐一萬八千八百五員。內官二千六百一十九員外郡縣官一萬六千一百十五

宋一萬三千餘員。通內外文武官

南宋京朝官三四千員。選人七八千員。

元二千七百三十三處。總計官府大小

皇明二萬四千六百八十三人。京師一千四百一十八人外二萬二千七百九十八人

三公

記曰。虞夏商有師保有疑丞。設四輔及三公。伊尹曰。三公調陰陽。九卿通寒暑。大夫知人事。列士去其私。周立太師太傅太保。曰三公。少師少傅少保。曰三孤。漢初有太傅太尉。後加置太師太保大司徒大司空。東漢太傅

謂之上公。太尉主天。大司徒主人。司空主地。若天地災變。則皆册免。自太尉徐防始焉。漢制。朝臣見三公皆拜。天子御座即起。在輿為下。凡拜公。天子臨軒。六百石以上悉會。直事卿贊拜。御史授印綬。公三讓然後受。隋置三司不主事。不置府僚。但與天子坐而論道。置太尉司徒司空。以為三公。參議國之大事。唐復置三師。宋制。三師三公為宰相親王使相加官。檢校亦如之。太師為異數。趙普文彥博。特拜元太師太傅大保正一品銀印。明初設三公府。太宗罷之。仁宗復設。

宰相

黃帝得六相。而天地治。神明至。殷湯置二相。伊尹仲虺為之。武丁得傅說作相。秦置丞相。金印紫綬。漢置丞相。文帝時。置左右丞相。帝時。置一丞相。月捧錢六萬。唐制。以三省之長中書令侍中尚書令。共議國政。此宰相職也。太宗嘗為尚書令。臣下不敢居。由是僕射為尚書省長官。與侍中中書令。號為宰相。常以他官居宰相職。而假以他名。又曰。叅知政事。貞觀時。



僕射李靖。以疾三兩日。一至中書門下。平章事。而平章事之名。始此。李績。以太子詹事。同中書門下三品。謂同侍中。中書令也。同三品之名。始此。開元中。張說改政事堂。號中書門下。列五房于其後。一曰吏房。二曰樞機房。三曰兵房。四曰戶房。五曰刑禮房。宰相事無不統。故不以一職名官。自開元以後。常以領他職。實欲重其事。而反輕宰相之體。故時方用兵。則爲節度使。時崇儒學。則爲太學士。時急財用。則爲鹽鐵轉運使。又其甚則爲延資庫使。至於國史太清宮之類。其名頗多。皆不足取法。宋制。以同平章事。爲宰相之職。無常員。有二人。則分日知印。其上相爲昭文館太學士。其次爲集賢殿太學士。並監修國史。叅知政事堂。副宰相。毗大政。叅庶務。其餘授。不宣制。不押班。不知印。不預奏事。不升政事堂。殿庭別設磚。位於宰相。及勅尾署衙。降宰相一等。節度使兼中書令。侍中。同平章事者。謂之使相。不預政事。皇明初。革中書省。不設宰相。倣宋制。有華蓋殿。文淵閣。武英殿。太學士。以禮部尙書。翰林學士爲之。然未有機務。成祖時。設內閣。選翰林

院解縉。楊榮。楊士奇等六七儒臣居之。知制誥備顧問。對叅決政機。隱然相職。而官不過學士。其後閣老皆躋保傅。設庖厨。不復退食于外。傳旨則中官唯條旨墨書小票。司禮監用硃批出。人以政府視之。稱爲宰相。卽所謂入閣辦事也。

門下省

東漢謂之侍中寺。晉給事黃門侍郎。與侍中。俱管門下。唐制。以中書門下平章事。爲宰相之職。又有侍中。侍郎。散騎常侍。給事中。諫議大夫。起居郎。司諫。正言。各一人。改門下省爲東臺。又謂之鸞臺。宋門下省。在正陽門外。掌天下之成事。駁正違失。凡中書省。畫黃錄黃。樞密院。錄白畫旨。則留爲底。及尙書省六曹。所有法式。事皆奏覈審駁之。明太祖置中書省。罷令不設。

中書省

中書之官舊矣。謂之中書省。自魏晉始焉。梁陳時。凡國之政事。並由中書



省。唐改謂之西臺。又謂之鳳閣。又謂之紫微省。有令。侍郎。舍人。錄尚書。尚書令。僕射。左右丞。宋中書省。在左掖門外。掌進擬庶務。宣奉命令。行臺諫。章疏。群臣奏請。宋沿唐制。起居郎。隸門下。起居舍人。隸中書。號小兩省官。皆爲虛名。不與本省事。而典職者。自號修起居注。法二人。多以館閣官兼掌。皇明。只有屬官。

史官

史官。肇自黃帝。有之。自後顯者。夏太史終古。商太史高。勢。周則曰太史。小史。內史。外史。而諸侯之國。亦置其官。秦有太史令。漢置太史公。唐曰著作局。貞觀間。移史館於門下省北。宰相監修。而史職以他官兼領。宋制。監修國史一人。以宰相爲之。修撰。直館。檢討。無常員。凡國史別置院於宣徽北院之東。以藏之。謂之編修院。俗呼爲史院。其後著作局。唯修纂日曆。宰相監修。但提大綱。檢討官。搜閱校對。修撰實專史職。只據所送到時政記。起居注銓次其事。排以日月。謂之日曆。元以翰林兼國史。皇明史官。即翰苑

諸臣之職。

尚書省

堯試舜於大麓。領錄天下事。似其任也。周之司會。又其職焉。秦時。少府遣吏四人。在殿中主法書。故謂之尚書。尚猶主也。漢承秦置。及武帝遊宴後庭。始用宦者主中書。以司馬遷爲之。中間遂罷其官。以爲中書之職。成帝時。罷中書宦者。置尚書五人。一人爲僕射。四人分爲四曹。通掌圖書秘記。章奏。東漢光武。親總吏職。天下事皆上。尚書與人主叅決。斯乃文昌天府。衆務淵藪。李固云。陛下之有尚書。猶天有北斗。斗爲天喉舌。尚書亦爲陛下喉舌。斗斟酌元氣。運平四時。尚書出納王命。敷政四海。靈帝時。以梁鵠爲選部尚書。而曹名始見。魏有吏部。左民。客曹。五兵。度支。五尚書。晉有吏部。三公。客曹。駕部。屯田。度支。六尚書。宋齊梁陳。隨宜建置。惟隋制。准爲吏部。三公。客曹。駕部。屯田。度支。六尚書。唐謂之中臺。亦謂南省有都堂。居中。舊尚書戶。禮。兵。刑。工。六部尚書。唐宋相因。唐謂之中臺。亦謂南省有都堂。居中。舊尚書應。東有吏部。禮部。西有兵部。刑部。工部。宋太宗時。設都堂左右司。六部皆隸焉。



明太祖置吏戶禮兵刑工六部尙書俱正三品衙門。皆隸中書省。其後革中書省。陞六部爲正二品衙門。

尙書令僕射

東漢時。衆務悉歸尙書令。與司隸校尉御史中丞。朝會皆專席而坐。京師號曰三獨坐。在唐爲正二品。宋淳化間。升在三師上。議大政。僕射秦官。古者重武官。有主射以督課也。主。隋時。左右僕射從二品。唐二僕射。副尙書令。及尙書令廢。二僕射爲宰相。玄宗時。改爲左右丞相。宋制。左右僕射爲宰相之任。左僕射兼門下侍郎。稱爲太宰。右僕射兼中書侍郎。行侍中。中書令職事。寄祿爲特進。稱爲少宰。東漢以後。以六曹尙書。並令僕二人。謂之八座。隋唐以六尙書左右僕射。爲八座。郎官謂之尙書郎。漢置四人。其入直官。供青縑白綾被。或以錦縹爲之。給帳帷茵褥通中枕。太官供食物。湯官供餅餌及五熟果實之屬。五日一美食。下天子一等。給尙書郎侍使一人。女侍史二人。皆選端正妖麗。執香爐香囊護衣服。奏事明光殿省。省

中皆以胡粉塗壁。畫古賢烈女。以丹朱漆地。故謂之丹墀。尙書郎口含鷄舌香。以其奏事答對。欲使氣息芬芳也。丞郎月賜赤管大筆一雙。隄麋墨一笏。

吏部尙書

周禮。天官太宰以邦國。漢成帝有常侍曹。東漢改爲吏曹。唐又曰選部。唐又曰文部。掌文官選舉。總判吏部司封司勳考功四曹事。尙書掌七品以上選。侍郎掌八品以上選。宋璟爲尙書。始通其選而分掌之。開元來。宰相資地嵩高。不自銓綜。侍郎專選試。尙書通署而已。或分領則列爲三銓。侍所掌曰中。宋朝典選之職。分爲四。曰審官東院。曰流內銓武選。二曰審官西院。曰三班院。元豐定制。以審官東院爲尙書左遷。審官西院爲尙書右遷。三班院爲侍郎右遷。掌文武官選授勳封考課之政。元吏部尙書三員。其後六部尙書並以二員。凡職官銓綜之典。吏員調補之格。勳封爵邑之制。考課殿最之法。皆屬焉。皇明尙書左右侍郎有四子部。曰文選驗封稽



勳考功。凡官吏選授勳封考課之政。俱掌之。尚書之蒙簡命。禮數特異。歷代有侍郎郎中員外郎。明有主事。六部同。凡庶吉士御史滿考必陞。不待考。曰推陞。類推上取旨。單推上三品以上九卿。廷推上內閣吏部尚書。勅推上王官不外除。王姻不內除。大臣之族。不得任科。道族有僚屬者下避上。凡乞致仕者。不限年聽。京官七十。外官六十五。

戶部尚書

周禮。地官大司徒。掌土地之圖。人民之數。漢置尚書郎四人。其一人主財帛委輸。魏置度支尚書。宋齊度支尚書。領度支金部倉部起部。後周置大司徒卿。隋爲民部。唐爲戶部。宋戶部判部事一人。以兩制以上充。錢穀食貨之政。皆歸三司。鹽鐵戶部度支本曹但受天下之土貢。元會陳於庭而已。元豐官制。罷三司歸戶部。舊三司使。卽尚書副使。卽侍郎。元戶部尚書三人。掌貢賦出納之經。金幣轉通之法。府藏委積之實。物貨貴賤之直。皇明尚書左右侍郎有四。子部曰民部。曰度支。曰金部。曰倉部。以折銀劑米值。以平

米均田稅。以布帛歛庸調。以桑棗課農官。以芻地給馬牧。以里老攝鄉社。凡賦役稽版籍。十年攢黃冊。冊有丁有田。丁有役田有租。田曰官田曰民田。租曰夏稅曰秋糧。丁曰成丁曰未成丁。役曰甲役曰徭役。曰雜役。凡頒祿俸糧廩兼本折色。凡漕運曰支兌曰改兌。凡貯粟曰京倉曰通倉。凡藏銀曰內帑曰太倉。凡蠲征曰恩蠲曰災蠲。凡賑濟曰出帑曰發倉。凡邊儲曰田賦曰鹽賦。

禮部尚書

唐虞之時。秩宗典三禮。周禮春官大宗伯。掌天神人鬼地祇之禮。後漢尚書吏曹兼掌齋祀亦其職也。魏尚書有祠部曹。晉宋梁陳皆有祠部尚書。後魏爲儀曹尚書。後周爲禮部大夫。隋置禮部尚書。統禮部祀部主客膳部四曹。唐龍朔二年。改禮部尚書爲司禮太常伯。咸亨元年。復舊。宋禮部判部事二人。以兩制及帶職朝官以上充。凡禮儀之事悉歸於太常禮院。而貢舉之政。領於知貢舉官。本曹但掌制科舉人補奏太廟郊社。百官謝



賀表章。元豐官制始正其職。凡關於禮樂者皆掌之。太常國子監亦隸之焉。侍郎貳尙書之事。南渡諸曹長貳互置。元禮部尙書三員。掌禮樂祭祀會朝燕享貢舉之政。皇明尙書左右侍郎。有四子部。曰儀部。曰祠部。曰膳部。曰主客部。皇帝諭百官曰。詔曰。制曰。勅曰。誥曰。書。太皇太后皇太后曰。誥。百官陳事於皇帝曰。表曰。奏曰。題。太皇太后皇太后亦如之。於皇太子曰。箋曰。啓。皇后亦如之。皇帝批答曰。聖旨。皇太子曰。令旨。太皇太后皇太后皇后曰。懿旨。百官於宗王稱官而名。不得稱臣。王官各稱臣於其王。州縣學有歲貢。以子午卯酉年。試易詩書春秋禮記。人占一經中式曰舉人。明年會試中式者。上策試賜進士及第。出身有差。諸司相移文上下曰。照會曰。劄付曰。故牒曰。帖。下上曰。咨呈曰。呈曰。申。敵曰。咨曰。關曰。牒。皆以印識通上下防奸僞。凡天下災異。即開次類聞。並乞修省。凡諡皇帝十七字。皇后十三字。皇妃東宮東宮妃二字。親王一字。郡王二字。勳戚文武大臣皆二字。

兵部尙書

周禮夏官大司馬正邦國。制軍誥禁。魏置五兵尙書。中兵外兵騎兵別兵都兵晉宋齊梁陳皆有之。後魏爲七兵尙書。後周置大司馬。隋乃有兵部尙書。統兵部職方駕部庫部四曹。唐龍朔二年。改兵部尙書爲司戎太常伯。咸亨元年。復舊。玄宗時。掌武官選舉如吏部。宋兵部判部事一人。凡武官軍師之政。悉歸樞密院。選授小者。又歸三班。本曹但掌王駕儀仗鹵簿。元豐更制。武官銓選歸吏部。民兵儀衛金吾衛仗之事。皆掌之。南渡後。長貳互置。元兵部尙書三員。掌郡邑郵驛屯牧城池之政。皇明尙書左右侍郎。掌天下軍衛武官選授之政。有四子部。曰司馬曰職方曰駕部曰庫部。掌武官選陞襲替功賞之事。凡歲六選官二等。曰舊官曰新官。皆有流有世。世曰襲職。曰替職。其幼者曰優給。非眞授者。曰試職。曰署職。曰納職。凡大朝賀大禮儀。陳鹵簿。凡馬政三。曰民牧曰衛曰京府寄牧。凡傳郵二。曰驛曰遞。運所在京師曰會同館。皆以符驗關券行之。凡馬快船。以練水軍致貢獻。凡軍



制內外相維。凡設官都督指揮使司二十一。留守司二。衛四百九十一。守禦屯田群牧千戶所三百十一。儀衛司三十三。宣撫招討宣慰安撫長官司九十五。番夷都司衛所四百七。各統其官軍及部落。凡出師文武大臣曰提督曰總督曰總制。

刑部尙書

唐虞之時。士官以正五刑。周禮秋官大司寇掌三典。以佐王刑邦國。漢成帝時。尙書初置二千石曹。主郡國二千石。東漢光武改三公曹。主考課諸州郡政。二千石曹。掌中都官水火盜賊詞訟罪法。亦謂之賊曹。魏置尙書都官。晉復以三公尙書。掌刑獄。宋三公比部。主法制。齊梁陳後魏。並有都官尙書。北齊又有三公曹。掌囚帳斷罪赦日建金鷄等事。後周有大司寇卿。隋改爲刑部尙書。統都官刑部比部司門四曹。唐因之。龍朔二年。改刑部尙書爲司刑太常伯。咸亨元年。復舊。宋刑部判部事二人。以御史知雜以上充。太宗時。以刑部覆大辟案。增置審刑院。四方刑獄。獻於審刑院。眞

宗時。置糾察在京刑獄官。元豐制。行並歸刑部。元制。刑部尙書三員。正三品。掌天下刑名法律之政。明尙書左右侍郎。有四子部。曰憲部曰比部曰司門部曰都官部。凡麗於法者。誥其詞。察其情。僞而比其罪之輕重。必傳律例。律凡六百有六條。例凡三百七十有六條。律例所不及者。比而議請焉。凡衆刑之名五。曰笞曰杖曰徒曰流曰死。死二等。流三等。徒杖笞並五等。凡原宥之議八。曰親曰故曰功曰賢曰能曰勤曰貴曰賓。

工部尙書

周禮冬官其屬有考功。掌百工之事。漢武帝置尙書有民曹。主凡吏民上書。東漢光武改民曹。主繕修功作鹽池園苑。魏置左民尙書。晉宋以來。有起部尙書。每營宗廟宮室。則權置之。事畢則省。後周有大司空卿。至隋乃有工部尙書。統工部屯田二曹。唐龍朔二年。改工部尙書爲司平太常伯。咸亨元年。復舊。宋制。工部判部事一人。以兩制以上充。凡城池土木工程。皆隸三司修造。本曹無所掌。元豐制。行尙書工部。掌天下城池宮室舟車



器械符印錢寶之事。百工山澤溝洫屯田之政令。元制。工部尙書三。正三品。掌營造百工之政。皇明尙書左右侍郎有四子部。曰營部。曰虞部。曰水部。曰屯部。凡工匠二等。曰輪班。曰住坐。凡工二等。曰正工。曰雜工。雜工三日。當正工一日。凡火器曰火車。曰火傘。曰神鎗。曰將軍。曰銃。曰箭。曰砲。凡鑄錢。當十當五當三折二小錢。凡五等。鼓鑄於京師。頒之諸省。凡橋梁。曰舟梁。曰石梁。凡舟七等。曰董船。曰馬快船。曰海運船。曰鮮船。曰備倭船。曰戰船。曰糧船。凡車三等。曰大車。曰小車。曰戰車。凡織造。冕服。誥勅。制帛。祭服。淨衣。諸幣布。

御史臺

御史之名。周官有之。蓋掌贊書而授法令。非令任也。戰國時。亦有御史。皆記事之職也。至秦漢爲糾察之任。所居之署。漢曰御史府。曰御史大夫寺。曰憲臺。府中列栢樹。常有野鳥數千棲息其上。晨去暮來。號曰朝夕鳥。東漢以來。謂御史臺。亦謂蘭臺寺。梁及後魏北齊。或謂南臺。隋及大唐。皆曰

御史臺。御史爲風霜之任。彈糾不法。百僚震恐。官之雄峻。莫之比焉。有大夫。中丞。侍御史。殿中侍御史。監察御史。主簿。高宗時。置內供奉及裡行官。以御史大夫中書門下。謂三司。宋制。不制大夫。以中丞爲臺長。而爲兼官。元制。置御史大夫二員。明制。改爲都察院。建文初。又改爲御史府。設都御史。成祖初。復設爲都察院。

學士院

學士之職。本以文學言語。被顧問出入侍從。因得叅謀議。納諫諍。其禮尤寵。而翰林院者。待詔之地也。唐制。乘輿所在。必有文學之士。直於別院。以備宴見。而詔令。中書舍人掌之。太宗時。召學士草制。高宗時。文士元萬頃等。常於北門候進止。時人謂之北門學士。玄宗時。置翰林待詔。以張說張九齡等。掌四方表疏批答。別置學士院。專掌內命。凡拜免將相。號令征伐。皆用白麻。選用益用。號爲內相。以爲天子私人。入院一歲。則遷知制誥。未知制誥者。不作文書。憲宗時。又置學士承旨。弘文集賢。分隸中書門下省。



而翰林學士。獨無所屬。後晉翰林學士。與中書舍人。分爲兩制。宋翰林學士。掌內制。制誥。敕。勅。國書及宮禁所用之文辭。宰相節度使除拜。則學士草詞。授待詔書進。赦降德音。則先進草。大詔命及外國書。則具本稟奏。拜宰相或事重者。宣召面諭旨。歸院具詞以進。若已畫旨而有未盡。則論奏貼正。凡初命爲學士。遣使就第宣詔入院。院在金鑾殿側。號深嚴學士。遇隻日至晚出宿。蓋故事。以隻日鎖院。隻日降麻也。元豐中。始命佩魚。石林葉氏曰。正廳曰玉堂。蓋道家之名。宋太祖時。蘇易簡爲學士。上以紅羅飛白玉堂之署四字賜之。易簡肩鑰置堂上。每學士上事。始得一開視。哲宗時。蔡魯公爲承旨。乞刻榜揭之。避英廟諱。去下二字。止曰玉堂。沈氏筆談曰。堂中設視草臺。每草制。具衣冠據臺。而今不復如此。太宗夜幸玉堂。蘇易簡已寢遽起。無燭具衣冠。宮嬪自窓格引燭入照之。窓格上有火燃處。至今不欲更易。以爲盛事。洪氏容齋隨筆曰。翰苑故事廢棄無餘。今學士入朝。猶有朱衣院吏雙引至朝堂而止。元制。并集賢院爲翰林國史。集賢

院。置翰林承旨。侍讀。侍講。直學士等官。明初。亦設翰林院職官。

殿閣學士之制

宋朝太學士有觀文殿資政殿端明殿。資望極峻。無吏守無典掌。有侍從備顧問。觀文。非曾爲宰相。不除觀文學士。資政太學士。學士。以寵輔臣之去位者。端明學士。以學士久次者始除。觀文。隋時殿名。宋爲文明殿。稱呼同。眞宗諡號。改名紫宸殿。又以非人臣所可稱。呼以延恩殿。改名觀文殿。資政。在龍圖閣之東。班翰林承旨上。向文簡公。李文定公。王沂公。三十年間除三人。而皆前宰相也。端明。即西京正衙殿也。後唐明帝時。置端明殿學士。宋以待學士之久次者。又有閣學士直學士。以厲行義文學之士。龍圖閣。奉太宗御書御製。及典籍圖畫之士。有學士直學士侍制直閣學士。天章閣。奉眞宗御製。東曰群玉殿。西曰藥珠殿。內以桃花文石。爲流杯之所。寶文閣。奉仁宗御書御集。顯謨閣。藏神宗御製。徽猷閣。藏哲宗御集。敷文閣。藏徽宗聖製。煥章閣。藏高宗御製。華文閣。藏孝宗御製。寶謨閣。藏光



宗御製寶章閣藏寧宗御製元文宗置奎章閣置太學士學士緞制象齒少牌五十上書奎章閣三字一面篆字各官懸佩出入官門無禁皇明倣宋殿閣太學士之制成祖建內閣於東角門內與議幾務仁宗時楊士奇陞禮部侍郎兼華蓋殿太學士楊榮陞太常寺卿兼謹身殿太學士黃淮陞通政使金幼孜陞戶部侍郎俱兼武英殿太學士委任日隆置三公三孤之官又加至三孤領尙書職隱然有鈞衡之重禮與百僚殊矣

諸卿

夏殷周皆有九卿漢以太常光祿勳衛尉太僕廷尉大鴻臚宗正大司農少府謂之九寺大卿東漢魏晉宋齊梁皆同北齊九寺置卿少卿丞隋唐同宋初雖有九卿皆以爲命官之品秩而無職事元豐正名始有職掌太常卿唐虞伯夷爲秩宗兼夔典樂之任也周爲春官秦曰奉常漢曰太常欲令國家盛太常存東漢秩與漢同魏晉宋齊隋唐宋皆有之歷代領律樂醫卜等署元置太常禮儀院明初置太常司後改司爲寺光祿卿光明也祿爵也勳閣

也主門官秦有郎中令掌宮殿掖門戶漢因之至武帝更名光祿勳唐少卿二人領太官珍羞良醞掌醢等四署明光祿寺並置宣徽院尙食尙禮二局衛尉卿秦官掌門衛屯兵漢因之景帝更名中大夫令後元年復爲衛尉領公車司馬令掌殿司馬門夜檄宮中天下上章四方貢獻及闕下凡所徵召公車者皆總領之唐時領武庫武器守宮三署宋衛尉寺判寺事一人軍器庫以他官典領守宮歸儀鸞司元豐制行置卿掌儀衛兵械之政皇明不設此官凡供奉儀仗導從諸務俱屬錦衣衛宗正卿周官少宗伯掌三族之別以辨其親疎秦置宗正掌親屬漢因之兩漢皆以皇族爲之歷代同唐掌皇族外戚簿籍領崇立署及諸陵署太廟令宋宗正寺判寺事二人以宗姓兩制以上充奉廟陵薦享之事元置大宗正府皇明改大宗正院爲宗人府正一品列諸司之首掌族親屬籍以時修王牒書崇立署唐創之以司道教唐以老倣唐宋制也氏爲始祖也宋置玉清昭應等宮太僕卿周官有太僕掌王服位穆王以伯冏爲之掌輿馬秦漢因之歷代同領典厩署典牧署車府



署諸牧監。宋太僕寺判寺事一人。元又為別置尙乘寺。皇明初名群牧所。又定太僕寺。大理卿。舜攝位。臯繇作士正五刑。周秋官。秦為廷尉。廷平也。漢因之。景帝時更名大理。東漢廷尉卿。北齊曰大理寺。置卿。隋唐同。宋大理寺。以朝官一員或二員判寺事。一員兼少卿事。掌斷天下奏獄。送審刑院。詳乞同書。以上於朝。元世祖陞大理寺為都護府。有詞訟則治之。明初置大理寺。丘文莊曰。刑部都察院大理寺主執法。又謂之三法司。大理之設。則自兩法司所聽斷。日抱成案。引囚徒詣寺詳讞。冤者疑者情輕重者。皆得一一據律參駁。求之當然。後月報歲聞於上。請施行之。其職亦重且要哉。鴻臚卿。周官大行人。掌大賓客之禮。秦官有典客。漢改為鴻臚。鴻臚也。鴻臚傳也。鴻臚聲也。鴻臚故鴻臚也。景帝時為大鴻臚。歷代因之。隋時領典署司儀署。唐因之。宋鴻臚寺判寺事一人。元置通政院廩給司。而鴻臚寺不設。明初置侍儀司。職專朝儀宣贊等事。後改為鴻臚寺。卿左右少卿。朔望朝會。宴享經筵。進曆冊封。祭祀傳制。百官謝辭。率其屬而供事焉。司農卿。少皞氏以九

鴈為九農正。鴈為九農有九種。以爲農號。舜命棄為后稷。周為太府下大夫。秦為理粟內史。掌穀貨。漢景帝更名大農令。武帝更名大司農。掌九穀六畜之供膳羞者。東漢大司農掌諸錢穀金帛。郡國四時上月早見錢穀簿。其逋未畢。各具別之。歷代因之。北齊有卿少卿各一人。隋唐同。領上林太倉鈎盾。典園苑游觀導官。春御米也。四署。宋司農寺判寺事二人。以兩制以上充。元置大司農。皇明司農之職。總于戶部。不設司農卿。惟上林苑監仍舊。太府卿。周官有太府下大夫。掌貢賦之貳。受其貨賄之入。頒於受藏之府。歷代不置。然其職在司農少府。至梁置太府卿。掌府帑。及關津市肆。北齊有卿少卿。隋因之。分太府寺。置少府監。官尙方織染等署。太府管京都市及平準。左右藏。唐因之。宋太府寺判寺事一人。以兩制充。掌祠祭香幣。帨巾神位。席及造斗秤升尺而已。元豐改制始職。掌。元置太府監。皇明酒醴。掌之光祿。金玉諸貨。掌之十庫。不設此官。

諸監



秘書監。周官太史。掌六典。又有外史。掌四方之志。三皇五帝之書。漢氏圖籍所在。有石渠石室延閣廣內。貯之于外府。又有御史中丞。居殿中。掌蘭臺秘書及麒麟祿二閣。藏之於內禁。東漢圖書在東觀。桓帝時始置秘書監一人。掌典圖書。古今文字考合同異。屬太常後省。晉武帝分秘書圖籍為甲乙丙丁四部。宋建秘閣。自漢以當時文學之士。使讐校其中。故有校書之任。而未有官也。以郎則謂之校書郎。以郎中則謂之校書郎中。東漢時名儒碩學。入直東觀。撰述國史。謂之著作東觀。皆以他官領。東漢時又有太史局。令掌天時星曆。歲終奏新曆。國有事奏良日。國有災祥掌記之。宋曰司天監。明曰欽天監。元置秘書監丞。用大臣薦世家子弟為之。皇明不設。圖籍禁書藏之內府。殿中監。魏置殿中監官。隋曰殿內省。有監少監丞。掌諸供奉。領尚食尚藥尚衣尚舍尚乘尚輦等六局。宋制。殿中省判省事一人。有六尚之局。名別而事存。今尚食歸御厨。尚藥歸醫官院。尚衣歸尚衣庫。尚舍歸儀鸞司。尚乘歸麒麟院。內按轡庫。尚輦歸輦院。皆不領

于本省。元豐正制。置監少監。元殿中監。事皆領於四薛而兼宿衛。四怯薛者猶言番直宿衛皇明奉御諸事俱屬內侍。此官不設。將作監少皞氏以五雉為五工正。以利器用。唐虞共工。周官考工。秦有將作少府。掌治宮室。漢景帝更名將作大匠。唐龍朔二年改為繕工監。咸亨年復舊。後改為領繕監。宋將作監判監事一人。凡土木匠工之政。隸三司。元豐正制。置監少監。元初立將作院。又置宮殿府。專職營繕事。皇明設文思院。屬工部。專掌造作諸事。不設將作監。國子監。孫卿在齊為三老。稱祭酒。凡賓主饌以祭地。故為稱。漢吳王濞年老不朝。為劉氏祭酒。祭酒之名久矣。又漢置博士。至東京凡十四人。晉介憤皂朝服進賢兩梁冠佩水蒼玉。宋置助教。後魏置五經博士。隋置司業。唐龍朔二年改為司成館。改祭酒為大司成。咸亨初復舊。後改國子監為成均監。宋國子監判監事二人。以兩制充。置講八人。元國子監。隸集賢院。皇明制。國子學。設博士助教學正學錄典樂等官。

內侍省



天文有宦者四星。在帝座之西。周官有宮正。宮伯。闈人。寺人。戰國時有宦者令。秦有中書謁者。又置中常侍官。參用士人。皆銀璫左貂給事殿省。漢制置侍中。中常侍各一人。省尙書事。黃門侍郎一人。傳發書奏。皆用姓族。東漢中常侍贊導內事。顧問應對。明帝時始定員數。中常侍四人。小黃門十人。其後員數稍增。改以金璫右貂。兼領卿署之職。自和熹太后以女主稱制。不接公卿。乃以闈人爲常侍。小黃門通命兩宮。自此以來。悉用闈人。不調他士。自安迄桓。權任尤重。單超等五人封侯。隋改爲長秋監。領掖庭宮闈奚官三署。唐改爲內侍省。宋初有內中高品班院。淳化年改入內內班院。又改入內黃門班院。又改內侍省入內內侍班院。後有入內都知司。又有都知押班之名。元內侍省不設其職。皇明置內使監。奉御凡六十人。太祖謂侍臣曰。古之宦豎。不過司晨昏供役使而已。自漢鄧太后以女主稱制。常侍黃門通命。此後權傾人主。朕謂此輩。但當服事宮禁。豈可假以權勢。

樞密院

唐代宗時置內樞密使。始以宦者爲之。初不置司局。但有屋三楹貯文書而已。其職掌惟承受表奏於內中進呈。若人主有所處分。則宣付中書門下施行而已。後漢莊宗以崇政院爲樞密院。命宰臣兼使。宋朝樞密院與中書對持文武二柄。號爲二府。院在中書之北。樞密使帶相印爲樞相。太祖時趙普充樞密使。仁宗時富弼言。邊事係國安危。國初范質王溥以宰相兼知樞密使。今宜令宰相兼領。仁宗然之。樞密之名。其長爲使。則其貳爲副使。其使爲知院。則其貳爲同知。元制樞密院秩從一品。掌天下甲兵機密之務。皇明不設樞密官。軍旅諸務一事歸于兵部。

歷代將軍之職

三代之制。天子六軍。一萬二千五百人爲一軍。其將皆命卿。故夏書曰。大戰于甘。乃召六卿。蓋古之天子寄軍政於六卿。居則以田。警則以戰。所謂入使理之。出使長之之義。諸侯之制。大國三軍。次國二軍。小國一軍。其將亦命卿也。晉